

Luk

Ölöwak Buᅇa Luknöᅇ ohoyök.

Jim-asa-asari

Urumelenᅇ yeᅇön miti dölokᅇi qahö memba kazei, dokta Luknöᅇ mi azi öᅇgöᅇgöᅇi Tiofilusgöra kondelmamgöra aka Ölöwak Buᅇa ki ohoyök. Luk yaᅇön Jisösgö gwarekᅇi 12 yeᅇgöreᅇök kun qahöpmö, Grik azia aka kawöl ambazip mem ölöwak nupnöᅇ malök. Luknöᅇ Jisösgö könaᅇi yahöt kewö kondel neᅇgiza: 1) Anutunöᅇ Amötqeᅇe Tonᅇ melaimamgö keu jöhöiga Israel yeᅇgöra asuhuyök, 2) Yaᅇön mönö kantriᅇi kantriᅇi mem ölöwak neᅇgimamgöra kayök. Kembugö Uᅇaᅇan Jisös oholiga “ambazip etqeᅇeᅇi yeᅇgöra Ölöwak Buᅇa” jim asariyök. Ambazip yuai könaᅇi könaᅇi miangöra osigeri, Jisösnöᅇ yeᅇgöra waimanjat möta bauköm eᅇgiba malök. Luknöᅇ kösohot mewöᅇi sehisehiᅇi areᅇgöba ohom teköyök. Luknöᅇ sösoᅇgaigö kösohotᅇi gwötpuk ohoyök. Jisösnöᅇ mutuk gölmenöᅇ erök aka teteköᅇe miangöreᅇ gölme mosöta Suepnöᅇ öᅇgöyök. Miangöra sösoᅇgai sehisehiᅇi mi boᅇ 1-2 aka boᅇ 24 miangöreᅇ ahöza. Jisösnöᅇ Suepnöᅇ öᅇgöiga Buᅇa nup mem sehigetka mötnariᅇ kambunöᅇ qariba qariba anök. Luknöᅇ miangö kösohotᅇi mi buk qetᅇi “Aposol nup meme” miangöreᅇ ahöi ahöza.

Luknöᅇ Ölöwak Buᅇa ohoyöhi, miangö keu bo-honᅇi mi kewö dop köla ali ahöza: Köuluk nup

megetka ölni asuhuyök, Uña Töröñan ambazip sölölohöm enġii malget, Ambi yeñön Jisösbuk nup gwötpuk nañġoba meget, Anutunöñ siñgisöndokñini mosöta malök.

Buk kianġö bahöñi bohonñi 8 mi kewö:

Buk kianġö könañi Luknöñ ohoyök boñ 1.1-4

Jon O-melun azi aka Jisös asuhuba qariyohot
1.5-2.52

Jon O-melun azinöñ Anutugö nup meyök 3.11-20

Jisös o melun mem wañgiiga esapesap mi-
wikñaiyök 3.21-4.13

Jisösnöñ qenjarök nupñi Galili prowinsnöñ
meyök 4.14-9.50

Galili mosöta köna anda Jerusalem añgorök 9.51-
19.27

Jerusalem añgota sonda qöndökñi malök 19.28-
23.56

Wahöta asuhum enġiba Suepnöñ öñgöyök 24.1-
53

Matyu Mak Jon yeñön kösohot tosatñi qahö ohogeri, mi Luknöñ nanñök ohoi bahöñi 2 aka 6 miangöreñ ahöza. Kösohot tosatñi mi kewö: Garata yeñön liñet kölget, Lama galöm yeñön Jisös asuhuiga kaba eket, Jisösnöñ moröröpñe jöwöwöl jikenöñ öñgöyök, Samaria azinöñ gurusep azi ak kömum wañgiyök aka nanñi imbi-imbi azinöñ siñgisöndoknöñ geba sohoyöhi, miangö dopkeu.

Luknöñ kimbi Tiofilusgö ohoyök.

¹ Kezapqetok ambazipnöñ Amötqege Tonji ahumapkö keu jigetka miangö ölni sutnine asuhuyöhi, ambazip gwötpukñan miangö kösohotñi könahiba ohoget.

² Yuai ölni mi sutnine asuhuiga tosatñan mi könäkönahinneyök könahiba kota nanñine jeñinan eka möt yakögeri, yeñön mianğö dop mianğö buzupñi toroqeba jim sehigetka kezapnine geba nanine buñaya ahök. Ambazip mewöñi yeñön Buña mi könahiba papianöñ ohoba arengöget ahöza.

³ Nöñön mewöyök yuai pakpak asuhaba koröhi, mi törörök qesim engibi könañeyök könahiba jigetka möt kutuzal. O Tiofilus nöñön göhöra mötpi öngöngöñi akzan. Nöñön göbuk keu eraum mötpitkö mötpi ölöwahiga Jisösgö kösohotñi mi körekñanök arengöba ohozal.

⁴ Buña keu ölni kusum gihigetka mötzani, göñön mianğö könañi oyoñda körekñanök möt kömuman. Mewö.

Jon asuhamapkö keuñi Geibrielnöñ jiyök.

⁵ *Judia prowinsgö kiñ qetñi Herod yañgö nalöñe azi kun qetñi Zekaraia malök. Yañön jike nup galöm mala Abaiagö nup areñnöñ kinök. Anömñi qetñi Elisabet yañön mewöyök jike nup galöm Arongö gwölönarökñi kun ahök.

⁶ Yekñön Anutugö jeñe malmal diñdiñi mala Kembangö jöjöpañ keu aka jimkutukutuñi pakpak törörök wuatangöba köpösihitkö keuñiri qahö malohot.

⁷ Malohotmö, Elisabetnöñ köpingöra gwölönarökñiri qahö mala ambazip namñi ahot.

⁸ Nalö kunöñ Abaiagö nup areñ nalöñan kaiga Zekaraianöñ jike nup galöm nup memapköra Anutugö jemesoholñe kañgorök.

* 1:5: 1 Hist 24.10

9 Kaṅgoriga jike nup galöm yeṅön aiakanini wuatängöba sutṅine nup mendenḁa Zekaraia mekögetka Kembangö altanöḅ öngöba jiniḅ wörönḅambuk ohoyök.

10 Jiniḅ wanafu ohoho nalöḅan kam kuṅguiga yaṅön yuai wörönḅambuk mi ohoiga ambazip kambu pakpak yeṅön jöwöwöl jike yaigepḅe mamböta Anutu köuluköba malget.

11 Jiniḅ ohoiga wörönḅan pukpuköba miri uruḅi dop köliga miangörenḅ Kembangö garata kunöḅ altanöḅ eu asuhum waṅgiba böröḅi öḅḅe göröken kinök.

12 Kiniga Zekaraianöḅ eka auruba keṅgötḅi mörök.

13 Keṅgötḅi mörökmö, garatanöḅ kewö jii mörök, “Zekaraia, gi keṅgötḅi kude mötnöḅ. Anutunöḅ köuluki lök mötza. Miangöra anömḅan gölöm ala morö nahöna mema. Mi meiga göḅön qetḅi Jon qetman.

14 Nahönḅi asuhuiga urugan yaṅöra ölöwahiga söḅgainöḅga ambazip gwötpukḅan söḅöḅgai akḅe.

15 *I nam köro uruḅe tariga Uḅa Töröḅan miangörenök könahiba uruḅi kokolak qeiga qariba wain me o köhöikḅi mi qahö nempa Kembangö qöhöröḅe azi öḅgöḅgöḅi aka malma.

16 Mewö mala Israel ambazip gwötpuk urumelenḅ enḅiiga Kembuḅini Anutugörenḅ lilingöme.

17 *Anutugö Uḅaḅan kezapqetok azi Elaija inahöiga kukösum qakḅe nup meyöhi, yaṅön mönö miangö dop mutuk qelḅiḅe aniga Kembuḅöḅ

* 1:15: Jaḅ 6.3 * 1:17: Mal 4.5-6

andöŋe kama. Yaŋön anda könagesö uru kuŋgum enŋiiga Kembunöŋ kamapköra jöjöröba kinme. Iwi aka nahönbörat jula dengetka uru kuŋgum enŋiiga kunbuk mindirim aŋgume aka qeŋetal ambazip mi diŋdiŋi yeŋö mötmöt areŋnöŋ aŋgotme.”

¹⁸ Suep garatanöŋ mewö jiiga Zekaraianöŋ jiyök, “Anömni netkôn ambazip namŋi akzirangöra keugan mönö dewöwö ölnambuk akawak?”

¹⁹ *Mewö jiiga melenök, “Ni Geibriel. Nöŋön Anutugö mesoholŋe kinbi melaim niŋgi buzup ölöŋŋi ki memba kaba jibi mötzan.

²⁰ Nöŋgöreŋ keu jit ölnambuk asuhumawi, göŋön mi jibi qahö möt narizanaŋgöra keugan mönö qahöwahiga mötök malman. Mewö malnöŋga buzup keu kiangö ölni asuhumapkö nalöŋan kam kuŋguiga miangöreŋ nesilaman lolohoi keu kunbuk jiman.”

²¹ Nalö sutŋe miangöreŋ ambazipnöŋ mamböt mala Zekaraianöŋ jöwöwöl jikenöŋ nalö köröp tiŋtiŋi kinöhaŋgöra mötkurumkurum aket.

²² Mewö aka tatketka yaigep eta keu jimamgö osiiga möt asariba kewö jiget, “Yaŋön jöwöwöl jikenöŋ kinda jeŋi meleni Suepnöhök imut kun ekza.” Mewö jigetka böröŋanök kaisöpsöp al enŋiba mötök aka malök.

²³ Mewö mala jike nup meme nalöŋan teköiga lilingöba miriŋe anök.

²⁴ Wehön tosatŋi teköiga Elisabetnöŋ gölöm ala köiŋ 5 miangö dop mire asamböta kewö jiba tata malök,

* **1:19:** Dan 8.16; 9.21

25 “Moröni qahöpköra ambazipnönj memba eta al niŋgigetka Kembunönj mesohol köl niŋgiba miangö lömbötñi memba gila ak kömum niŋgiza.” Mewö.

Jisös asuhumapkö keuñi Geibrielnönj jiyök.

26 Elisabetnönj gölöm alöhangö köiñi 6 aiga Anutunönj garatañi qetñi Geibriel melaiiga Galili prowinsgö miriñi kun qetñi Nazaret miangörej erök.

27 *Eta ambi seram jömukñi qetñi Maria yangörej anök. Yanön azi qetñi Josef yangö ambi bujaya malök. Josefnönj kiñ Deiwidkö gwölönarökñi kun ahök.

28 Garatanönj Mariagörej anda kewö jiyök, “O Maria, silingi ölöpnj. Kembunönj kalem möriam gihiba göbuk kinma.”

29 Mewö jiyökmö, Marianönj jölönj miangöra gwötpuk auruba könañi jaruba mötkurumkurum ahök.

30 Mötkurumkurum aiga kewö jii mörök, “Maria, Anutunönj kalem möriam ghiiga yangö jene dop köljan. Miangöra kenjötki kude mötnönj.

31 *Mötnönj, göjön gölöm ala morö nahöna me-man. Memba qetñi Jisös qetman.

32 *Jisös yanön qariba azi qetbujañambuk aiga qetñi ‘Öngöngöñi ketañangö Nahönñi,’ qetketka malma. Mewö mali Kembu Anutunönj amböñi kiñ Deiwidkö jakömbuak dum wañgiiga salupñe ambazip galöm köl eñgiba malma.

* **1:27:** Mat 1.18 * **1:31:** Mat 1.21 * **1:32:** 2 Sml 7.12, 13, 16; Ais 9.7

33 Jeikobkö könagesö yengö kiña aka teteköni qahö galöm köl enğiba malma. Bemtohoñi mianjön mönö nalö kunöñ kude qahöwakña.”

34 Garatanöñ mewö jüiga Marianöñ jii mörök, “Yei! Ni azigö könañi qahö mötzal. Mianğöra keu jizani, mianğö ölni mönö denöwö asuhuma?”

35 Mewö jii möta meleşnök, “Uña Töröñan mönö aum köl gihiga Anutu öngöngöñi ketanğö ösumñan dop köla turum gihima. Mianğöra morö memani, yañön töröñi aiga ambazipnöñ qetñi ‘Anutugö Nahönñi,’ jiba qerakñe.

36 Mötnöñ. Tinigi Elisabet yañön mewöyök ‘Köpin mala morö memangö osiza,’ jigetmö, töndup ambi namñi aka nalö kewöñe morö nahöngö gölömñambuk aiga köiñi 6 akza.

37 *Anutunöñ yuai kun akñamğö jiba mi qahö qaköba osimakza.”

38 Mewö jüiga Marianöñ jiyök, “Mötnöñ, nöñön Kembugö welenqeçe ambia akzal. Mianğöra keu jizani, mianğö dop ölop ahum niñgima.” Mewö jüiga Suep garatanöñ mosöta anök. Mewö.

Marianöñ Elisabetköreñ kujuk anda ehök.

39 Marianöñ mi möri nalö köröpñi qahö aiga wahöta zilañ jöjöröba gölme kundune öngöba Judia prowinsgö taon kunöñ anök.

40 Anda Zekaraiagö mire öngöba anömñi Elisabet eka söñgaiba jölöñi jiyök.

41 Jölöñi jüiga mianğöreñök möri morö nahönöñ körö uruñe luhuba öngöba eri Uña Töröñan Elisabetkö uruñi kokolak qeyök.

* 1:37: Jen 18.14

⁴² Kokolak qeiga qet ketanji qeta kewö jiyök, “O alani, Anutunöŋ kötümötuetŋi öngöŋgöŋi al gihi-iga ambi sutnine malman aka morö memani, i mewöŋanök kötuetköm waŋgima.

⁴³ Denöwögöra Kembunangö namŋan kaba neiga mewö asuhum niŋgiza?

⁴⁴ Mötnöŋ, gi jölöŋni jinöŋga keu jölgi kezapne gei morönöŋ urune mewöyök söŋŋgai qakŋe luhuba öŋgöba etza.

⁴⁵ Kembunöŋ buzup keuŋi jiiga möta miangö ölni asuhumawi, mi möt narizanaŋgöra göhö mötŋi simbawoŋ akzan.” Mewö.

Marianöŋ söŋŋgai liŋet kölök.

⁴⁶ *Marianöŋ keu mi möta kewö jiyök,
“I-ia! Nöŋgö urukönömnan mönö önöŋi qahö
Kembu möpöseiza.

⁴⁷ Nöŋgö uŋanan Anutu, Amötqeŋe Toni
yaŋgöra söŋgaiba köiraŋ kölja.

⁴⁸ *Nöŋön welenqeŋe ambi etqeŋeŋi mal-
jalmö, Anutunöŋ töndup mesohol köla ak
kömum niŋgiza.

Mötnöŋ, ambazip kambuŋi kambuŋi merak
könaŋiba asuhumei, yeŋön mönö nöŋgöra
‘Simbawoŋ!’ jiba möpöseim niŋgiba malme.

⁴⁹ Kukösum Toŋan mönö aŋgöletot öngöŋgöŋi
mem niŋgi maljal.

Yaŋgö qetŋi mi Töröŋi.

⁵⁰ Ambazip merak gölmenöŋ maljei aka
könaŋep ahum sehimei, yeŋgö sutŋine
gwöt isik denike yeŋön Anutugö jitŋi

* 1:46: 1 Sml 2.1-10 * 1:48: 1 Sml 1.11

oŋgitpinbukö keŋgötŋini mötmei, yaŋgö
ak-kömukömuŋan mönö yembuk pöndaŋ
ahöma.

51 Anutunöŋ böröŋan aŋgöletot memba mianöŋ
kukŋi

kondel neŋgiiga ehin.

Ambazip nannini miwidimgöba söŋgööröqök mal-
geri, yaŋön mönö i köndaŋ eŋgiiga simbisem-
bel aka malget.

52 *Kiŋ kembuŋi kembuŋi jakömbuak dumŋine tata
ambazip galöm

köl eŋgiba malgeri, yaŋön i miangöreŋök qeköba
utal eŋgiiga etket.

Etketmö, etqeŋeŋi ia mönö mem wahöta al
eŋgiyök.

53 Ambazip yuaigö jaŋkötataŋ malgeri, miengö
uruŋini mönö

yuai ölöŋŋi ölöŋŋi mianöŋ kokolak qeyökmö,
ambazip pomŋi mi melaim eŋgiiga böröŋini börak
öne anget.

54-55 *Yaŋön ambösakonurupnini meköba eŋgömeiga
Israel aketka nini
toroqeba Anutugö welenqeŋeuruŋi maljin.

Anutunöŋ mönöwök jöjöpäŋ keuŋi kewö jim jöhöm
neŋgiyök, 'Nöŋön Abraham aka yaŋgö
gwölönarökuruŋi teteköŋi qahö mal öŋgöba
malmei, i ak kömum eŋgiba malmam.'

Mewö jiba keuŋi mi qahö ölum qei mala korök.

Qahöpmö, yaŋön mönö keu jitŋi mi wuatangöba
mala merak bauköm neŋgimamgöra kaza."

Marianöŋ mewö jiyök.

* 1:52: Job 5.11; 12.19 * 1:54-55: Jen 17.7

⁵⁶ Marianön köinj karöbut miangö dop Elisabet-puk mala kunbuk miriñe lilingöyök. Mewö.

Jon O-melun azinöñ asuhuyök.

⁵⁷ Elisabetkö morö meme nalöñan kam kunjuiga morö nahöna meyök.

⁵⁸ Morö nahöna meiga miri kösutñe malgeri aka tinitosolomurupñi yeñön Kembunöñ ak-kömukömu öngöngöñi kondel wañgiyöhi, mi möt asariba yambuk mohotñe sösöñgai aket.

⁵⁹ *Sösöñgai aka wehön 7 teköiga wahöta anda Anutugö aiwesökñi morö sileñe yandimegöra tokoget. Tokoba iwiñangö qetñi Zekaraia mi wakanj mem wañgibingöra jiget.

⁶⁰ Jigetmö, namñan jiyök, “Mi qahöp mahöpmö, qetñi mönö Jon qetpin.”

⁶¹ Jiiga kewö jiget mörök, “Jon qetzanmö, göhö tinitosolomgi yeñgöreñök kunñangö qetñi mi qahö ahöza.”

⁶² Mewö jiget möri kinda iwiñan yangö qetñi qetmapkö qesiba böröñinan kaisöpsöp alget.

⁶³ Kaisöpsöp algetka tafegöra qesii wañgigetka miangöreñ kulem kewö ohoyök, “Qetñi mi Jon.” Mewö ohoiga miangöra körek aurum tililingöget.

⁶⁴ Aurum tililingögetka miangöreñök numbuñi amgöiga nesilamñi lolohoiga keu jiba Anutu möpöseiyök.

⁶⁵ Möpöseiiiga miri alaurupñini pakpak yeñön qemsömbuñini gwötpuk mötket. Mötketka yuai asuhuyöhi, miangö buzupñi eraum mötketka sehiba Judia kundunji gölme pakpak dop kölök.

* 1:59: Lew 12.3

⁶⁶ Buzupñi eraum mötketka körekñan mi möta urukönömñine ala aňgön kölget. Kembunöñ kukösumñi morösesep qakñe mokoi malöhi, mianğö könäñi möt asarıba kewö jiget, “Morö kianğön qariba mönö wani yuaia kun denöwö akña?” Mewö.

Zekaraiianöñ kezapqetok keu jiyök.

⁶⁷ Mewö jigetka Uña Töröñan iwiñi Zekaraiagö uruñi kokolak qeiga kezapqetok keu kewö jiyök,
⁶⁸ “Nini Israel neñğöreñ Kembu Anutu möpöseibin. I-ia!

Yañön mönö könagesöurupñi mesohol köl neñgiba sohopenini memamğöra jöjöröba kama.

⁶⁹ Anutunöñ welen azıñi kiñ Deiwidkö könagesö neñğö sutnineyök
azi kukösumñambuk kuñgui wahöta Amötqeçe Ton-ina akña.

⁷⁰ Möpñanğö möpñeyök kezapqetok ambazipurupñi tök-kutukutuñi
i sölohöm enğii keu jit kewö jiba malget,

⁷¹ ‘Nöñön mönö kerökurupñini yeñğö ösumñini qebi eriga bohonñini jöhömam.

Denike yeñön kazik ak enğimeı, nöñön mönö körek yeñğö böröñineyök meköba sel jöhöm enğimam.’

⁷² Keu mewö jiba bömönurupnini ak kömum enğiba yembuk jöhöjöhö

areñ qainñi kun jöhöyöhi, mi mötmörıba wu-atañğöıga amötqegegö ölni asuhuma.

⁷³ Jöhöjöhö keu mi bömönini Abrahamğöra jiba jöjöpñ keunöñ jim köhöii ahöza.

⁷⁴ Jöhöjöhö keu mianğö ölni kewö:

Yañön nini kerökurupnini yengö böröjineyök meköm neñgiiga yengöra kenğötnini qahö möta welenñi qem wañgiba malbin.

75 Yañön keunini jim teköi solaniba yañgö jeñe sarakñi aka malmalnini ölülop mewö mala kömumbin.

76 *O gömokni Jon, göñön qariba mala qeljiñe mala ambazip uruñini mindingöba mewö mianjön Kembugö könañi mesatnöñga kama. Mianğöra qetki 'Anutu öñgöñgöni ketanğö keza-pqetok azia,' mewö qetketka malman.

77 Mewö mala amötqeqegö könañi mi Anutugö könagesöurupñi kusum enjinöñga mi möt kutuba uruñini melengetka Anutunöñ siñgisöndokñini sañgoñda mosötma.

78 Anutuninan uruñan jöpaköba ak kömum neñgimakza.

Mewö aka mesohol köl neñgiba undiñi euyañgöreñök ali gilikbilik akza.

Mewögöra neñön mönö wañgaran surui aukñe asaribingö akzin.

79 *Nini pandamanöñ jipjap taringa kömupkö kondotkondot Toñan aum köl neñgimakzapmö, wehön jilinjölañ kota qaknine kuñguba mem asarim neñgima.

Mem asarim neñgiiga luaigö könañi aukñe asuhui eka mianğöreñ angota tiba kinbin." Zekarianöñ mewö jiyök.

80 Morö Jon yañön qariba wahöriga Uña Töröñan inahöm wañgiiga Anutugö kolek azi köhöikñi ahök. Mewö aka gölme qararanjökölñe mala

* 1:76: Mal 3.1 * 1:79: Ais 9.2

mali nalönan kam kuŋguiga Israel könagesö yeŋgö jeŋine aukŋe asuhuba qeŋjarök nupŋi könaħiba meyök. Mewö.

2

Jisös Betlehem taonöŋ aħuyök.

Mat 1.18-25

¹ Jon O-melun azinöŋ aħuiga nalö miangöreŋ sisa kiŋ Ogastus yaŋön Rom sitinöŋ gölmeŋi gölmeŋi galöm köl eŋgiyök. Galöm köl eŋgiba takis könaħiba memegöra gawmangö jimkutukutu aliga gölmeŋi gölmeŋi pakpak yeŋön tokogetka kuskus (sensus azi) yeŋön qetŋini papianöŋ ohoba areŋgöget.

² Areŋ nup mi nalö mutukŋa meget. Megeri, nalö miangöreŋ azi qetŋi Qirinius yaŋön Siria prowinsgö premiö mala galöm köl eŋgiyök.

³ Ogastusnöŋ jimkutukutu aliga ambazip körek pakpak yeŋön öröba anda qetŋini areŋnöŋ ohomegöra nannini aħuahu miri bohonnini dop anget.

⁴ Galili prowinsgö taon qetŋi Nazaret miangöreŋ azi qetŋi Josef malök. Yaŋgö amböŋi mi kiŋ Deiwid. Kiŋ Deiwidkö taonŋi qetŋi Betlehem mi Judia prowinsnöŋ aħöyök. Miangöra Josefnöŋ Nazaret mosöta öŋgöba geba Betlehem anök.

⁵ Anmam jiiga nalö miangöreŋ ambi buŋaŋi qetŋi Marianöŋ gölömŋambuk malök. Maliga i auanŋita qetŋiri ohomegöra mohotŋe anohot.

⁶ Anda Betlehem aŋgorohotka Mariagö morö meme nalönan kam kuŋguyök.

⁷ Kam kuŋguiga qeŋjarök aħöahö mire aŋgota miangö uruŋe tiŋi qahö miwikŋaiyohot. Miangöra

bau bulmakau miriŋe öŋgöba tarohot. Tata miangören nahönŋi mutukŋi memba oponöŋ esuhuba bulmakau joutŋe ali geba ahöyök. Mewö.

Lama galöm yeŋön Suep garata engek.

⁸ Betlehem taon gölme miangören azi tosatŋan sun gem dop gölme köröŋi miangören anda lama kambuŋini galöm köl en giba malget.

⁹ Mewö malgetka sun gem miangören Kembugö garata kunŋan kösutŋine asuhum en giyök. Asuhum en giiga Kembugö asakmararaŋan liliköm en giba asariiga qem sömbuŋini möta jönömŋini unduyök.

¹⁰ Jönömŋini unduyökmö, Suep garatanöŋ jii mötket, “Mönö kezap alget. Nönön sösongai Buŋa ketanŋi ambazip körek pakpak yeŋgöra memba kazal, mi indel en gimam. Miangöra jönömŋini kude unduma.

¹¹ Buŋa mi kewö: En gö Amötqeqe Tonŋinan dölki ahuza. Yaŋön kiŋ Deiwidkö taonöŋ asuhuba Kambu qetŋi Kraist akza.

¹² Keu miangö aiwesökŋi kewö: Inŋini anda morö sepsep oponöŋ esuhuba bulmakau joutŋe alget ahözawi, mi miwikŋaime.”

¹³ Garatanöŋ mewö jiiga miangörenök garata kambu ketanŋan Suepnöhök kaŋgota yambuk aitongöba Anutugö möpömöpösei liŋet köla kewö jiget,

¹⁴ “Anutugö qetbuŋanŋi möpöseininga Suepnöŋ euyangören öŋgöza.

Yaŋön ambazip nanŋangöra meköm en giyöhi, yeŋgöra körö ölöwak möta gölmenöŋ luai al en giza.” Mewö.

Lama galöm yeñön anda Jisös eket.

¹⁵ Garata yeñön enğömosöta Suepnöñ lilingöba öngögetka lama galöm yeñön naninak kewö jiget, “Ayop, Betlehem miangören yeñön yuai ahuiga Kembunöñ miangö keunji jii mötzini, nini mönö mia anda ekin.”

¹⁶ Mewö jiba ösumñinan anda Maria Josef aka morösesep bulmakau joutne ahöyöhi, miwikñaiba eket.

¹⁷ Eka kinda garatanöñ morögöra keu jii möta kageri, mi indela jim asariget.

¹⁸ Jim asarigetka mötkeri, yeñön körek pakpak auruba welipköget.

¹⁹ Welipkögetmö, Marianöñ keu pakpak mi uru könömne ala dumgöba jöhöba könani mötmöriba malök.

²⁰ Welipkögetmö, yuai pakpak Suep garatanöñ jiyöhanğö dop asuhuyöhi, mi lama galöm yeñön eka möta miangöra Anutugö sösongai liñet köla möpöseiget. Möpöseiba mosöta lilingöba anget. Mewö.

Morö qetñi Jisös qetket.

²¹ *Jisös ahu Sonda mohot miangö dop teköiga Anutugö aiwesökñi sileñe yandibingö nalöñi kaiga qetñi Jisös qetket. Suep garatanöñ qet mi mutuk qeta wañgiigun nalö miangörenök namñangö gölöm uruñe ahuyök. Mewö.

Jisös wañgita Anutugö buñaya alget.

²² *Mosesgö Köna keunöñ keu kewö ahöza, “Ambinöñ morö nahönñi mutukñi memba silim 40 kounne mali teköiga söro gulunji köl könjorat

* **2:21:** Lew 12.3; Luk 1.31 * **2:22:** Lew 12.6-8

wanjiba injini mönö jöwöwöl jikenöŋ öngöba morö mi Anutugö jeŋe algetka yangö buŋaya akŋa.” Mianjöra nalö mi kam kuŋguiga Josef Maria yetkön keu mi tem köla Jisös wanjita Kembangö buŋaya akŋapköra Jerusalem öngöyohot.

23 *Kembangö Köna keunöŋ keu kewö ohoget ahöza, “Morö nahön pakpak sep mutuk mokozei, mi mönö Kembangö buŋaya akŋapköra qem teköba mem sarahime.” Yetkön keu mi wuatangöyohot.

24 Mewöyök Kembangö Köna keunöŋ jimkutukutu keu ahözawangö dop kembö me kembö supsup nei yahöt mi jöwöwöl ohomahotköra Jerusalem sitinöŋ öngöba anohot.

25 Nalö mianjörenŋ azi kun qetŋi Simeon Jerusalem malök. Yanön uruŋi jömuk Anutugörenŋ qekötahöba urumelengö kölguliguli aiga Uŋa Töröŋan yambuk kiniga Amötqeŋe Toŋan Israel uruŋe asuhumapköra mamböta malök.

26 Mamböta maliga Uŋa Töröŋan keu kewö indeli mörök, “Gi Kembangö Amötqeŋe Toŋi Kraist ahui mutuk ekagun kömupkö sihimbölöŋi mötman.”

27 Iwinamŋan Mosesgö Köna keu wuatangöba Jisös wanjita jöwöwöl jikenöŋ öngöyohot. Öngöyohotka Uŋa Töröŋan Simeon sölölohöi nalö mianjörenök mewöyök jikenöŋ öngöyök.

28 Öngöba morö mi eka memba dohongöba Anutu möpöseiba kewö jiyök,

Simeongö sösöŋgai liŋet

29 “O Kambu, merak welen azigan ölop anda uru-luainöŋ mala kömuma.

* 2:23: Eks 13.2, 12

30 Göhö keugahö dop Amötqeqe Tonji melainöñ asuhuiga i nani jenan eka simbawoñ mötzal.

Miangöra ölop anda kömumam.

31 Göñön amötqeqegö könaji mözözömgöba kantri pakpak yengöra indel enjinönga mi eka möt kutume.

32 *Göñön Amötqeqe Tonjängö asakñi indelnönga kian kantri yengö uruñini kuñguiga asarime aka qetbuñagan nangi könagesögi Israel nengö sut-nine mewöyök qarima.”

Simeongö kezapqetok keu

33 Simeonöñ morögöra keu mewö jiiga iwinamñan möta könkuñ aka welipköyohot.

34 Welipköyohotka kötuetköm enjiba namñi Maria kewö jii mörök, “Mötnöñ, Anutunöñ morö ki kuñguba ali Israel ambazip sehisehiñan i andö qeba eta enjugeotka gwötpukñan uruñini melenða ölöwakñe. Anutunöñ nanñak i ali aiwesök aiga gwötpukñan i tuaköpek jim wañgime.

35 Tuaköpek jim wañgigetka urumötmöñjini asa-asambötñan mewö aukñe asuhuma. Nangi urugan mewöyök wösöbirik aiga mianjön sou zuluk alalñi ewö urugi kuñguba qesiñma.” Mewö.

Ana ambigö kezapqetok keu

36 Jerusalem mianjöreñ kezapqetok ambi namñi kun qetñi Ana malök. Yangö isikñi qetñi Aser, iwinjñi qetñi Fanuel. Ambi mianjön

* 2:32: Ais 42.6; 49.6; 52.10

seramŋe azi memba mali yambu (yara) 7 mohotŋe malohot.

³⁷ Malohotka apŋi kömui malö aka mala kori nalö mianğoreŋ yambuŋi 84 ahök. Yanğon nalö dop jöwöwöl jikenöŋ öngöba mi silim kun qahö mosörökmö, sunğem asak Anutugöra nene sinği mala köuluköba waikŋi memba möpöseiba malök.

³⁸ Yanğon nalö mianğoreŋök kaŋgota morö mi eka Anutu möpöseiyök. Anutunöŋ Jerusalem ambazip sohopŋini memapköra mamböta malgeri, körek yengöra morö mianğö könaŋi jim asarii mötket. Mewö.

Jisösbuk Nazaret lilingöget.

³⁹ *Josef Maria yetkön Kembunöŋ areŋi jim kutuiga Köna keunöŋ ahözawi, mi körek ahot teköiga Galili prowinsnöŋ lilingöba taonŋiri Nazaret mianğoreŋ anohot.

⁴⁰ Morönöŋ qariba wahöta köhöiba mötkutukutuŋi ahuba kokolak qeiga Anutugö kalem möriamŋan qakŋe öngöi kinök.

Jisös yaraŋi 12 aiga jöwöwöl jikenöŋ öngöget.

⁴¹ *Jisös iwinamŋan yambu (yara) dop ak-kömükömu* kendon nalöŋe Jerusalem siti öngöba anjahotma.

⁴² Mewö mala Jisös yambu (yara)ŋi 12 aiga silikŋini ahakzeangö dop nalöŋi kam kuŋguiga mewöyök öngöba anget.

* **2:39:** Mat 2.23 * **2:41:** Eks 12.1-27; Dut 16.1-8 * **2:41:** Anutunöŋ Ijpt mianğoreŋ Israel ambazip enğehoriba enğonğiröhi, ak-kömükömu kendon mianğö qetŋi kun Pasowa.

⁴³ Anda mala kendon nalö mianön teköiga lilingöba mirinire anohot. Anohotmö, morö gwabö Jisösnöñ Jerusalem tari iwinamñan mi qahö möt kutuyohot.

⁴⁴ “Yañön ambazip kambu yembuk anja,” jiba silim mohotkö dop köna anda sepkitip aka alaurupñiri yeñgö uruñine qeta jaruyohot.

⁴⁵ Qeta jaruyohotmö, qahö miwikñaiiba kunbuk lilingöba Jerusalem anda jaruyohot.

⁴⁶ Jaruba malohotka silim karöbut teköiga jöwöwöl jikenöñ öngöba mianğöreñ miwikñaiyohot. Miwikñaiyohotka azi ketañi yeñgö sutñine tarök. Tari kusum wangigeri, mi möta qesim enğiba tarök.

⁴⁷ Tata Buña keugö könañi törörök möt asariba diñdiñanök melenñiga körek pakpak yeñön mi möta welipköget.

⁴⁸ Iwinamñan eka auruba namñan jii mörök, “Nahöni, gi denöwögöra mewö ak netkizan? Mötnöñ, niri iwigabuk göhöra waimanjat möta qeta jaruba malit.”

⁴⁹ Mewö jiiga kewö melen etkiyök, “Inñiri mönö wuanöngöra ni göraim niñgizahot? Ni Iwinanğö mire tatpi dop kölja, mi mötzahot me qahö?”

⁵⁰ Mewö melen etkiyökmö, yetkön keu jiyöhi, mianğö könañi mi qahö möt asariyohot.

⁵¹ Qahö möt asariyohotmö, töndup wahöta yetpuk lilingöba Nazaret taonöñ anda iwinamñi tem köl etkiba malök. Jisösnöñ keu jiyöhi, namñan mi pakpak möta urukönömñe ala jöhöba anğön kölök.

⁵² *Jisösnöñ mala qarui yambu (yara)ñi öngöiga mötkutukutuñi asariba sehiiga Anutunöñ kalem

* 2:52: 1 Sml 2.26; Qam 3.4

möriamñi wanğii köhöiba ambazip aka Anutu yeğö jeñine dop köl enğiyök. Mewö.

3

*Jon O-melun azinöñ Buña keu jiyök.
Mat 3.1-12; Mak 1.1-8; Jon 1.19-28*

¹ Zekaraiagö nahönñi Jon yañön nupñi könahiyök. Nalö mianğöreñ sisa kiñ qetñi Taiberius yañön Rom sitinöñ mala gölmeñi gölmeñi mindiriba yambu (yara) 15 azi kembu aka toroqeba galöm köl enğii malget. Galöm köl enğimamğöra gölmeñi gölmeñi Israel liliköba ahözei, mi mesinğetka bahöñi 4 aiga mienğö kiñini 4 mi kewö kuñguget:

Pontius Pailöt, Herod, Filip aka Lisantias. Pontius Pailöt mi Judia prowinsgö premiönina malök. Kiñ Herodnöñ Galili prowins galöm köl enğiyök aka datñi Filipnöñ Ituria aka Trakonitis prowins yahöt mienğö kembuñina malök aka Lisantias yañön Abilene gölme memba malök.

² Jike nup galöm bohonñini yahöt malohot, qetñiri Anas aka Kaiafas. Nalö mianğöreñ Zekaraiagö nahönñi Jon yañön gölme qararanğölkölñe maliga Anutugöreñ Buña keu asuhuiga mörök.

³ Anutugö Buña möta anda Jordan o töwatñangö kösutñe miri dop liliköba malök. Liliköba mala Buña keunöñ uruñini kuñguba kewö jiba malök, “Inini mönö uruñini melenğetka nöñön o melun mem enğimam. Mewö aketka Anutunöñ sinğisöndokñini sanğonđa mosötma.”

⁴ *Miangö keuñi mi kezapqetok azi Aisaianöñ ohoi yañgö Buzup Kimbinöñ kewö ahöza,
 “Kolek garata kunñan gölme qararañkölkölñe qeta maliga anda qetñi kewö mötme,
 ‘Kembunöñ kamawo! Miangöra mönö jöjöröba könañi mesatket. Mönö uruñini mindiñgöba könañi qölöleiget.

⁵ Köna örue pakpak mönö qem tigetka diñdiñi akña. Kunduñi wanjañi pakpak mi mönö qeköba köl qölöleigetka köröñi akña.

Köna mösökqösökñambuk mi mönö möhamgögetka diñgime.

Luhutnöñ köna misiiga simbiñsambañ tatzawi, mi mönö kutuba mesatketka solanima.

⁶ Anutunöñ oyaenköyaen Tonji melaii kaiga gölmeñi gölmeñi pakpak yeñön mi eka ek kutume.”

⁷ *Jonöñ miangö dop uruñini kuñguiga ambazip kambuñi kambuñi yeñön o melun mem enñimapköra yañgören kagetka enñeka yeñgöra kewö jiyök, “O qatö moröñi, iñini uruñini qahö melengetka Anutugö irimñan seholiiga likepñi melen enñimangö akza. Mi ölöñ kölbिंगö goro keuñi mi mönö dañön jii möta sömbuñini möta ki kaze?

⁸ *“Miangöra mönö ölnanök uruñini melenme. Bölönamñineyök lilingögetka ölni asuhui mi mönö ahakmemenñinan aukñe kondela malme. Uruñine möndömöndö keu kewö kude mötmörime, ‘Neñön mönö Abrahamgö gwölönarökña malinga Anutunöñ qahö ayuhum neñgima.’ Mewö

* **3:4:** Ais 40.3-5 * **3:7:** Mat 12.34; 23.33 * **3:8:** Jon 8.33

töptöpñine qemakzemö, ölni mi qahö ahakze. Nöñön mianğöra kewö jibi mötket: Anutunöñ köt ki ölop jim kutum enğıga letota Abrahamğö gwölönarökurupñi aka Anutu möpöseimakñemö, inini denöwö?

⁹*“Urunini qahö melenme ewö, Anutunöñ mönö inini ip ewö tengöri etpingö akze. Ip pakpak ölni ölopñi qahö kuñgumakzei, mi mönö köli etket könöpnöñ gili geme. Ip mewöñi kölmangö ke-sinji lök jitñi sañe ala ip könane ali jöjöröba ahöza. Anutunöñ mönö bölöñamñinağö likepñi melen enğima.”

¹⁰Mewö jiiga ambazip kambuñi kambuñi yeñön kewö qesiba jiget, “Mewögöra nini mönö denöwö ahinga dop kölma?”

¹¹Qesiba jigetka kewö melennök, “Kunñan maluku yahöt memba maljawi, yañön mönö mietköreñök kun mi malukuñi qahö i wangima aka denike yeñön neneninambuk maljei, yeñön mönö mewöyök nenenini qahö yeğöra menden enğime.”

¹²*Takis meme azi tosatñan mewöyök o melun mem enğimapkö kaba qesim wangiget, “Böhi, neñön mönö denöwö ahinga dop kölma?”

¹³Qesim wangigetka jii mötket, “Gawmanöñ tak-isgö jim kutum enğii ahözawi, dop mi mönö qahö onğita meme.”

¹⁴Yarö azi tosatñan mewöyök qesim wangiget, “Niniato? Neñön denöwö ahinga dop kölma?” Qesim wangigetka kewö jii mötket, “Kungöreñ monenğöra kuñguba upetkupet aka kiom kude

* **3:9:** Mat 7.19 * **3:12:** Luk 7.29

kölmemö, nanñini töwanjini memakzei, miambuk mönö urumohok aka ösöñ malme.”

¹⁵ Ambazip pakpak yeñön “Jonöñ Amötqege Tonji Kraist akapuk,” jiba uruñinan mewö mötmöriget. Mianğö könañi mötpingö kezapñini köröpñi aket.

¹⁶ Mewö aketka Jonöñ körek yeğöra kewö jiyök, “Nöñön o töhönöñ melun mem enğizalmö, azi kukösumñi köhöikñi kun kama. Yanğö kukösumñi öngöngöñan mönö nöngöreñ onğitma. Yanön azi öngöngöñi akñawanğöra nöñön yanğö köna esuñanğö kösöñi bauköba pösatmamğö qötötanğömam. Yanön mönö Uña Töröñi uruñine ali könöp bölamñan köl könjörat enğiiga mewö mianğön melun mem enğima.

¹⁷ Yanön ölni aka kamböñi mendeñ etkimamğö sapakñi memba kanğota uba qörörengöba kewötma. Kewöta wit kötni tokoba köweñe almapmö, kamböñi aka gwaugulapñi mi mönö usuñniga könöpnöñ geba teteköñi qahö jema.”

¹⁸ Keu mewöñi mewöñi gwötpuk toroqeba jiba uruñini kuñguba Ölöwak Buña ambazip kambu yeğöra jim asariba malök.

¹⁹* Malökmö, gölme bahöñanğö kiñ Herod yanön datñanğö anömñi qetñi Herodias mi ölöñ meyök aka bölöñi könañi könañi aka malöhi, mianğö sapñi Jonöñ qeba munjurariga jim wanğiyök.

²⁰ Jim wanğiba bölöñamñi kun toroqeba aka Jongöreñ nupñi tözöpköba suahö galömmi jii Jon memba kösö mire alget. Mewö.

*Jonöñ Jisös o melun mem wanğiyök.
Mat 3.13-17; Mak 1.9-11*

* **3:19:** Mat 14.3-4; Mak 6.17-18

21 Jonöŋ ambazip pakpak o melun mem enġiba Jisös mewöyök o melun mem waŋgiyök. Mem waŋgii köuluköiga miangörenök Suepnöŋ aŋaŋiyök.

22 *Aŋaŋiiga Uŋa Töröŋan melenġa kembö nei ewö aka Jisösgö qakŋe erök. Mewö eriga Suepnöhök qet kun kewö asuhuyök, “Göŋön mönö nani wölböt nahöna aknöŋga köröni ölöwahiga geknahöm ak gihizal.” Mewö.

Jisösgö isikurupŋi yengö qet areŋini

Mat 1.1-17

23 Jonöŋ Jisös o melun mem waŋgiiga yambu (yara)ŋi 30 miangö dop aiga amötqeqe nupŋi könahiba memba malök. Memba maliga Josefö nahönŋa akzawi, ambazipnöŋ mewö mötmöriġet. Jisös iwiŋi Josef, asaŋi qetŋi Heli.

24 Jisös amböŋi qetŋi Matat, sukumŋi qetŋi Liwai. Liwai iwiŋi Melki, asaŋi Janai, amböŋi Josef,

25 sukumŋi Matatias. Matatias iwiŋi Amos, asaŋi Nahum, amböŋi Esli, sukumŋi Nagai.

26 Nagai iwiŋi Mat, asaŋi Matatias, amböŋi Semen, sukumŋi Josek. Josek iwiŋi Joda,

27 asaŋi Joanan, amböŋi Resa, sukumŋi Zerubabel. Zerubabel iwiŋi Sealtiel, asaŋi Neri,

28 amböŋi Melki, sukumŋi Adi. Adi iwiŋi Kosam, asaŋi Elmadam, amböŋi Er,

29 sukumŋi Josua. Josua iwiŋi Eliezer, asaŋi Jorim, amböŋi Matat, sukumŋi Liwai.

30 Liwai iwiŋi Simeon, asaŋi Juda, amböŋi Josef, sukumŋi Jonam. Jonam iwiŋi Eliakim,

* 3:22: Jen 22.2; Sum 2.7; Ais 42.1; Mat 3.17; Mak 1.11; Luk 9.35

³¹ asañi Melea, amböñi Menna, sukumñi Matata. Matata iwiñi Neitan, asañi Deiwid,

³² amböñi Jesi, sukumñi Obed. Obed iwiñi Boaz, asañi Salmon, amböñi Nason,

³³ sukumñi Aminadab. Aminadab iwiñi Admin, asañi Arni, amböñi Hezron, sukumñi Perez. Perez iwiñi Juda,

³⁴ asañi Jeikob, amböñi Aisak, sukumñi Abraham. Abraham iwiñi Tera, asañi Nahor,

³⁵ amböñi Serug, sukumñi Reu. Reu iwiñi Peleg, asañi Eber, amböñi Sela,

³⁶ sukumñi Kainan. Kainan iwiñi Arpaksad, asañi Siem, amböñi Noa, sukumñi Lamek.

³⁷ Lamek iwiñi Metusela, asañi Enok, amböñi Set, sukumñi Adam. Adam mi Anutunöñ mei ahuyök. Mewö.

³⁸ (-)

4

Satanöñ Jisös esapköba malök.

Mat 4.1-11; Mak 1.12-13

¹ Jonöñ Jisös o melun mem wañgiiga Uña Töröñan uruñi kokolak qei Jordan onöhök lilingöiga wañgita gölme qararañkölkölñe anök.

² Anda miangören mali Bölöñi Toñan esapköm wañgii wehön 40 teköyök. Nalö 40 miangören nene kun qahö namba mali teköiga neneñangö kömuyök.

³ Yakanangö kömuiga Bölöñi Toñan jii mörök, “Gi Anutugö nahönña akzan ewö, mi mönö kondela köt ki jim kutunöñga letota beret aketka neman.”

⁴* Jii möta melenök, “Qahö, Buña Kimbinöŋ keu kewö ohoget ahöza, ‘Nenenöhök ambazip malmal qahö nenjimakza.’ ”

⁵ Meleniga waŋgita kundunji köröpŋi kunöŋ öngöba gölmegö kantrinji kantrinji pakpak mi zilaŋ kondel waŋgiyök.

⁶ Kondel waŋgiba jii mörök, “Nöŋön kantri pakpak mi galöm köl enjimamgö kukösumŋi aka inap yuainangö aködamunŋi mi nöŋgö böröne alalŋa ahöza. Miangöra mi nani sihimnangö dop ninja waŋgimam jiba ölop waŋgimam. Miangöra yuai pakpak ki mönö göhö böröge almam.

⁷ Miangöra gi waikni memba möpöseim ninjiman ewö, mi pakpak mönö göhö buŋaya ak teköma.”

⁸* Mewö jii möta kewö melenök, “Qahö, Buña Kimbinöŋ keu kewö ohoget ahöza, ‘Gi mönö Kembugi Anutu waikŋi memba möpöseiba ia mohot welen qem waŋgiba malman.’ ”

⁹ Meleniga Jisös waŋgita Jerusalem sitinöŋ anda jöwöwöl jikegö boŋe euyangören öngöba kewö jii mörök, “Gi Anutugö nahönŋa akzan ewö, mönö kiangörenök luhuba emu geman.

¹⁰* Buña Kimbinöŋ keu kun kewö ohoget ahöza, ‘Anutunöŋ garataurupŋi jim kutum enjiiga ölopŋanök galöm köla sel jöhöm gihime,’

¹¹* aka keu kun kewö, ‘Yeŋön böröŋine ala nönögölim gihigetka geba kötnöŋ könage qahö guhum qizit akŋa.’ ” Miangöra geba kude ayuhuman.

* **4:4:** Dut 8.3 * **4:8:** Dut 6.13 * **4:10:** Sum 91.11 * **4:11:** Sum 91.12

12 *Mewö jiyökmö, Jisösnöñ kewö melen wañgiyök, “Qahö! Anutunöñ jiza, ‘Gi mönö Kembugi Anutu kude esapköm wañgiman.’”

13 Bölöñi Tonjan esapesap pakpak mi Jisös ak wañgii teköiga mosöta anök. Mewö.

Jisösnöñ könahiba amötqeqe nup meyök

Mat 4.12-17; Mak 1.14-15

14 Jisösnöñ gölme qararañkölkölñi mosöri Uña Töröñañgö ösumñan yambuk kiniga Galili prowinsöñ lilingöyök. Lilingöiga keu buzupñan sehiba miri gölme liliköba tat angeri, mi pakpak dop köla anök.

15 Dop köli miriñi miriñi liliköba köuluk miriñine öngöba Buña keu kusum engiyök. Kusum engiiga mötkeri, körek yeñön mönö söñgaiba möpöseim wañgiget. Mewö.

Nazaret yeñön Jisös andö qeget.

Mat 13.53-58; Mak 6.1-6

16 Jisösnöñ lilingöba malqarip taonñi Nazaret miangörej anök. Sonda kendonöñ kaiga ahakza-wañgö dop köuluk mire öngöba Buña Kimbi oyon enjimamgö wahörök.

17 Wahöri kezapqetok azi Aisaiagö Buzup Kimbi wañgigetka kötula keu kemañi kewö ohoget ahözawi, mi miwikñaiyök:

18 **“Kembugö Uña Töröñan nöngö urune geba nup memegö kelök supañi*

köl niñgiba ambazip etqeqeñi yeñgöra Ölöwak Buña jim asarimakzal. Yanön melaim niñgiiga keu kewö jim sehimakzal:

* 4:12: Dut 6.16 * 4:18: Ais 61.1-2

Bölöñan gwaröhöm enġii maljei, Anutunöñ mönö i pösata meköm enġiiga malme.

Anutunöñ jegömöl ambazip jeñini mem tohoiga kunbuk uba ekñe.

Taikpaik memba eta alget maljei, Anutunöñ mönö i meköm enġiiga siyonşayonji qahö malme.

19 Kembunöñ amötqeqegö yambu ölöpñi ali kam kuñgumawi, nöñön mianġö kolekña kaba mi jim asarimakzal.”

20 Keu mewö oyonnda köpöp supap mi köpeiba galömñi wañgiba eta tarök. Tariga köuluk mire tatkeri, yeñön körek je qisilmisilñi qahö dörötköba ehiget.

21 Ehigetka könahiba kewö jii mötket, “Buzup Kimbigö keu ki oyonñbi kezapñine gei mötzei, mianġö öñan mönö merak asuhuza.”

22 Mewö jii mötketka kalem möriam keunji keunji numbuñeyök eriga körekñan mi möta welipköba jim soroköm wañgiba keu mianġö jiji-kilik-kilikñi mi kewö jiget, “Azi ki Josefgö nahönña me?”

23 Jigetka kewö jii mötket, “Iñini nalöñi nalöñi keu kötñi ki jimakze, ‘Mem ölöwak azi gi mönö nangi mem ölöwak anġuman.’ Iñini keu kötñi mi dölki nöñgöra jibingö mötze, mi mötzal. Mi jiba kewö jibeak, ‘Gi Kaperneam taonöñ anda anġöletot öñgöñgöñi menöñga buzupñi mörini, mianġö dop mönö nangi miri kianġoreñ mewöyök meman.’ ”

24 *Mewö jiba jiyök, “Nöñön keu öñi kun kewö jibi mötme: Kezapqetok ambazip kunöñ mönö nanñi malqarip taonöñ qahö dop kölja.

* 4:24: Jon 4.44

25 **“Nöjön keu ölbölñi kun kewö jibi mötme: Elaijagö (Elia) nalöñe Anutunöñ Suep nanğunji köli yambu (yara) karöbut aka köiñ 6 miangö uruñe kie qahö yöhöiga bödi ketañi ahuiga gölme pakpak dop kölök. Nalö miangören ambi malö gwötpuk Israel uruñe malget.*

26 **Gwötpuk malgetmö, Anutunöñ Elaija yeñgörenök kungören anmapkö qahö melaiyökmö, kian gölme Saidongö miri qetñi Sarefat miangören ambi malö mohot-töp yañgören melaiiga anök.*

27 **Kezapqetok azi Elisagö nalöñe uzikukunöñ Israel azi gwötpuk turum enjiiga malgetmö, yeñgörenök kunñan kun qahö solaniyök. Qahöpmö, kian gölme Siriagö azi qetñi Naman yañön mohot-kun mönö Elisagö keunji möt nariba solaniba ölöwahök.”*

28 *Jisösnöñ mewö jiiga köuluk mire tatkeri, yeñön körek keu mi möta irimñini seholiiga urupik aket.*

29 *Urupik aka wahöta Jisös közöla taon yaigepñe wuatangöba taon mi kundunangö sem kösutñe meget kinöhi, miangören aköget gemapköra anget.*

30 *Angetmö, sutñine qendenja engömosöta anök. Mewö.*

Kaperneam taonöñ öme kun közölök.

Mak 1.21-28

31 *Jisösnöñ Galili prowins uruñe Kaperneam sit-inöñ eta angota Sabat kendonöñ ambazip kambu kusum enjiyök.*

* 4:25: 1 Kin 17.1 * 4:26: 1 Kin 17.8-16 * 4:27: 2 Kin 5.1-14

³² *Kusum enjiiga keuñan kukösumñambuk aiga jiyök. Mianğöra könagesö yenön mi eka auruba welipköget.

³³ Köuluk miri mianğoreñ azi kun ömenambuk tarök. Tariga ömenan teriñgöba silata qetñi kewö qerök,

³⁴ “Aek! Jisös, Nazaret azia! Gi wania ak neñgimangö akzane? Mönö ayuhum neñgimangöra kazan me? Ni könañangi möt kutuzal. Gi Anutugöreñ azi Tök-kutukutuñi akzan.”

³⁵ Mewö qeriga Jisösnöñ tembula kewö jim wañgiyök, “Gi mönö keugi bököiga azi ki mosöta kesalnöñ.” Mewö jim wañgiiga ömenöñ azi mi memba gili tala sutñine gölmenöñ geiga miz-iqizikñi qahöp mahöp aka kota mosöta anök.

³⁶ Aniga körekñan nemböñini teköiga welipköba sutñine eraum möta kewö jiget, “Yei! Keu ki mönö wani keuya? Yañön kuk aka ösum-mumu qakñe ömewöröme jim kutum enjiiga tem köla kota anje.”

³⁷ Mewö asuhuiga Jisösgö qetbuñañan sehiba miri pakpak kösutñe tat angeri, mianğoreñ anda gölme mi dop kölök. Mewö.

*Jisösnöñ kawöl ambazip gwötpuk meiga ölöwaket.
Mat 8.14-17; Mak 1.29-34*

³⁸ Jisösnöñ wahöta Kaperneam köuluk miri mi mosöta Saimon Pitögö mire öngöyök. Öngöiga Saimongö suhunñan sile könöp öngöngöñi yöhöi ahöyök. Ahöiga yañgöra aka Jisös köuluköm wañgiget.

* **4:32:** Mat 7.28-29

39 Köuluköm wanjigetka anda sipköba geba sile könöp jim kutum wanjiiga mosöriga mianjörenjök wahöta nene ohoba gumohom engiyök.

40 Wehön jeñi teköba geiga mianjören ambazip denike yeñön alaurupñini kawöl könañi könañi mianjön engöhöi ahögeri, mi körek enjuañgita Jisösgören kaget. Kagetka böröñi körek yeñgö qakñine inanñik inanñik aliga ölöwak teköget.

41 Ömewöröme yeñön mewöyök ambazip gwötpuk yeñgö uruñineyök kota silata kewö qetket, “Gi Anutgö nahönñi akzan.”

Jisösnöñ Amötqege Tonji Kraist akzawi, yeñön mi mötkeñgöra Jisösnöñ jim enjiba numbuñini muhungöba enjuatañgöyök. Mewö.

Amötqege nupñi Galili dop kölök.

Mak 1.35-39

42 Jisösnöñ gaun ahöiga miri wanjarañ suruiga wahöta nanñik tiriñ (tiñ) kutuba geba görañe kunöñ anök. Anökmö, ambazip yeñön göraim wanjiba anda miwikñaiba kude enjömosöta anmapköra esapköba anjön köl wanjiget.

43 Anjön köl wanjigetmö, kewö jii mötket, “Nöñön Anutu bemtohonñangö Ölöwak Buñañi mi taon tosati yeñgöra mewöyök jim asarim enjibi dop kölma. Anutunöñ mönö mianjöra melaim niñgiyök.”

44 Mewö jiba anda Galili prowins liliköba köuluk miriñine Buña keunöñ uru kuñgum enjiba malök. Mewö.

5

Jisösnöŋ gwarekurupŋi mutukŋi enghoholök.

Mat 4.18-22; Mak 1.16-20

¹ *Nalö kunöŋ Jisösnöŋ Genesaret o anğö jitŋe kiniga ambazipnöŋ kambu köla Anutugö Buŋa keu mötpingö ölöqölököba liliköm waŋget.

² Liliköm waŋgetka kinda waŋge yahöt köwet göraŋe tarohotka etkehök. Söra örörö yeŋön waŋge mi mosöta geba mösakŋini kusahöla saŋgoŋget.

³ Waŋge kun mi Saimongöreŋa. Jisösnöŋ miaŋgöreŋ öŋgöba toŋi kewö qesim waŋgiyök, “Göŋön mönö naŋgönöŋga borom kun noaŋgita onöŋ göröken anma.” Qesim waŋgiiga naŋgöiga anda waŋgenöŋ tata ambazip kambu kusum enghiyök.

⁴ Kusum enghim teköba Saimongöra jiyök, “Göŋön mönö waŋge ki naŋgönöŋga o anğö bibiŋe aniga alaurupki yembuk mösakŋini söragöra gilgetka gema.”

⁵ *Jiiga Saimonöŋ melenök, “Ketaŋamni, nini sunghem köröp mösak gil bibihiba öŋi kun qahö mezin. Qahöpmö, göŋön jim kutuzanaŋgöra mönö töndup anda gilin gema.”

⁶ *Mewö meleni jiyöhaŋgö dop aketka söranöŋ awamŋi qahö mösakŋine gegetka buratibingö aket.

⁷ Mewö aketka alaurupŋini waŋge kunöŋ malgeri, yeŋgöra kaba bauköm enghimegö börökaek kölgetka kaget. Kagetka waŋge yahöt mi söranöŋ kokolak qegetka nemulahöm taköyohot.

* **5:1:** Mat 13.1-2; Mak 3.9-10; 4.1 * **5:5:** Jon 21.3 * **5:6:** Jon 21.6

8-9 Söra öngöngöni mewö memba eka miangöra körekan welipköget. Welipköba Saimon Pitönöñ mi eka Jisösgö wösöñe geba simin köla jiyök, “O Kambu, ni singisöndok azia akzalañgöra mönö nömosöta anöñ.”

10 Saimongö alayahötñi Jeims aka Jon Zebedigö nahönyahötñi yetköñ mewöyök nemböñiri teköiga welipköyohot. Saimonöñ keuñi jiyökmö, Jisösnöñ kewö meleñnök, “Mönö keñgötki kude mötman. Gi kiangö andöñe ambazip mi söra ewö öröba eñgömemba malman.”

11 Mewö jiiga wañgeñini öröba kota saknöñ ala öroyuainini pakpak mosöta Jisösgö andöñe wu-atangöba anget. Mewö.

Jisösnöñ uzikuku azi kun mem solaniyök.

Mat 8.1-4; Mak 1.40-45

12 Jisösnöñ taon kunöñ maliga miangöreñ azi kun silenji uzikukunöñ mem bölim teköiga tarök. Tata Jisös eka kösutñe simin köla geba kewö köuluköm wañgiyök, “O Kambu, göñön sihimgan mem ölöwak niñgimangö mötzan ewö, mönö ni ölöp mem solanim niñgiman.”

13 Mewö jiiga böröñi böranda silenji misiriba jiyök, “Nöñön mi akñangö mötzal. Gi mönö solaniman.” Mewö jiiga uzikukuñi mi miangöreñök solaniyök.

14 *Solaniiga kewö jim kutum wañgiyök, “Mötnöñ kiangö buzup keuñi mi kun kude jinöñ mötme. Qahöpmö, gi mönö jike nup galömgöreñ anda silegi kondel wañgiba Mosesgöreñ jimkutukutuñi wuatangöba solanizanangö saiwap

* 5:14: Lew 14.1-32

nalukɲi ala jöwöwöl ohoman. Mi ohonöŋ ehiga ambazipnöŋ könaŋamgi möt kutume.”

¹⁵ Mewö jiyökmö, mi töndup Jisösgö qetbuŋaŋi sehiba miri dop asariba anök. Anöhangö dop ambazip kambuŋi kambuŋi yeŋön keuŋi mötpingö aka kawölɲini mem ölöwakɲapkö yaŋgöreŋ kaba tokoget.

¹⁶ Kagetmö, Jisösnöŋ eŋgömosöta gölme qararaŋkölkölɲe anda mala köuluköyök. Mewö.

*Jisösnöŋ azi sile likepɲi kömukömuŋi möhamgöyök.
Mat 9.1-8; Mak 2.1-12*

¹⁷ Jisösnöŋ wehön kunöŋ Buŋa keu kusum eŋgiiga Farisi (Köna keugö kapaŋkölköl) aka Köna keugö böhi tosatɲan Galili aka Judia prowinsgö miriŋi miriŋi aka Jerusalemök kaba ambazip kambu sutɲine tatket. Kembugö kukösumɲan Jisös nam köl waŋgiiga ambazip kawölɲini mei ölöwaket.

¹⁸ Nalö miangöreŋ azi tosatɲan alaŋini sile likepɲi kömukömuŋi mi kululunöŋ ala aŋguba kaget. Kaba kutuba Jisösgö kösutɲe miri uruŋe öŋgöba albingö esapköget.

¹⁹ Esapkögetmö, ambazip kambunöŋ ölököba kingeraŋgöra paŋpaŋgöba miri uruŋe öŋgöbingö köna kun qahö miwikɲaiba memba miri qakɲe öŋgöget. Öŋgöba bo kötnöŋ memenɲi mi esim lulungetka kinimɲi ahui kawöl azi kululunambuk kösönöŋ jöhöba miangöreŋ algetka ambazip sutɲine Jisösgö wösöŋe geyök.

²⁰ Mewö geiga Anutu möt narim waŋgigeri, Jisösnöŋ yeŋgö tandökɲini mi ehi dop köliga kawöl azigöra kewö jiyök, “Alani, nöŋön siŋgisöndoki mosötzal.”

21 Mewö jiiga Köna keugö böhi aka Farisi yeñön mi möta kōnahiba kewö jiba mötmöriget, “Azi ki niñia? Yanñön mönō Anutu ilita mepaqepaik akza. Anutu mohotñan siñgisōndoknini mosōrakzapmō, azi kunñan mi qahō.”

22 Mewö mötmörigetmō, Jisōsnōñ uruñini ek kutuba kewö jii mötket, “Tosatñi iñini uruñinan wuanōngōra keu jizali, mianğōra gwōtpuk mötmörize? Mi qahō dop kölja.

23 ‘Nōñön siñgisōndoki mosōtzal, jizali, keu mi-añön mönō awamñanök jijiña. Kunñan mewö jiiga tosatñan keu mianğö ölni qahō ekñe. Mianğōra mi keu awamñanğö dop. Nōñön keu kun kewö jimamangö mötzal, ‘Mönō wahōta anōñ.’ Keu mi mönō lömbötñambuk jijiña akza. Mewö jibiga ölni asuhuma me qahōwi, mianñön mönō aukñe asuhui ekñe.

24 Mötket, gölmenōñ siñgisōndok mosōtmosōtkö kukōsumñi mi Suep gölmegö azi ölnanğören ahözawi, iñini mianğö kōnananğōra janjuñ malbepuk. Mianğōra keu lömbötñi mi azi kianğōra jibi ölni eket.” Mewö jiba azi sile likepñi kōmukōmuñi yanğōra jiyök, “Nōñön göhōra jizal: Gi mönō wahōta tumbulahöpki memba mirige anōñ. Keu lömbötñi mi ölnambuk akña ewö, keu awamñi mi mönō mewöyök denöwögōra omanñi akawak?”

25 Mewö jiiga mianğörenğök jeñine wahōta tumbulahöpñi ahöyöhi, mi memba Anutu möpöseiba mosōta miriñe anök.

26 Mewö asuhuiga ambazip körekñan welipköba sömbuñini möta Anutu möpöseiba jiget, “Yei! Merak yuai qetpuk soroha ekzin.” Mewö.

Jisösnöŋ Matyu (Liwai) oholök.

Mat 9.9-13; Mak 2.13-17

²⁷ Mianğö andöŋe Jisösnöŋ Kaperneam mosöta anda takis ofis ongitmamğö aiga mianğöreŋ takis meme azi qetŋi Liwai tariga eka jii mörök, “Gi mönö nöŋgö andöne kanöŋ.”

²⁸ Mewö jii möta nupŋi pakpak mosöta wahöta Jisösgö andöŋe anök.

²⁹ Anda Jisös miriŋe köl öröba yaŋgöra közölömbuan ketanŋi mözözömgöyök. Mözözömgöba takis meme tilipqilipŋinambuk aka alaurupŋi tosatŋi öröm enğiiga kambu ketanŋi köla yembuk tata nene neget.

³⁰ *Mewö negetka Farisi (Köna keugö kapaŋkölköl) aka yeŋgöreŋ böhi yeŋön mi eka jimönğot aka Jisösgö gwarekurupŋi kewö jim enğiget, “Aek! İŋini mönö wuanönğöra takis meme tilipqilipŋinambuk aka siŋgisöndok ambazip yembuk tata nene aka o neze? Mi qahö dop kölja.”

³¹ Mewö jim enğigetka Jisösnöŋ likepŋi kewö jii mötket, “Sile unditundit ambazipnöŋ doktagöra qahö ak enğimakzapmö, kawöl ambazipnöŋ mönö doktagöreŋ anakze.

³² Nöŋön siŋgisöndok ambazip uruŋini melenmegö enğoholmamğöra kaba maljalmö, ambazip nanŋinanğö mötketka solanŋi akzei, i qahö.”

Nene siŋgi malmalgö keuŋi

Mat 9.14-17; Mak 2.18-22

³³ Ambazip tosatŋan Jisösgöreŋ kaba qesiget, “Jon O-melun azigö gwarekurupŋi neŋön nalö

* **5:30:** Luk 15.1-2

gwötpuk Anutugöra nene siŋgi mala köuluk totoko köröpŋi alakzin. Farisi (Köna keugö kapankölköl) yeŋgö gwarekurupŋinan mewöŋanök aka maljemö, nangi gwarekurupkan mönö pöndaŋ nene aka o nemakze.”

³⁴ Mewö qesigetka kewö melenök, “Ölŋa! Nini wani nalönöŋ nene siŋgi malakzin? Ambi meme nalöŋe azigö andöurupŋan könöpŋi algetka ambigö sep kitipurupŋan yuai mi tökömakze me qahö? Nöŋön nani gwarekurupni yeŋgö azi buŋaya aka yeŋgö sutŋine köisirik tatzal. Tatpiga siŋgi malbingö jigetka yeŋön aijölöŋ söŋgaiba tata siŋgi malbingö osimakze.

³⁵ Osimakzemö, Anutunöŋ noaŋgiri kömumbiga yeŋön mönö nalö miangören ölop siŋgi malakŋe.

³⁶ “Inini malmal walŋi aka sösoŋgai Buŋa dölökŋi mi mindirim etkibingö osime. Miangö dopkeu pasetŋi kun mi kewö jibi mötket: Löŋgölöŋgöt walŋi jurariga kunöŋ löŋgölöŋgöt dölökŋi mitiba opo su jöhanŋi mianön qahö ala uhum göreŋgömakza. Mewö akawak ewö, opo su jöhanŋi dölökŋan mönö walŋambuk öröröŋ qahö aka mi öröba munjurariga böliqölibapuk.

³⁷ “Mewöŋanök kunöŋ wain o dölökŋi mi jobö me toru walŋi lama silenŋan memenŋi miangören qahö kusuiga gemakza. Mewö akawak ewö, wain o dölökŋan mönö qariba toru qesiŋniga jula mokoiga gölmenöŋ eta sohoiga toruŋan böliqölibepuk.

³⁸ “Miangöra wain o dölökŋi mi toru dölökŋeyök mokoin geiga dop kölma. (Mewöŋanök kunöŋ o ölopŋi mi gina gisagisahöŋe qahö umakzin. Mewö ubinak ewö, mianön mönö jula kisipisirik

eriga namba kawöl neŋgöhöbapuk. Mewö aka-puköra o ölopŋi mi gina ölopŋe umakzin. Injini mewöyök malmal walŋi aka Ölöwak Buŋa dölökŋi mi mindirim etkibingö osime.)

³⁹ Kunŋan wain o walŋi möpöseiba namba malakzawi, yaŋön wain o dölökŋi nemamgö sihimŋi qahö möta ölan alakza.” Mewö.

6

Jisösnöŋ Sabat kendongö Kembuŋi akza.

Mat 12.1-8; Mak 2.23-28

¹ *Miaŋgö andöŋe Sabat kendon kunöŋ Jisösnöŋ wit padi nup köröŋi ketanŋi kutuba anök. Ani gwarekurupŋan wösöŋini enŋuiga wit ölni mohot mohot böröŋinan misiba sömaŋda neget.

² Mewö negeranŋöra Farisi (Köna keugö kapankölköl) tosatŋan mi eka kewö jiget, “Injini mönö wuanöŋgöra Sabat kendongö nup meme soŋgoŋi oŋgitze?”

³ *Mewö jigetmö, Jisösnöŋ kewö melenök, “Kiŋ Deiwidnöŋ yarö aziurupŋi yembuk liliköba wösöŋini enŋuiga yuai akeri, mi lök oyonŋet me qahö?”

⁴ *Yaŋön mönö Anutugö opo seri jikenöŋ öŋgöba beret kömbukŋi Anutugö jemesoholŋe altanöŋ alget tariga ösumŋan walöŋniga qekögeri, mi mönö meiga neget. Beret kömbukŋi mosötmosötŋi mi jike nup galöm yeŋönök nezema. Yaŋön aka yaŋgö sunŋurumurupŋan mi nembepuköra soŋgo ahöyök mi töndup neget.”

* **6:1:** Dut 23.25 * **6:3:** 1 Sml 21.1-6 * **6:4:** Lew 24.9

⁵ Mewö jiba kewö jii mötket, “Suep gölmegö azi ölnan mönö Sabat kendongö Kembunji akza.” Mewö.

Jisösnöñ azi böröñi sösöröngöñi mem ölöwahök.

Mat 12.9-14; Mak 3.1-6

⁶ Jisösnöñ Sabat kendon kunöñ köuluk mire öngöba Buña kusum engiyök. Mianğoreñ azi kun böröñi ölni soholiiga tarök.

⁷ Köna keugö böhi aka Farisi (Köna keugö kapañkölköl) yeñon Jisös eka keu jakeje al wañgibingö könañi jaruba “Azi mi Sabat kendonöñ möhamgöma me qahö?” jiba je galöm memba tatket.

⁸ Tatketmö, Jisösnöñ mötmötñini mi möt kutuba azi böröñi sosoholiñi mi kewö jii mörök, “Mönö wahöta jenine kinöñ.” Mewö jiiga wahöta kinök.

⁹ Kini Jisösnöñ jii mötket, “Köna keu wuatangöba Sabat kendonöñ yuai ölopñi me bölöñi akin? Ölop kungö bohonñi jöhöbin me mosöringa ayuhuma. Wanat kun meinga dop kölma? Mi qesim engibi jiget.”

¹⁰ Mewö jiba körek pakpak lilingöm purik engeka azi mianğö jiyök, “Gi mönö börögi qötöteinöñ.” Mewö jiiga böröñi qötöteiiga kunbuk ölöwahök.

¹¹ Ölöwahökmö, galöm yeñon irimñini gwötpuk seholiiga “Jisös denöwö ak wañgibin?” jiba nanñini eraum mötket. Mewö.

Gwarekurupñi 12 möwölöhöm engiyök.

Mat 10.1-4; Mak 3.13-19

¹² Nalö mianğoreñ Jisösnöñ kundunje köulukömangö öngöba sunğem köröp mi Anutu köuluköm wañgiba mali miri alök.

13 Miri gianjiiga gwarekurupni engohola yengörenök 12 möwölöhöm engiba melaimelai azi aposol qet mi engiyök.

14 Qetjini kewö qerök: Saimon, Jisösnöñ qetji Pitö wanjiyök, yangö munji Andru aka Jeims, Jon, Filip, Bartolomyu,

15 Matyu, Tomas, Jeims Alfiusgö nahönñi aka Saimon qetji kun Tuaköpek azi qetket.*

16 Judas Jeimsgö nahönñi aka Judas Iskariot. Kariot azi mianjön könanjen mamalolo azia ahök.

Jisösnöñ kawöl ambazip mem ölöwak engiyök.

Mat 4.23-25

17 Jisösnöñ aposolurupni yembuk kunduneyök eta gölme köröñe anda kinget. Kingetka gwarek kambunji ketani aka ambazip kambuleleme yenön yangöra tokoba mambötket. Yenön “Bunani jii möringa kawölnini mem ölöwakña,” jiba miangöra Judia prowins pakpak, Jerusalem siti aka köwet jitneyök Taiö aka Saidon taon miangörenök kaba tokoget.

18 Ömewörömenöñ kölköljinjin mem engiyöhi, yenön mewöyök kaba ölöwaket.

19 Kukösumñan yangörenök kutuba yengören öngöiga körek ölöwak engiyök. Miangöra ambazip körekñan Jisös misiribingö jaram tiget. Mewö.

Simbawon aka kezapjupjup ahakö keunji

Mat 5.1-12

20 Jisösnöñ gwarekurupni uba wahöta engeka kewö jiyök,

* **6:15:** Nasönöl pati zelot yenön Rom gawman tuarenjon aka nanjine kinkin membingö tuaköpek memba malget.

“Anutugö bemtohoŋ mi wanapŋi engö buŋaya. Mianğöra wanapŋi iŋini mönö simbawoŋ akze.

21 Nalö kewöŋe nenegö ewö kömumba qemjen qeba maljei, Anutunöŋ mönö sihimŋini mi gumohom engima. Mianğöra iŋini mönö simbawoŋ akze. Nalö kewöŋe sahötzei, eŋön mönö sösöŋgai aka gön kölme. Mianğöra wösöbirik maljei, iŋini mönö simbawoŋ akze.

22 * “Ambazipnöŋ iŋini Suep gölmegö azi ölnaŋğöra aka kazik aka yaköriba silenje ala uruqeŋe keu töhöreŋ jim engiba kiam sekbölö ewö qetŋini kutumei, iŋini mönö simbawoŋ akze.

23 * Ambösakonurupŋinan mianğö dop kezapqetok ambazip yeŋğöra ak engiba malget. Mötket! Anutunöŋ töwaŋini öŋgöŋgöŋi Suep mire ali ahöza. Mianğöra mewö ak engigetka nalö mianğöreŋ mönö söŋgaiba köiraŋ kölme.

24 Iŋini simbawoŋ maljemö, pomŋi suki-napŋinambuk iŋini malmal siyoŋsayoŋi qahö maljei, mi teköma. Mianğöra nöŋön engöra wöziköba ‘Yei!’ jizal.

25 Nalö kewöŋe nem timbireŋ maljei, iŋini mönö wösöŋini ali (buörö) bödi malme. Mianğöra nöŋön engöra wöziköba ‘Yei!’ jizal. Nalö kewöŋe sösöŋgai aka gön köljei, iŋini mönö amburereŋ aka sahötme. Mianğöra nöŋön engöra wöziköba ‘Yei!’ jizal.

* 6:22: 1 Pitö 4.14 * 6:23: 2 Hist 36.16; Apo 7.52

26 “Ambösakonurupņinan kezapqetok ambazip takapulakanj jim möpöseim engiba malget. Ambazip pakpak mianģö dop ak engigetka nōņōn engöra wōlzikōba ‘Yei!’ jizal.” Mewö.

Kerökurupki mönō jōpakōm engiman.

Mat 5.38-48; 7.12a

27 “Bölōņi ak engimemö, iņini keuni möta maljei, nōņōn engöra kewö jibi mötme: mönō kerökurupņini uruņinan jōpakōm engiba malme. Denike yeņōn kazik ak engizei, i mönō ölöpņanök ak engiba malme.

28 “Denike yeņōn qesuahöba jinjerereņ ak engizei, i mönō köl tömbiba kötuetkōm engime. Örom ureim ak engizei, yeņgöra mönō Anutugö köulukōme.

29 “Kunņan nuņgulumgi likepņi qekõtähöliiga likepņi mewöyök melenj wanģiman. Kunņan qakņanģö malukugi goaņgiriga göņōn mönō dutņanģö oponj mohokņe memangö möri mi kude aņģōn kölman.

30 “Yuaigö ulet gihigetka mi mönō körek yeņgöra engiman. Kunņan göhö inap yuaigi meiga mi mönō melenj gihimapkö kude kapanj kölā qesiman.

31 *Ambazipnōņ yuai nanņinanģö ak engimegö mörakzei, mianģö dop mönō nanņini mewöyök i ak engimakņe.

32 “Gölmegö singisöndok ambazipnōņ alaurupņinan jōpakōm engigetka kitipņi melenja jōpakōm engiba möpöseim aņģumakze. Iņini mianģö dop gölmegö tandökņi wuatāņģōmakze ewö, Anutugoreņ tosa qahö ahuiga mönō denöwö

* 6:31: Mat 7.12

inini möpöseim engibawak? Alaurupnini aka kerökurupnini mi mönö mohotje jöpaköm engigetka töwa engiiga oyaenköyaen akne.

³³ “Gölmegö singisöndok ambazipnöñ alaurupninan yuai ölöpnji ak engigetka kitipnji melenj engiba ala ak anğuba möpöseim anğumakze. Inini miangö dop aka gölmegö tandökñi wuatangömakze ewö, Anutugöreñ tosa qahö ahuiga inini qahö möpöseim engima.

³⁴ “Gölmegö singisöndok ambazipnöñ monen yuai mi singisöndok ambazip tosatnji yengöra engiba kitipnji miyök melenj engimegöra kapan kölakze. Mi gölmegö ahakmemeya. Inini tosatñan tosanini melenj engimegö al mambötketka Anutunöñ mönö denöwö möpöseim engibawak? Tosatñan tosanini qahö melenj engigetka Anutunöñ mönö kitipnji mi melenjda töwa engima.

³⁵ “Inini mönö Suep Toñangö ahakmemeya aka memba malme. Gölme ambazipnöñ bölöñi aka saiwap qahö jimakzemö, Anutunöñ töndup i ölöpnji ak engimakza. Miangöra inini mönö kerökurupnini uruñinan jöpaköba ölöpñanök ak engiba monen yuai engiba miangö likepñi kun melenjda engimegöra kude al mambötme. Mewö aka malgetka töwaninan sehiba öngöngöñi aiga Anutu öngöngöñangö nahönböraturupñi aka malme.

³⁶ “Suep Iwiñinan körek pakpak ak kömum engimamgö mötzawi, inini mönö miangö dop ambazip pakpak ak kömum engiba malme.” Mewö.

Jimtekötekö tonji ewö kude akne.

Mat 7.1-5

37 “Ambazip tosatni yengö keunini mi kude kewöta jim teköme. Mi qahö jim teköm engigetka Anutunöŋ mönö nanŋini mewöyök qahö jim teköm engima. Inini tosatni yengö siŋgisöndokŋinaŋgö likepŋi mi qahö melenj engime. Mi qahö melenj engigetka Anutunöŋ mönö nanŋini siŋgisöndokŋinaŋgö likepŋi mi mewöyök qahö melenj engima. Inini mönö tosatni yengö siŋgisöndokŋini mosötme. Mi mosötketka Anutunöŋ nanŋini siŋgisöndokŋini mewöyök sanŋonja mosötma.

38 “Inini ambazip tosatni yengöra yuai ak engigetka Anutunöŋ mönö miangö dop kewöta yuai mi melenja engöra ak engima. Miangöra inini mönö yuai kalema engimakŋe. Mewö engigetka Anutunöŋ mönö mewöŋanök kalema engimakŋa. Ölŋa, Anutunöŋ ekbonep qahö möta bauköm engimakŋa. Anutunöŋ kewöta inini engigeri, miangö dopŋi jömuk memba kiwinöŋ mokoï numbune kori utuköi qöröraŋ aiga mulungöi gei toroqeba qakŋe mokoï dopŋi oŋgita qeqelanŋan eri, mi mönö gösöŋine löŋgöt engima.” Anutugö könaŋi mewö.

Ambazipnöŋ nanŋini könaŋini eka mötme.

39 *Jisösnöŋ dopkeu kun kewö jii mötket, “Jegömöl ambazip kunöŋ jegömöl alaŋi kun ölöp böröŋe memba wangitma me qahö? Mewö anbahorak mönö mohotŋe lömnöŋ geba etkubawak.

* 6:39: Mat 15.14

40 *Gwareknöŋ böhiŋi qahö oŋgitza. Böhiŋinan mötmöt pakpak törörök kusum enġii möt kömumei, körek yeŋön mönö böhiŋini ewö akŋe.

41 “Gi wuanöŋgöra alagahö jeŋe gödöwöröt morörökŋi ekzanmö, nangi jege ip sahötni ketani ahözawi, mia denöwö kude ek kutuzan?

42 Nangi jege ip sahötni ketani ahözawi, mi qahö ek kutuba denöwögöra alagahö kewö jibanak, ‘Alani mötnöŋ! Jege euke gödöwöröt geba tatzawi, mi ölop itaköbi etma.’ O urumelenġö silesile azi, gi mönö mutuk nange jegeyök ip sahötni (tapötŋi) ketani mi memba gilman. Mi mem gilagun törörök ek kutuba alagahö jeŋe gödöwöröt geba tatzawi, mi ölop itakönöŋga etma.” Mewö.

Ipkö könaŋi mi ölni eka kewöta möt kutume.

Mat 7.16-20; 12.33-35

43 “Ip ölopŋi kunŋan ölni bölöŋi qahö kuŋgumakza. Mewöŋanök ip bölöŋi kunŋan ölni ölopŋi qahö kuŋgumakza.

44 *Jau kötni mi jömnöŋ asuhuiga membingö osimakzin aka muli ölni mi koururuknöŋ asuhuiga qeköbingö osimakzin. Miangö dop ipkö ölni eka kewöta könaŋi möt kutume.

45 *“Azi uruŋan yuai kokolak qei ahözawi, mia mönö numbuŋan aukŋe jimakza. Miangöra azi ölopŋangö uru köweŋe ölopŋangö möriamŋi ahözawi, yaŋön mönö ölopŋi mi aukŋeyök jimakza. Azi bölöŋangö uru köweŋe bölöŋi ahözawi, yaŋön mönö bölöŋi mi aukŋe jimakza.” Mewö.

* 6:40: Mat 10.24-25; Jon 13.16; 15.20

* 6:44: Mat 12.33

* 6:45: Mat 12.34

Miri tandö köhöikñi aka lölöwöröñi

Mat 7.24-27

⁴⁶ “Injini nõngöra ‘Kembu Kembu!’ qet mi mönö wuanõngöra qerakzemö, nõñön yuai memegö jimakzali, mi qahö tem köla memakze.

⁴⁷ “Denike yeñön nõngöreñ kaba keuni möta tem köla mezei, nõñön yeñgö kõnañamñini kondela dopkeunöñ jimam.

⁴⁸ Yañön mitim qeçe azi kiangö dop akza: Azi mianñön ‘Miri memam,’ jiba lõm kõröpñi esiba geba tandöñi köt jamönjin qakñe kuñgum köhöii kinök. Mewö kiniga kie uru nalöñe o göulu köhöikñi gila miri kemañe kuñguyökmö, ölopñanök mem muhungöi kinök. Mianñöra kusumangö qem bibi-hiiga köhöiba kinök.

⁴⁹ Qem bibihiyökmö, kunöñ keuni möta qahö tem köla mezawi, yañön mönö mitimqeçe azi kiangö dop akza: Yañön ‘Miri memam,’ jiba tandö qahö esim kõmöta gölme qakñe kut bim miyök ala meyök. Mei kiniga kie uru nalöñe o göulu köhöikñi gila miri kemañe kuñguiga miri mi mianñöreñök kusuiga goromororöñgöba erök.” Mewö.

7

Jisösnöñ suahö galöm kungö nup aziñi mem ölöwahök.

Mat 8.5-13

¹ Jisösnöñ ambazip kambu sutñine mala Buña keuñi pakpak mi jii mötketka eñgömosöta Kaperneam taonöñ kañgorök.

² Mianñöreñ Rom suahö galöm kungö nup aziñan kawöl yöhöi kõmumangö ahök. Galömñan yañgö möri öñgöñgöñi ahök.

³ Mianğöra Jisösgö buzupñi möta Juda yeñgö jitñememe tosatñi melaim enğiiga Jisösgöreñ anda kewö qesiget, “Mönö kaba welen aziñi mem ölöwakña.”

⁴ Anda Jisösgöreñ aņgota kapan kōla kōulukōba jiget, “Ketañamnini, suahö galöm miañön mönō baukōm waņgimanañgō dop ölop sorokñi akza. Mianğöra mönō kanōñ.”

⁵ Mötnōñ, yañön Juda ambazip kambu neñgōra ak waņgiiga ‘Kōuluk mirinini membin,’ jiinga kian yañön moneñ ali meget.”

⁶ Mewö jiget möta yembuk anök. Anökmö, suahö galömgö miriñi dopdowii yañön alaurupñi melaim enğiba Jisösgōra keu kewö alök, “O Kambu, ni mewörökñi malbiga nōngö miri boñan gualōñmapkō gamuni mötzal. Mianğöra mönō qahö aum kōmumba kaman.

⁷ Ni nanañgō mötpi eretñi akzawañgōra göhöreñ kamangö dop kude mötzalmö, keu jitkanök jinōnga welen azinan ölöwakña.

⁸ Mi kewögōra: Ni nanak mewöyök galömnañgō kukōsum bapne al niñgiget maljal. Nōngö bapne yarö azi malgetka mi jim kutum enğimakzal. Yeñgöreñök kungōra ‘Anman’ jim kutubi yañön anma. Kungōra ‘Kanōñ’ jim kutubi yañön kama aka welen azini kungōra ‘Nup ki meman,’ jibiga yañön mi mema.”

⁹ Jisösnōñ keu mi möta suahö galömgōra welipkōba ambazip kambu wuatañgōba kageri, yeñgöreñ lilingōba kewö jiyök, “Nōñön kewö jibi mötme: Israel könagesö sutñine mewöyök mötnarip ketañi mewōñi mi kungö uruñe qahö miwikñaijal.”

10 Mewö jiiga suahö galömgö kolekaziurupñan lilingöba mire angota welen azi miwikñaiba eketka ölöwaka tarök. Mewö.

Jisösnöñ malö kungö nahönñi mem guliyök.

11 Miangö andöñe Jisösnöñ taon qetñi Nain miangöreñ aniga gwarekurupñi aka ambazip kambulelebenöñ wuatangöba anget.

12 Miangöreñ taon kiripo nanğun dopdowiiga qamöt kun anguba kaget. Malö kungö nahönña mohok-kunñan kömuiga taongö ambazip kambu ketanñan tokoba löm kölbingö kaget.

13 Kembunöñ malö mi eka wösöñi möta jii mörök, “Kude sahötman.”

14 Mewö jiba anda bokis anguba kageri, mi jii dörök algetka bokis misiriba kewö jiyök, “Azi gwabö, mönö wahötnöñ. Nöñön göhöra mewö jizal.”

15 Mewö jiiga qamöt mianön guliba wahöta könahiba keu jiyök. Keu jiiga Jisösnöñ namñambuk anmapkö wanñiyök.

16 Ambazip pakpak yeñön mi eka qem sömbuñini möta Anutu möpöseiba jiget, “Kezapqetok azi ketanñi kunöñ mönö sutnine asuhuba malja.” Tosatñan jiget, “Anutunöñ könagesöñi mesohol köl nenñii maljin.”

17 Yangö keu buzupñi mi sehiba Judia prowins pakpak dop köla gölmeñi gölmeñi likeplikep miangöreñ an teköyök. Mewö.

*Jongö gwarekyahötñi Jisösgöreñ kayohot.
Mat 11.2-19*

18 Jon O-melun azinöŋ kösö mire tariga gwarekurupŋan yuai pakpak mi asuhuyöhi, miangö kösohotŋi jiget mörök.

19 Jiget möta gwarekŋi yahöt etkoholi kayohotka Kembugöreŋ anda kewö qesim waŋgimahotköra melaim etkiyök, “Mem ölöwak azi kamapköra mamböringa göŋön mia akzan me azi kun bian kamapköra mambötpin.”

20 Melaim etkiiga Jisösgöreŋ angota jiyohot, “Jon O-melun azinöŋ kewö qesim gihibitköra melaim netkiiga kazit, ‘Mem ölöwak azi kamapköra mamböringa göŋön mia akzan me azi kun bian kamapköra mambötpin.’ ”

21 Jisösnöŋ nalö miangöreŋök ambazip gwötpuk uzi kawöl izekwaizek (ijenwajen) aka ömeŋinambuk mi mem ölöwak eŋgiyök aka jegömöl ambazip gwötpuk jeŋini metohoi uba eket.

22 *Jongö gwarek yahötŋan angota qesim waŋgiyohotka kewö melenök, “Yuai eka mötzahori, miangö kösohotŋi mönö anda Jon kewö jiyohot mötma: Jegömöl yeŋön uba eketka lokon yeŋön köna anda kagetka uzikuku yeŋön solanigetka kezapduhup yeŋön keu mötketka kömuget yeŋön guliba wahötketka etqeŋeŋi yeŋöra Ölöwak Buŋa jim asaribiga mörakze.

23 Mewö asuhui eketka kungö uruŋan qahö bölii andö nuŋgumawi, yeŋön mönö simbawoŋ akza.”

24 Mewö jiiga Jongö gwarek yetkön anohotka Jisösnöŋ könahiba Jongö könaŋi ambazip kambu yeŋöra kewö jim asariyök, “Injini gölme qararaŋkölkölŋe miangöreŋ wania ekingöra

* 7:22: Ais 35.5-6; 61.1

anget? Luhutnön jehot uwutapköba metali anjanbanjan ahakzawi, injini azi mewöni ekingöra anget me?

²⁵ “Me wanat yuaia ekingöra anget? Azi malukuñi aködamunjabuk löngöta malöhi, mi ekingöra me? Mötket, ambazip malukuñini kulemñi ek sihimjabuk löngöta anda kaba siyoñsayoñi qahö maljei, mienön mönö kiñ yeñgö jakömbuak miriñine malje. Mi gölme qararañkölkölñe qahö.

²⁶ “Me wanat yuaia ekingöra anget? Kezapqetok azi kun ekingöra me? Ölna, nöñön kewö jibi mötket: Azi ekeri, yañön mönö kezapqetok ambazip tosatñi engoñgita tandökñi kun akza.

²⁷ *Yañgö könani mi mönöwök kewö ohoget ahöza, ‘Mötnön, nöñön kolekni garata kun melaibiga qeljiñe anda ambazip uruñini mindiñgöba göhö könagi mesariga göñön mönö yañgö andöñe gölmenöñ emu geman.’

²⁸ Keu mewö ahözapmö, nöñön kewö jibi mötket: Ambinöhök morö pakpak engömegetka asuhugeri, yeñgö sutñine Jonöñ mönö körek engoñgita qetbuñjabuk kinja. Kinjapmö, Anutugö bemtohoñ uruñe añgota Anutugö qetbuñani miwikñaimakzei, yeñgö sutñine eretñi kondikñi yañön mönö Jon oñgitza.”

²⁹ *Ambazip könagesö pakpak aka yeñgö sutñine takis meme yeñön mohokñe Jongö Buñani mötkeri, yeñön jim kölenja “Aha! Anutugö köna diñdiñi jim asariza,” jiba uruñini melengetka Jonöñ o melun mem engiyök.

* **7:27:** Mal 3.1 * **7:29:** Mat 21.32; Luk 3.12

³⁰ Mewö enġiyökmö, Farisi aka Köna keugö böhi yeñön Anutugö arenġi qahö tem köla Buñañi andö qeba silekmalek aketka Jonöñ o melun qahö mem enġiyök.

³¹ “Ambazip merak gölmenöñ maljei, mi mönö wanatpuk dop al enġibileñak? Yeñgö silikñini mi denöwö?”

³² Yeñön namande ewö akze. Mienön maket sombemnöñ tata keu gön gila lañ qeta kewö jimakze, ‘Nini awölop uinga inġini liñet gwawet qahö unduget. Nini jinġeñ kölinga inġini qahö toroqeba sahötket.’

³³ Mianġö könañi kewö: Jon O-melun azinöñ kaba nene siñgi mala wain o qahö neiga inġini yañgöra jimakze, ‘Öme kunöñ uruñe geiga malja.’

³⁴ “Suep gölmegö azi ölñan kaba nene nem söñgaip aiga eñön jimakze, ‘Mötket, yañön bau numbu tandök közöjeriba wain o gwötpuk nemba takis tilipqilipñinambuk aka bölöñi meme yeñgö alañina malja.’

³⁵ Körek pampak Anutugö mötkutukutu köl guli-makzei, yeñgö ahakmemeñinañgö ölñan mönö mötkutukutuñinan dop köljawi, mi kondelakza.” Mewö.

Siñgisöndok ambinöñ Jisösgö könañi kelök miriyök.

³⁶ Farisi (Köna keugö kapañkölköl) azi yeñgöreñök kunñan Jisös mi nanñi miriñe kaba nene nemapkö köl öröyök. Köl öröi anda miriñe öñgöba nene dumñe tarök.

³⁷ *Taon mianġöreñ siñgisöndok ambi kun malök. Yañön Jisös Farisi azigö mire öñgöba

* **7:37:** Mat 26.7; Mak 14.3; Jon 12.3

tata nene neyöhi, mianğö buzupñi möta kelök umköhöwakñambuk mokoï köt kirin kun kokolak qeyöhi, mi memba öngöba kayök. Kirin mi nöluk tuat-tuat qetñi alabastö mianjön memeña.

38 Öngöba kaba Jisösgö könaje geba tata könahiba sahöri imbilñan tiñgita geba könaje miriyök. Miriiga nörop jupñan kereñ memba kutui öroniiga könaji numbuñan yöhötim namba kelök umköhöwakñambuknöñ miriyök.

39 Miriyökmö, Farisi azinöñ Jisös köl öroyöhi, yañön mi eka uruñan kewö mötmöriyök, “Ambi ki siñgisöndokñambuha. Azi kianön kezapqetok azia malbawak ewö, yañön mönö ambi könaje misi-rizawañgö könaji möt kutubawak.”

40 Jisösnöñ mi möt kutuba kewö melenđa jiyök, “Saimon, nöjön keu kun jimangö mötzal.” Jiiga jiyök, “Böhi, ölop jinöñ mötpi.”

41 Jiiga Jisösnöñ kewö jii mörök, “Ambazip yahötñan benknöñ anda tosa albitkö monen galömñangö qesiyohot. Kunöñ silim 500:kö töwanji (Kina 2500,-), kunöñ silim 50:gö töwanji (Kina 250,-) mianğö dop tosa albitkö qesiyohot. Qesiyohotka mianğö dop etkiyök.

42 Etkiba könangep tosanjiri misimahot jiiga monenjiri qahöwahiga osiyohot. Osiyohotka ben galömñan tosanjiri qeköba kutuba mosöt etkiyök. Mosöt etkiiga yetkörenök danön i uruñan gwötpuk jöpaköm wañgimakza?”

43 Mewö qesiiga Saimonöñ kewö melenñök, “Nöngö mötmötnöñ tosa ketani kutuba mosöt wañgiyöhi, yañön.” Mewö melenñiga jiyök, “Gi keu törörök kewöta jizan.”

⁴⁴ Mewö jiba ambigörej lilingöba kewö jii mörök, “Ambi ki eknöj. Nöjön mirige kotpiga göjön könani saŋgoŋmamgö o kun qahö niŋgizanmö, ambi kianön mönö könani imbilŋan miriba nörop jupŋan kereŋ memba kutui öröniza.

⁴⁵ Göjön numbuni qahö yöhötim nezanmö, ambi kianön mönö mire kotpiga miangörejök kaŋ köla könani yöhötim nempa malja.

⁴⁶ Göjön nöropni kelök kude mirizanmö, ambi kianön mönö kelök umköhöwakŋambuknöj könane nömiriza.

⁴⁷ Miangöra nöjön kewö jibi mötnöj: Anutunöj ambi kiangö siŋgisöndokŋi gwötpuk mi mosöta saŋgoŋniga miangöra uruŋan ni gwötpuk jöpaköm niŋgiza. Kunöj siŋgisöndok boromdökŋi ahiga Anutunöj siŋgisöndokŋi morörökŋi mosöriŋa yaŋön uruŋan borom kun miyök jöpaköm niŋgimakza.”

⁴⁸ Mewö jiba ambi mi kewö jii mörök, “Nöjön göhö siŋgisöndoki saŋgoŋda mosötzal.”

⁴⁹ Mewö jiiga azi mohotŋe nene nempa tatkeri, yeŋön könahiba nanninök kewö jiget, “Siŋgisöndok saŋgoŋda mosötzawi, yaŋön mönö niŋi azia akŋamgö mötza?”

⁵⁰ Mewö jigetmö, Jisösnöj ambigöra jiyök, “Mötnariŋkan mönö amöt qem gihiza. Ölop luainöj anman.” Mewö.

8

Ambi tosatŋan Jisös naŋgöba anget.

¹ Mianğö andöŋe Jisösnöŋ liliköba taonŋi taonŋi aka mirinŋi mirinŋi mianğörenŋ anda Anutugö bem-tohonğö könaŋi jim asariba Ölöwak Buŋa keunöŋ ambazip uruŋini kuŋguba malök. Gwarekurupŋi 12 yeŋön yambuk mohotŋe anget.

^{2*} Mewöyök ambi tosatŋan yambuk anget. Ambi mi mutuk kawöl enğöhöi ömenöŋ kölköljinŋi mem enğii malgetka Jisösnöŋ mem ölöwak enğiyök. Ambi mi kewö: Maria qetŋi kun Magdalagö ambia qetket. Jisösnöŋ yaŋgö uruŋeyök öme 7 közöl enğii kota anget.

³ Ambi kun qetŋi Joana. Yaŋgö apŋi qetŋi Kuza yaŋön kiŋ Herodkö jakömbuak miri mianğörenŋ gawmangö moneŋ galömŋa malök. Ambi kun qetŋi Susana, Yeŋön aka ambi tosatŋi gwötpuk yeŋön nannini moneŋ inapŋinan Jisös aka gwarekurupŋi könanöŋ galöm köla nanğöm enğiget. Mewö.

Qesiŋqesiŋ azigö dopkeu

Mat 13.1-9; Mak 4.1-9

⁴ Ambazipnöŋ taon dop mianğörenöŋk öröba Jisösgörenŋ kaba kambulelebenöŋ tokogetka Jisösnöŋ dopkeu kun kewö jiyök:

⁵ “Azi kunöŋ nene kötŋi qesiŋ gilmamgö anök. Anda qesiŋniga kötŋi tosatŋan köna jitŋe geba kölget. Geba kölgetka ambazipnöŋ tim tökötahögetka könakemba (warawen) neiŋi neiŋi kaŋgota mi nem teköget.

⁶ Kötŋi tosatŋan köt jamönjinöŋ geba kölget. Geba köla mianğörenŋ gölme oŋambuk qahö mi-wikŋaiba korapŋi kota soholiba gororonğöget.

* **8:2:** Mat 27.55-56; Mak 15.40-41; Luk 23.49

7 “Kötņi tosatņan siri uret wahinambuknõņ geba kölget. Geba kölgetka mienõn örörõņ kota engõņgita qem turuba bõbõlohot mem engiget.

8 Kötņi tosatņan gõlme õlõpņe geba kölget. Geba kõla jula wahõta õlņini õlõpņi asuħuba handõtkõ dop ahum sehiget.”

Keu mi jim tekõba qet ketañi kewõ qerõk, “Kunņan urukezapņambuk malja ewõ, yaņõn mõnõ dopkeu ki kezap ala mõt kutuma.” Mewõ.

Jisõsnõņ denõwõgõra dopkeugõ kõnaņi jiyõk.

Mat 13.10-17; Mak 4.10-12

9 Mewõ jiiga gwarekurupņan dopkeu kiangõ kõnaņangõra Jisõs qesim waņģiget.

10 *Qesim waņģigetka jiyõk, “Anutugõ bemtoħõņe aņgota malbingõ keu tõlapņi mi engõra aukņe jibi mõt kutuzemõ, tosatņi yeņgõra mia dop ke-unõņ jibi mõrakze. Mewõ mõta nanņini jeņinan yuai ekagun kõnaņi tõndup qahõ ek kutume. Nanņini kezapņinan keu tõrõrõk mõtagun kõnaņi tõndup qahõ mõt asarime.”

Jisõsnõņ dopkeugõ kõnaņi jiyõk.

Mat 13.18-23; Mak 4.13-20

11 “Dopkeu mianģõ kõnaņi kewõ: Kõt qesiņ ģil-jawi, mi Anutugõreņ Buņa keu.

12 Nene kötņi kõna jitņe geba kölģeri, mi kewõ: Ambazip tosatņan Buņa keu mõtzemõ, mi mõtketka Bõlõņi Toņan kaba uruņini melenģa Suepkõ buņa akepukõra keu kötņi mi uruņineyõk qekõba eņģuaņģirakza.

13 Nene kötņi qesiņniga köt jamõnģiņnõņ geba kölģeri, mi ambazip sõpsõpņi kun. Yeņõn Buņa

* **8:10:** Ais 6.9-10

keu möta mi sösöŋgai qakŋe möt aŋgön kölakzemö, uruŋine geba jalöŋini qahö megeraŋgöra nalö töröptökŋi miyök möt nariba malgetka esape-sapkö nalöŋe mönö tala eŋguma.

14 “Nene kötŋi qesiŋniga siriuret wahiŋinambuknöŋ geba kölgeri, mi kewö: Yeŋön Buŋa keu mötketka uruŋine gezapmö, gölmenöŋ malmalgö waimanjatŋi aka monerŋ inap memegö urukönöpŋi ahuba lömbörim eŋgimakza. Qetbuŋaŋinambuk akingöra köpösöŋgögetka sihim kömbönaŋi bölöŋi tosatŋan mewöyök uruŋine dungöba Buŋa keu böbölohot mem waŋgize. Mewö aiga ölniŋi qahö gilipitŋi akŋe.

15 Qahöpö, nene kötŋi gölme ölopŋe geba kölgeri, mi ambazip kewöŋi: Yeŋön Buŋa keu kezap ala mötketka uruŋini ölopŋi geŋmoŋi qahö miangöreŋ geiga sohobapukö mökösoŋda 8kapan köla galöm kölgetka ölniŋi ölopŋi ölopŋi miwikŋaimakze.” Mewö.

Yuai asa-asambötŋi pakpak mi aukŋe ahuma.

Mak 4.21-25

16 * “Kunŋan lambe me kiwa ohotiriba kim-butnöŋ kude köl turuma me dum bapŋe qahö alma. Mi qahöpö, mi miangö dum qakŋe ali tatma. Tata asariiga tosatŋan miri uruŋe öŋgöbingö mötzei, yeŋön miangö asakŋi eka ölop öŋgöme.

17 * “Mewöŋanök urunine yuai kun asambötket tölapŋe ahözawi, mi mönö aukŋe asuhum tiŋgitma. Yuai kun köl turuin ahözawi, mi mönö lulungetka kötula ahöma.

* **8:16:** Mat 5.15; Luk 11.33 * **8:17:** Mat 10.26; Luk 12.2

18 **“Mianğöra Anutugö keu môtzei, mi mönö urukönömñine ala mötmöriba köl guliba malme. Kunñan mötkutukutuñambuk maljawi, Anutunöñ mönö mi toroqem wangii qarimapmö, kunñan mötkutukutuñi qahö maljapmö, ‘Miambuk maljal,’ jizawi, Anutunöñ mönö mötmötñi moröñi mi mewöyök qeköba wangitma.”* Mewö.

Jisösgö nam-munurupñi.

Mat 12.46-50; Mak 3.31-35

19 Jisösnöñ mewö jiba maliga nam munñan i ekingö kagetmö, ambazip kambu ketanñan ölököba gwözöñgerañğöra kösutñe anbingö osiget.

20 Osiba kingetka kunñan kewö jii mörök, “Göhö nam-mungan mönö yaigep kinda gi gekingö mötze.”

21 Jii mörökmö, Jisösnöñ kewö melenđa jii mötket, “Ambazip ki Anutugö Buña keu möta tem köla köl gulimakzei, mienñön mönö nöñgö namni aka munurupni akze.” Mewö.

Jisösnöñ jiiga raidimbom göröñ qeyök.

Mat 8.23-27; Mak 4.35-41

22 Wehön kunöñ Jisösnöñ gwarekurupñi kewö jii mötket, “Mönö mosöta o añgö kutuba likepñe añgotpin.” Mewö jiiga wangenöñ mohotñe öñgöba o añgö qakñe anget.

23 Anda opo seri möröreñgögetka luhutnöñ nanğöiga angetka Jisösnöñ gaun ahöyök. Ahöiga luhut raidimbom o añgönöñ gila siri kunduriga wangé uruñe geyök. Geba numbuñe qemamgö aiga ayuhubingö aket.

* **8:18:** Mat 25.29; Luk 19.26

24 Ayuhubingö aka gwarekurupnan anda möndöba jiget, “Kembu Ketajamnini, mönö nini anğönöŋ ayuhubingö akzin.” Mewö jigetka imbiŋi möta luhut aka o anğögö siriŋi kewö jim qetal etkiiga ösumŋiran eriga nöŋ qeba ahöyök.

25 Mewö aiga jii mötket, “Enğö mötnariŋiŋi mi denike?” Mewö jiyökmö, yeŋön awöwöliba qem sömbuŋiŋi möta jiget, “Yei, azi kia mönö denöwöŋan malja? Yaŋön mönö luhut aka köwet siri jim kutum etkiiga jitŋi tem köl waŋgizahot.” Mewö.

Ömenöŋ bau uruŋine gegetka azinöŋ ölöwahök.

Mat 8.28-34; Mak 5.1-20

26 Jisösnöŋ gwarekurupŋi yembuk toroqeba opo seri möröreŋgögetka luhutnöŋ naŋgöi anda o anğö kutuba Galili prowins likepŋe Gerasa gölmenöŋ anğotket.

27 Mianğöreŋ anğota saknöŋ öŋgöi azi ömeŋambuk kun mi taonöhök kaba Jisös miwikŋaiyök. Azi mi qaksirinöŋ mala qamöt köteŋi esiba uroro-hoget ahögeraŋgöreŋ ahöm malök. Nalö köröpŋi opo maluku qahö löŋgöta miri kungö uruŋe qahö ahömalök.

28-29 Ömenöŋ nalö köröpŋi öröm ureim waŋgiiga azi gwötpukŋan börö takŋi qeba könaŋi tapepnöŋ (muŋgamuŋga) jöhöba galöm köla malgetmö, tapepŋi öröi tiŋgitŋiŋiriga ömenöŋ kuŋgiiga gölme qararaŋkölkölŋe anda laŋ malök. Mianğöra Jisösnöŋ ömeŋi mi kewö jim kutum waŋgimamğöra ahök, “Öme bölöŋi, gi mönö kota azi ki mosöta anöŋ.” Mewö jimamğö aiga Jisös eka silata gölmenöŋ kösutŋe geba qet gigilahöba kewö qerök, “Aek Jisös, gi Anutu öŋgöŋgöŋaŋgö nahönŋi akzan.

Gi mönö denöwö ak niŋgimangöra ki kazan. Nöñön ulet gihizal: Gi sihimbölö könöpñambuk kude ak niŋginöñ.”

³⁰ Mewö jiiga kewö qesiyök, “Gi qetki niñi?” Ömewöröme gwötpuk uruñe geba malgerañgöra “Qetnini lijön jizin” jiget. Mi nanine keunöñ Kerök kambu ketañi.

³¹ Mewö jiba Jisös kewö ulet wañgiget, “Gi neñguatanğöba öme löm dutñi qahö miangören gebingöra kude jim kutum neñgiman.”

³² Kösutñine kundunji marömñe miangören bau kambu ketañi kun gwözözak uruñe kulunđa malget. Miangöra ömenöñ kewö jiba ulet wañgiget, “Gi ölop jinöñga nini bau miengö uruñine gebin.” Ulet wañgigetka “Mönö anda geget.” Jiba jim kutum enğiyök.

³³ Jim kutum enğiiga azi uruñeyök kota anda bau uruñine geget. Gegetka bau kambu yeñön mönö luhuba nembönembönöñ anda jororongöba o anğönöñ geba nemulahöba kömuget.

³⁴ Mi asuhuiga bau galöm yeñön mi eka taon aka miri morömorö miangören ölöñ unjurata anda keu buzupñi mi jiget mötket.

³⁵ Jiget möta ambazip sesegilgil yeñön yuai asuhuyöhi, mi ekingöra kaget. Kaba Jisösgören kañgota azi uruñeyök ömenöñ kotkeri, yañön könañe tariga miwikñaget. Opo sileötañi törörök jöhöba uruñi amöriiga imbi mötmötñi pakpak asuhuiga eka awöwöliget.

³⁶ Azi ömeñambuk malöhañön denöwö ölöwahöhi, mi jeñinan ekerañön jiget mötket.

37 Mōta gwōtpuk awōwōliba qem sōmbuḡini mōtket. Mianḡōra Gerasa gölmegō ambazip kambu pakpak yeḡōn Jisōsnōḡ engōmosōtmapkōra ulet waḡiget. Ulet waḡigetka liliḡōba anmamḡō waḡenōḡ öḡgōmamḡō ahök.

38 Öḡgōmamḡō aiga azi uruḡeyök ömenōḡ kotkeri, yaḡōn kaba Jisōsbuk mohotḡe anda malmamḡōra qesiyök. Mewō qesiyökmō, Jisōsnōḡ qetala melaim waḡgiba kewō jiyök,

39 “Gi mönō liliḡōba mirige anda Anutunōḡ aḡgōletot ketanḡi ketanḡi ak gihiyōhi, mianḡō kösohotḡi jinōḡga mötme.” Mewō jiiga anda Jisōsnōḡ aḡgōletot ketanḡi ketanḡi ak waḡgiyōhi, mianḡō keuḡi mi taon uruḡe lilikōba miri dop jim sehiyök. Mewō.

Jairusnōḡ bōratḡaḡōra Jisōs köulukōyök.

Mat 9.18-26; Mak 5.21-43

40 Ambazip pakpak Jisōsgō mambōtketka liliḡōba kaiga kambu köla söḡgaiba örōm waḡiget.

41 Köuluk mirigō keu galōm kun qetḡi Jairus yaḡōn kaba Jisōsgō wösōḡe geba simin köla miriḡe kamapkōra köulukōm waḡgiyök.

42 Morōurupḡi qahōpmō, bōratḡi mukmorō mohok yambuḡi (yara) 12:gō dop mala kömumamḡō ahök. Jisōs köl örōm waḡigetka aniga ambazip kambunōḡ likeplikep ölököba utal waḡiget. Mewō.

Kawöl ambi kunōḡ Jisōsgō malukuḡi misiriyök.

43 Utal waḡgiba angetka mianḡōreḡ sutḡine ambi kun malök. Yaḡōn yambu (yara) 12 mianḡō dop köiḡnōḡ ehiga nalō dop kawöl yöhōiga malök. Yaḡōn sile galōm yeḡgō töwaḡini monēḡ inapḡi

pakpak gil maliga sile galöm körekñan mem ölöwakingö osiget.

⁴⁴ Ambi mianñon Jisösgö andöñe anda malukuñangö kitip suni misiriiga mianğoreñök sepñi jöpköyök.

⁴⁵ Jisösnöñ qesiba jiyök, “Dañon nömisiriza?” Mewö jiyökmö, ambazip körekñan mi qañ kölgetka Pitönöñ jiyök, “Ketañamni, ambazip kambunöñ ölököba utal añguba kaba goseize.”

⁴⁶ Jiiga Jisösnöñ jiyök, “Qahö, kunñan nömisiriiga ösumni kun ani mötzal.”

⁴⁷ Mewö jiiga ambinöñ “Könañamni lök asuhuza,” jiba jönömñi unduiga kaba Jisösgö wösöñe simin köla kawöñangö könañi aka misiriba mianğoreñök ölöwahöhi, mianğö könañi aukñe jiiga ambazip kambu körekñan mötket.

⁴⁸ Mötketka Jisösnöñ kewö jii mörök, “Böratni, mötnaripkan mönö mem ölöwak gihiza. Ölop urubönjörnöñ anman.” Mewö.

Jisösnöñ Jairusgö böratñi mem guliyök.

⁴⁹ Keu mewö jiba kiniga köuluk mirigö keu galömñangö mireyök kunñan welen kaba Jairusgöra jiyök, “Böratkan kömuza! Mianğöra böhigö qakñe lömböt toroqeba kude alman.”

⁵⁰ Jiyökmö, Jisösnöñ keu mi möta köuluk mirigö keu galömñi kewö jii mörök, “Keñgötki kude mötman! Mohok-kun akñan. Mönö ni möt narim niñginöñga böratkan ölöwakña.”

⁵¹ Mewö jiba yangö mire anda ambazip tosatñi eñgömosöta Pitö, Jon, Jeims aka morö böratkö iwinamñi iyök eñguanğiri nanñinök miri uruñe öñgöget.

52 Öngögetka ambazip körekñan jingen köla sahöta amburereñ megetmö, Jisösnöñ jiyök, “Yañön qahö kömuzapmö, gaunök ahöza. Mianğöra mönö sahöt mosötme.”

53 Mewö jiiga gönahit ewö aiga “Mönö kömuza!” möta gön köl wañgiget.

54 Gön köl wañgigetmö, bōrat mi bōrōñe memba qeta jiyök, “Bōratni, mönö wahötnöñ.”

55 Mewö jiiga uñañan lilingöiga mianğöreñök wahöta kinök. Kiniga numbu nene wañgiget nemapkö jiyök.

56 Iwinamñan mi eka welipköyohotmö, Jisösnöñ yuai asuhuyöhi, mianğö buzupñi kun jiget mötpepukö songo al enğiyök. Mewö.

9

Jisösnöñ gwarekurupñi 12 melaim enğiyök.

Mat 10.5-15; Mak 6.7-13

1 Jisösnöñ gwarekurupñi 12 mi enğoholi tokogetka ömewöröme pakpak közöl enğimegöra aka uzi kawöl mem ölöwakñegöra kukösumñi ösum-mumuñambuk al enğiyök.

2 Kukösum enğiba kewö jiba melaim enğiyök, “Injini mönö anda Anutugö bemtohoñangö könani ambazip jim asarim enğiba kawöl ambazip mem ölöwak enğiba malme.”

3 *Melaim enğiba jii mötket, “Injini köna an-meangöra yuaini kun qahö memba anme, öröp qahö, gösö qahö, köna nalem qahö, soujeni qahö. Maluku semönñi qahöpmö, mohok meme.

* 9:3: Luk 10.4-11; Apo 13.51

4 “Anda mire denike denike angotmei, mönö miangöreñök mala nup memba taon mi mosöta köna anme

5 Anda mala miri kunöñ angotketka qahö köl öröm engiba keuñini qahö mötketka nesampurekñini mönö kewö jiba kondel engime, ‘Nini engö gölmenöñ kainga sölbuham köna tambönine mekötahözawi, mi mönö tim töñjöraringa nanñine liliñgöba gema.’ Mewö jigetka könañamñini solanñi möt kutugetka ölop taon mi mosöta toroqeba anme.”

6 Mewö jiiga mosöta anda miriñi miriñi liliköba miri dop Ölöwak Buña jim asariba kawöl ambazip mem ölöwak engiba malget. Mewö.

Herodnöñ Jisösgöra lalalulu siksauk ahök.

Mat 14.1-12; Mak 6.14-29

7 *Yuai pakpak asuhuyöhi, miangö qetbuñan sehiba gölme bahöñangö (Galili prowinsgö) kiñ Herodkö kezapñe geiga mörök. Ambazip tosatñan kewö jiget, “Jon O-melun azinöñ mönö kömupnöhök wahöta malja.” Miangöra kiñnöñ keugö jaruba lalalulu siksauk ahök.

8 Ahökmö, tosatñan jiget, “Elaijanöñ kunbuk asuhuba malja.” Tosatñan toroqeba jiget, “Kezapqetok azi walñi yenjöreñök kunöñ mönö guliba wahöta malja.”

9 Mewö jigetmö, kiñ Herodnöñ kewö jiyök, “Jon O-melun azi mi nöñön jibi jölñi kutugetmö, kungö keuñi mewö jiget mötzali, mi mönö dañön?” Mewö jiba Jisös ekñamgö kapan köla jörömqöröm ahök. Mewö.

* 9:7: Mat 16.14; Mak 8.28; Luk 9.19

*Jisösnöŋ azi 5000 nene gumohom enġiyök.
Mat 14.13-21; Mak 6.30-44; Jon 6.1-14*

¹⁰ Melaimelai azi aposol yeŋön Jisösgöreŋ lilingöba yuai aka megeri, miangö kösohotŋi pakpak jiget mörök. Jiget möta enġuangita ambazip qenjarökŋini mosöta taon qetŋi Betsaida miangö kösutŋe nanŋinök kötikŋe malbingö anget.

¹¹ Angetmö, ambazip kambu yeŋön mi möta Jisös andöŋe wuatangöba anget. Anda Jisösgöreŋ kagetka köl öröm enġiba Anutu bemtohoŋangö könaŋi jim asariba kawöl ambazip mem ölöwak enġiyök.

¹² Mewö aka mali wehön jeŋan teköba gemamgö ahök. Mewö aiga gwarek 12 yeŋön kaba Jisös kewö jiget mörök, “Nini gölme kötikŋi kianğöreŋ maljinangöra gi ölop ambazip kambu ki melaim enġinöŋga miri koum dowe dowe tat anjei, miangöreŋ anda ahöahö miri aka nene miwikŋaime.”

¹³ Mewö jigetmö, kewö jii mötket, “Enön mönö nanŋinak i nene gumohom enġime.” Mewö jiiga melenget, “Nini beret sahötŋi 5 aka söra yahöt miyök memba maljin. Mianğöra denöwö akinto? Nini ölop anda ambazip kambu ki pakpak yeŋgöra nene söŋgöroŋi membinak me?”

¹⁴ (Yeŋön azi 5000:gö dop malje.)” Mewö melengetka gwarekurupŋan kewö jii mötket, “Enön mönö ambazip enğöra jiba menden enġigetka kambu dop 50:gö dop nene nemingö tokoba eta tatme.”

¹⁵ Jiiga mewö aka menden enġigetka ambazip körekŋan eta kambuŋi kambuŋi tat anget.

16 Tat angetka beret 5 aka söra yahöt mi memba suepnöñ ui öngöiga kötuetköyök. Kötuetköba beret mindipköba gwarekurupñi enjiiga ambazip kirip dop mendenä sutñine alget.

17 Sutñine algetka körekmakörek nemba nem timbireñ aket. Nene kitipñi kitipñi mosötkeri, mi gwarek yeñön qezakögetka sakap 12 miangören geba kokolak qeyök. Mewö.

Pitönöñ Jisösgö könani jim miwixñaiyök.

Mat 16.13-20; Mak 8.27-30

18 Nalö kunöñ Jisösnöñ nanñök gölme kungen köuluköiga gwarekurupñan yambuk malgetka qesim enjiiba kewö jiyök, “Ambazipnöñ nöngöra denöwö jimakze? Ni niñia akzal?”

19 *Jiiga melenä kewö jiget, “Tosatñan ‘Gi Jon O-melun azia akzan,’ jimakzemö, tosatñan ‘Gi Elaija akzan,’ jimakze aka tosatñan toroqeba kewö jimakze, ‘Gi kezapqetok azi walñi yeñgörenök kunñan kömupnöñök wahöta maljan.’ ”

20 *Mewö jigetka kewö qesim enjiyök, “Aka nanñinak nöngöra denöwö jize? Ni niñia akzal?” Qesim enjiiga Pitönöñ melenä jii mörök, “Gi Anutugören Amötqeqe Tonji Kraist akzan.” Mewö.

Jisösnöñ kömumangö keunji jiyök.

Mat 16.20-28; Mak 8.30-9.1

21 Mewö jiiga könani aukñe jiget kunñan mötpepuköra songo köhöikñi al enjiyök. Mewö.

22 Jisösnöñ jiyök, “Suep gölmegö azi ölnan mönö sihimbölo gwötpuk mötma. Kantrigö jixñememe, jike nup galöm aka Köna keugö böhi yeñön mönö

* 9:19: Mat 14.1-2; Mak 6.14-15; Luk 9.7-8 * 9:20: Jon 6.68-69

andö qeba qegetka kömuma. Kömumba wehön karöbut aiga kömupnöhök wahötma.” Mewö.

Kraist wuatängöbingö söngöröji

²³ *Jisösnöŋ ambazip pakpak yengöra keu kewö jii mötket, “Kunŋan nöngö andöne nuatängöba kamangö mötzawi, yaŋön mönö nanŋi urusileŋangö sihim kömbönaŋi bölöŋi andö qeiga sisitŋi megetka sihimbölö mi bisimakŋa. Mi maripomnöŋ kömumawaŋgö dop mököstönda ni nuatängöba kama.

²⁴ *“Kunŋan malmalŋi nanŋangöra aŋgön köla nanŋi imbi-imbi maljawi, yaŋön mönö malmalŋi ölni jöhöi sohoma. Sohomapmö, kunŋan gölmegö malmalŋi nöngöra aka köleŋda tököm niŋgimawi, yaŋön mönö malmal ölnangö könaŋi miwikŋaiba köhöiba malma.

²⁵ “Kunŋan gölmeŋi gölmeŋi miengö öroyuaini pakpak köl öroiga buŋaŋi an teköiga uruŋangö malmalŋi mem sohoba silebile mala kömuiga Anu-tunöŋ keuŋi jim teköiga könöp sianöŋ geba uŋaŋan ayuhuiga qahö dop kölma. Sukinapŋi mianöŋ mönö urusöstöŋgai qahö ak waŋgima. Qahöpmahöp!

²⁶ “Kunŋan nöngö qetni aka Buŋa keuni memba eta aljawi, i Suep gölmegö azi ölnan mewöyök ehöröŋ kölma. Yaŋön könaŋgep Suep garata töröŋi yembuk ki etketka yengö, nanŋangö aka Iwiŋangö asakmararaŋini eka aurume. Nalö miangöreŋ azi me ambi mewöŋi mönö ehöröŋ köl waŋgima.

²⁷ Nöŋön keu ölni kun kewö jibi mötme: Kiangöreŋ kinjei, engö sutŋineyök tosatŋan

* 9:23: Mat 10.38; Luk 14.27
12.25

* 9:24: Mat 10.39; Luk 17.33; Jon

Anutugö bemtohoŋan asuhumawi, mi ek kutume. Jebuk mala kömupkö sihimbölöŋi qahö mötketka asuhum tingiriga mi ekŋe.” Mewö.

Jisösgö sileŋe letotqetot ahök.

Mat 17.1-8; Mak 9.2-13

28 *Keu mi jiiga wehön 8:kö dop teköiga Jisösnöŋ Pitö, Jon aka Jeims enŋuangita kundunje öŋgöba Anutu köuluköyök.

29 Köuluköiga miangören jemesoholŋangö kaisoŋgolomŋan letota tandökŋi murutŋi ahök. Malukuŋan tuat lalamŋi aka kölkölbilikbilikŋambuk asariyök.

30 Miangörenök eketka azi yahötŋan asuhuba Jisösbuk keu keu jiget. Mi Moses aka Elaija.

31 Asakmararaŋ uruŋe asuhuba Jisösbuk keu kewö eraum mötket, “Anutunöŋ Jisös sihimbölö möta kömumapkö melaiiga eta zilaŋ Jerusalem sitinöŋ aniga areŋ miangön ölnambuk ak teköma.”

32 Mewö eraum mötketmö, Pitönöŋ alayahötŋi yetpuk jeŋinan lömböriiga gaun ahöget. Ahögetmö, gaunöhök imbiŋini möta jeŋini uba Jisösgö asakmararaŋi aka azi yahöt yambuk kinohori, mi engeketa.

33 Engeketa kinda Jisös mosötpitkö ahotka Pitönöŋ Jisösgöra jiyök, “Ketaŋamnini, neŋön kiangören uru ölöwak mötzin. Miangöra neŋön ölop koum karöbut qebin: Göhö kun, Mosesgö kun aka Elaijagö kun.” Pitönöŋ mewö jiyökmö, nannŋi keuŋangö könaŋi mi qahö möt kutuyök.

* 9:28: 2 Pitö 1.17-18

34 Mewö jiba kiniga unuñunuñ kunöñ eta aumñan esuhum enjiiga kousu uruñe mala awöwöliba jönömñini unduyök.

35 *Jönömñini undui kingetka kousu uruñeyök qet kun kewö eriga mötket, “Azi ki mi nani nahöna. I ambazip amöt qem enjimamgöra möwölöhöm wanjal. Mönö yangö keuñi möta malme.”

36 Qet mianñon eri möta gwarek yeñon mianğoreñök uba Jisösnöñ nanñök kini eket. Kunduñe yuai ekeri, mianğö buzupñi mi nalö mianğoreñ kude jiba keu bök malgetka kunñan kun qahö mörök. Mewö.

Jisösnöñ öme wuatañgöi morönöñ ölöwahök.

Mat 17.14-21; Mak 9.14-29

37 Ahöba wahötketka Jisösnöñ gwarekurupñi karöbut yembuk kunduneyök eta sörokñe ambazip kambuleleme engeget.

38 Engegetka ambazip kambunöhök azi kunñan qeta kewö jiyök, “Böhi, nöngö nahöni mukmoröya akzawanğöra mönö kaba i ekñan. Mianğöra köuluköm gihizal.

39 Mötnöñ, öme kunöñ i memba mendawöli mianğoreñök qet gigilahöi utuköm wanji wölöhariiga numbuñeyök qölqölsöutsöt erakza. Öme mianñon öröm ureim wanğiba nalö gwötpuk qahö mosörakza.

40 Mewö aiga göhö gwarekurupki öme mi wuatañgömegö ulet enğizalmö, yeñon mi osize.”

* 9:35: Ais 42.1; Mat 3.17; 12.18; Mak 1.11; Luk 3.22

⁴¹ Mewö jiiga Jisösnöŋ melenŋ waŋgiba jiyök, “Yei, gölmegö yaŋgiseŋ aka misimkaulup ambazip, nöŋön mönö nalö dawik embuk mala qatön eŋgubiga Anutu qahö möt narigetka sihimbölö mötmam? Nahöŋgi mönö waŋgita ki kanöŋ.”

⁴² Morö mi waŋgita kaiga nalö miangören mewöyök ömenöŋ morö utuköba urepköm waŋgiiga wölöhariyök. Mewö ahökmö, Jisösnöŋ öme mi jim waŋgii mosöri morö mem ölöwaka iwiŋi waŋgiyök.

⁴³ Anutugö kukösumŋi ketanŋan mewö asuhuiga körekŋan mi eka nemböŋini teköi welipköget. Mewö.

Jisösnöŋ kömumamgö buŋaŋi jiiga yahöt ahök.

Mat 17.22-23; Mak 9.30-32

Jisösnöŋ yuai pakpak mi meyöhi, miangöra ambazip körekŋan welipkögetka Jisösnöŋ nalö miangören gwarekurupŋi keu kötŋi kewö jii mötket,

⁴⁴ “Keu ki mönö kezap ala mötme: Anutunöŋ Suep gölmegö azi öŋi mi gölme ambazip yeŋgö böröŋine al waŋgii gema.”

⁴⁵ Keu kötŋi mi jii mötketmö, mi qahö möt kutuget. Anutunöŋ mi köl turui tölapŋe ahöiga mi qahö möt asariget aka könaŋi denöwö, mi qesib-ingö kölköldömdöm aket. Mewö.

Gwarek sutŋine danön mutukŋi akza?

Mat 18.1-5; Mak 9.33-37

⁴⁶ *Gwarek neŋgörenök ‘Danön öŋgöŋöŋi akza?’ jiba keu mi mötmöriget.

* **9:46:** Luk 22.24

47 Mi mötmörigetmö, Jisösnöŋ urumötmötŋini möt kutuba namande moröŋi kun memba qöhöröŋe ali kinök.

48 *Kiniga kewö jii mötket, “Körek engörenök kunŋan eretŋi kondökŋi akzawi, yaŋön mönö öngöngöŋi akza. Mianğöra kunŋan namande ki nöŋgö qetne miriŋe köl öröba köyan kölmawi, yaŋön mönö ni köl öröm niŋgima. Kunŋan ni köl öröm niŋgimawi, yaŋön melaim niŋgiyöhi, mönö i mewöyök köl öröm waŋgima.” Mewö.

Kunöŋ keröki qahö, yaŋön mönö alagi akza.

Mak 9.38-40

49 Nalö mianğöreŋ Jonöŋ könahiba keu kewö jiyök, “Ketaŋamni, azi kunŋan göhö qetnöŋ öme közöl enğiiga ehin. Yaŋön nembuk qahö liliköba maljawaŋgöra nini i qetal waŋgiin.”

50 Mewö jiyökmö, Jisösnöŋ kewö jii mörök, “I kude qetal waŋgime. Kunŋan qahö qetal engimakzawi, yaŋön mönö engö arenöŋ malja. (Mianğöra iŋini mönö nöŋgö alaurupni tosatŋi mi qetala aŋgösirip mem engibepuk.)” Mewö.

Samaria miri kun yeŋön Jisös andö qeget.

51 Jisösnöŋ Suepnöŋ öngömamgö ahök. Mianğö nalöŋi törizawaŋgöra Jisösnöŋ kinda “Jerusalem sitinöŋ anmam,” jiba jim köhöiba könahiba könanöŋ anök.

52 Anda kolek qeljiŋe aliga mutuk anget. Könanöŋ anda mala Samaria prowinsgö miri kunöŋ aŋgota “Jisösgöra mözöqözözöm akingöra kazin,” jiget.

* 9:48: Mat 10.40; Luk 10.16; Jon 13.20

53 Jiba angetka anökmö, “Ni Judia prowinsnöñ Jerusalem jike göröken anmam” jiiga mianğöra miri anğön köla yaizözkök qahö jiget.

54 *Mewö aketka gwarekyahöñi Jeims aka Jon yekñön mi eka jiyohot, “O Kembu, Suepnöhök könöp eta enğohoi qahöwakeak, mewö köuluköbingö mötzan me qahö?”

55 Mewö jiyohotmö, Jisösnöñ lilingöba tembula jim etkiyök.

56 Mianğöreñök toroqeba miri kunöñ anget. Mewö.

Jisös wuatangöbingö möndömöndö keunji

Mat 8.18-22

57 Könanöñ angetka azi kunñan kaba Jisösgöra jiyök, “Gi denike denike anmani, nöñön mönö mianğöreñ gi guatangöba kamam.”

58 Mi möta Jisösnöñ kewö jii mörök, “Arökñangö kiam yeñön köteñine ahögetka könakemba nei yeñön aipñini memba malakzemö, Suep gölmegö azi ölñan mönö denike anda nöropñi wani qömböñnöñ nariba luhut membawak.”

59 Jisösnöñ azi kungöra jiyök, “Gi kaba ni nuatangöman.” Jiyökmö, kewö melenök, “Kembu, mi ölöpmö, iwinan kömumangö aiga mutuk jinöñga anda galöm kölbi kömui löm kölbigun.”

60 Mewö jiyökmö, Jisösnöñ melenđa jiyök, “Mosötnöñ! Köhömuñi yeñön qamöñini köhömuñi mi ölop löm kölmemö, göñön mönö anda Anutu bemtohoñangö könañi jim asarim enğiba malman.”

* 9:54: 2 Kiñ 1.9-16

61 *Kunbuk azi kunŋan kaŋgota jiyök, “Kembu, nöŋön gi guataŋgömamgö sihimni mötzalmö, mötnöŋ, gi ölop jinöŋga mutuk mire anda tinitosolomurupni yaizökzökŋini jibigun.”

62 Jiyökmö, Jisösnöŋ meleşnök, “Kunöŋ gölme mesinmesinö kinöŋ mi hos andöŋe jöhöba böröŋan kinöŋ supŋe memba kini aniga dumŋe lilinöba andöŋe uzawi, yaŋön mönö Anutugö bemtohoŋnöŋ aŋgota nupŋi memawaŋgö dop qahö akza.” Mewö.

10

Jisösnöŋ gwarek 72 melaim enŋii anget.

Mat 9.37-38; 10.7-16

1 Mianö andöŋe Kembunöŋ gwarek tosatŋi 72* mi möwölöhöm enŋiyök. Nanŋak “Taonŋi taonŋi mirinŋi mirinŋi anmam,” jiba mianöŋen yahöt yahöt meköba mutuk melaim enŋiyök.

2*“Melaim enŋiman,” jiba kewö jii mötket, “Anutugö nupnöŋ nene ölni gwötpuk öliba ahözapmö, mi tokobingöra nup meme ambazip nini awamdökŋi maljin. Mianöŋora mönö nene öliölinöŋgö Kembunŋi köuluköm waŋigetka nup meme ambazip melaim enŋiiga ölni mem tokome.

3*“Inini mönö anme. Mötket, lama yeŋön arökŋaŋgö kiam kalŋi yeŋgö sutŋine gegetka luhuba enŋöhöbepuk, nöŋön inini mianöŋ tandök ewö melaim enŋibi anme.

* **9:61:** 1 Kin 19.20 * **10:1:** Tosatŋan oyoŋda 70 jize. Tosatŋan 72 jize. * **10:2:** Mat 9.37-38 * **10:3:** Mat 10.16

4 *Injini monej irimunga me gösö kun me köna esu mi kude memba anme. Anda könanöj ambazip engeka jiji-kilik-kilik yaizözkök kude akne.

5 “Anda miri kunöj öngöba mutuk kewö jime, ‘Anutunöj miri kiangörenj luai ali bönjöj malme.’

6 Mewö jigetka kunjan luai anjon kölmangö dop akzawi ewö, luaininan mönö yangö qakne öngömapi, kunjan mi qahö anjon kölma ewö, luaininan mönö lilingöba nanjini qaknine öngöma.

7 *Miri öngömei, mönö miangörenök mala nup meme. Ambazipnöj nup meme ambazip malmaljini nangömeangö dop akze. Miangöra yejon nene aka o enjime, mi mönö neme. Miri tosatje lajla kude ahöme. Miri suen kude anda kame.

8 “Taon miangörenj me miangörenj angotketka köloröba nene enjime, mia mönö neme.

9 Nemba tosatjan miangörenj kawöl engöhöi ahömei, i mönö mem ölowak enjime. Mewö aka kewö jiget mötme, ‘Anutugö bemtohan mönö dowe kaiga miangö uruje angotme.’

10 *Mewö aknemö, taon kunöj angotketka andö enjumei, miangörenj mönö maketnöj me sombennöj anda kewö jiget mötme,

11 ‘Nini enjö taonöj kainga sölbuham yuai köna tambönine mekötahözawi, mi mönö tim tönjöraringa nanjine lilingöba gema. Gemapi, keu ki mönö möt yaköme: Anutugö bemtohan mönö kösutjine asuhuza.’

12 *Nöjön kewö jibi mötket: Anutunöj nalö

* **10:4:** Mat 10.7-14; Mak 6.8-11; Luk 9.3-5 * **10:7:** 1 Kor 9.14; 1 Tim 5.18 * **10:10:** Apo 13.51 * **10:12:** Jen 19.24-28; Mat 11.24; 10.15

ketan̄e qemasolokep̄ninaᅅgö likep̄ni melen̄ni taon miangö qak̄ne öᅅgömawi, dop̄ miangön mönö Sodom yeᅅgö sihimbölo dop̄ni oᅅgita toroqem eᅅgima.”†

Jisösnöᅅ taon 3 yeᅅgöra ‘Yei wösöbirik!’ jiyök.

Mat 11.20-24

13 **“O Korazin ton̄i, nöᅅön eᅅgöra ‘Yei!’ jiba sahötzal aka Betsaida ton̄i, eᅅgöra mewöyök ‘Yei!’ jiba sahötzal. Nöᅅön yeᅅgöreᅅ anbiga keuni jibi sösonihii angöletotni kukösumᅅinambuk asuhugetmö, uruᅅini töndup qahö melen̄get. Angöletot mi kian gölmenöᅅ Taiö aka Saidon sitinöᅅ asuhubeak ewö, yeᅅön mönö nalö köröp̄ni uruᅅini melen̄bingö kaisösöp̄ni kondela dodohonöᅅ angömiriba kau ariba sahötpeak.*

14 *“Sahötpeakmö, Anutunöᅅ könaᅅgep̄ Korazin aka Betsaida yeᅅgö keuᅅini jim teköba likep̄ni melen̄ni sihimbölo mötmei, nalö ketan̄i miangöreᅅ mi mönö Taiö aka Saidon yeᅅgö sihimbölo dop̄ni oᅅgita mötme.*

15 **Aka Kaperneam ton̄i, Anutunöᅅ iᅅini ölop̄ mem wahöt eᅅgii Suep mire öᅅgöbeak me qahöpto? Qahöp̄mahöp̄! Iᅅini mönö kömupkö senjom mire kölölohoba geme.*

16 **“Kunᅅan keuᅅini mötmawi, yaᅅön mönö nöᅅgö keuni mötma. Kunᅅan andö eᅅgumawi, yaᅅön mönö ni andö nuᅅgumap̄mö, kunᅅan ni*

† **10:12:** Sodom yeᅅön bölöᅅni kanjamᅅambuk memba mala uruᅅini qahö melen̄getka Anutunöᅅ könöpnöᅅ könderᅅ eᅅgiyök. * **10:13:**

Ais 23.1-18; Eze 26.1-28.26; Joel 3.4-8; Amos 1.9-10; Zek 9.2-4

* **10:15:** Ais 14.13-15 * **10:16:** Mat 10.40; Mak 9.37; Luk 9.48; Jon 13.20

andö nunğumawi, yañön melaim niñgiyöhi, mönö i andö qema.” Mewö.

Gwarek 72 yeñön lilingöba söñgaiget.

17 Gwarek 72‡ yeñön mala lilingöba kaba söñgaiba kewö jiget, “Kembu, nini göhö qetke öme wöröme jim kutum enğıinga yeñön mewöyök keunini bapñe anda tököba anget.”

18 Mewö jigetka Jisösnöñ melenñök, “Nöñön Satan kakögetka Suepnöhök luhuba wölbilik ewö aköba gei ehal.

19 *Mötket, nöñön kukösum enğıbiga inini ölop kitim soramen, skorpion (nendañ kömbukñi pomemba) aka kerökninañgö ösum-mumuñi jitrñambuk pakpak tiget eriga luhut alme. Mianğöra yuai kunñan qahö enğum mizit ak enğima.

20 “Mianğöra ömewöröme yeñön keuñini bapñe anjemö, töndup enğöreñ sösongai bohonñi mi mianğöra kude söñgaime. Enğö qetñini Suep mire ohoget Anutugö bukñöñ ahözawi, mianğöra mönö önöñi qahö söñgaime.” Mewö.

Jisösnöñ söñgaiba Anutu möpöseiyök.

Mat 11.25-27; 13.16-17

21 Nalö mianğöreñ Uña Töröñan Jisös inahöm wañgiiga söñgaiba keu kewö jiyök, “O Iwini, göñön Buña keugi mötkutukutu ambazip mötmöt ketañi megeri, yeñgöreñ asambötnöñmö, ambazip nahönbörat ewö nanninañgöra mötketka gukmaulem akzei, mi mönö yeñgöreñ indelnöñga möt asarize. Mianğöra nöñön Suep gölmegö

‡ **10:17:** Tosatñan oyoñda 70 jize. Tosatñan 72 jize. * **10:19:** Sum 91.13

Kembunji gi möpöseim gihizal. O Iwini, gi nangak mewö asuhumapköra mötnöŋ dop köli ölöwahök.

22 **“Iwinan mönö yuai pakpak jim kutuiga nöŋgö buŋaya ahök. Iwinan Nahönŋaŋgö könaŋi nanjök möt yaköiga kunjan mi qahö mötza. Mewöyök kunjan Iwiŋaŋgö könaŋi qahö möt yaköiga Nahönjanök mi mötza aka ambazip möwölöhöm eŋgiba yeŋgöra mi indelmawi, yeŋön mönö Iwi möt waŋgime.”*

23 Jisösnöŋ mewö jiba gwarekurupŋi yeŋgöreŋ liliŋgöba nanŋinök ölöŋ kewö jii mötket, *“Injini yuai ek kutuzei, denike yeŋön mi ek kutuzei, yeŋön mönö jeŋinaŋgöra aka simbawoŋ akze.*

24 Miangö könaŋi kewö: Nöŋön keu kewö jibi mötket, Kezapqetok ambazip aka kiŋ azi kembu gwötpukŋan injini yuai ki ekzei, mi ekingö awöweŋgöba malgetmö, mi qahö eket. Injini keu ki mötzei, yeŋön mi mötpingö awöweŋgöba malgetmö, mi qahö mötket.” Mewö.

Jöjopaŋ keu bohonŋi yahöt mi denöwö?

Mat 22.34-40; Mak 12.28-31

25 **Köna keugö böhi kunjan wahöta Jisös bötak ala kewö qesim waŋgiba jiyök, “Böhi, nöŋön denöwö aka malmal kömbönaŋi teteköŋi qahö buŋa qem aŋgubilenjak?”*

26 Jiiga Jisösnöŋ kewö melenja qesiyök, *“Mosesgö Köna keunöŋ keu denöwö ohoget ahöza? Miangö könaŋi denöwö?”*

27 **Qesiiga melenja jiyök, “Gi urugi jömukŋi, uŋagi jömukŋi, kuki jömukŋi aka mötmötki jömukŋi*

* **10:22:** Jon 3.35; 10.15 * **10:25:** Mat 22.35-40; Mak 12.28-34

* **10:27:** Lew 19.18; Dut 6.5

mianjon mönö Kembu Anutugi jöpaköba malman,' aka 'Nangi jöpaköm anjumakzani, mewönanök mönö ambazip pakpak jöpaköm engiba malman.' "

²⁸ *Jiiga Jisösnöñ melenök, "Törörök melenjan. Mi tem köla malmal kömbönananjö buraya akñan."

²⁹ Mewö melenökmo, Köna keugö böhinöñ 'Mi tem köla solanji akzal,' mewö mötmöriba könananji kondelmangö möta Jisösgöra jiyök, "Ambazip sutñine mala korali, yengörenök mönö dagöra jizan? Ninia qahö jöpaköm wanjibilenak?"

Samaria azinöñ gurusep azi ak-kömum wanjiyök.

³⁰ Mewö jiiga Jisösnöñ melenja jiyök, "Azi kunjan Jerusalem siti mosöta Jeriko mire geba könanöñ kegwek-kahasililij yengö böröñine gei meget. Memba inap yuaini wanjita oponji qeköba gurusep qeba gila angetka kömumangö aka ahöyök.

³¹ Ahöba mambörija jike nup galöm kunjan köna miyök anda eka ek siriba köna likepñeyök anda onjita anök.

³² Aniga mamböri jike nup azi (Liwait) kunjan miangören kanjota eka mewönanök ek siriba onjita anök.

³³ *Anökmö, Samaria prowinsgö aziş kunjan köna miyök anda ahöyöhi, miangören anjota eka wösöñi möta ehoriyök.

³⁴ "Ehoriba kösutñe geba uziñi kelök aka wain onjan miriba esuhuyök. Uziñi esuhuba memba kököbihiba donjini qakñe ala wanjita qenjarök ahöahö mire anda ala köyan köl wanjiyök.

* **10:28:** Lew 18.5 * **10:33:** 2 Hist 28.15 § **10:33:** Juda yenjon Samaria ambazip jijiwilit ak enjizema.

35 Köyan köl waŋgiba ahöba wahöta söŋanök silim yahötkö töwaŋi (Kina 10,-) uzeta qenjarök mirigö toŋi waŋgiba jiyök, ‘Azi ki mönö köyan köl waŋgiba malnöŋga moneŋ gihizali, mi kude dop köla oŋgitma ewö, mi mönö lilingöba kaba miangöreŋ toroqeba gihimam.’

36 Azi karöbut könaŋamŋini mewö kondelget. Azi kegwek-kahasiliŋ yeŋgö böröŋine geyöhi, yaŋgö alaŋi daŋön ahök? Yeŋgöreŋök dagöra mötnöŋ, i uru kalem ak waŋgiyök?”

37 Qesim waŋgiiga melenök, “Ak kömum waŋgiyöhi, yaŋön.” Mewö meleniga Jisösnöŋ jii mörök, “Gi mönö anda mewöŋanök aka malman.” Mewö.

Jisösnöŋ Marta Maria yetpuk kujuk tarök.

38 *Jisösnöŋ gwarekurupŋi yembuk könanöŋ angetka Kembuŋinan miri kunöŋ aŋgorök. Aŋgoriga ambi kun qetŋi Marta yaŋön köl öröm waŋgii miriŋe öŋgöyök.

39 Martagö munŋi qetŋi Maria malök. Yaŋön Kembu eka könaŋi kösutŋe eta tata Buŋa keu jiyöhi, mi kezap ala mörök.

40 Mörökmö, Martanöŋ lömbuaŋ nupnöŋ öröi anda kaba mökösusu aka Jisösgöra jiyök, “Kembu, munan nömosöri nanök welen nup membi mötnöŋ dop kölja me qahö? Miangöra mönö Maria jinöŋga kaba bauköm niŋgima.”

41 Jiiga Kembunöŋ melennda jii mörök, “Marta Marta, gi yuai könaŋi könaŋi miangöra waimanjat möta mötkurumkurum aka könöpŋambuk aka kinjan.

* **10:38:** Jon 11.1

42 Mewö kinjanmö, waimanjat mohok kun memba mem köhöininga dop kölma. Nini yuai sehisehini mianğöra qahö osizin. Marianöŋ kewöta urugö likepŋi möhamgöm anğumamgö möwölöhöba simbawoŋ akza. Malmalgö bahöŋi ölopŋi mi kunjan kun kude wanğitma.” Mewö.

11

Jisösnöŋ köulukö könaŋi kusum enğiyök.

Mat 6.9-13; 7.7-11

¹ Jisösnöŋ miri kunöŋ köuluköba mali teköiga gwarekurupŋi yeŋğöreŋök kunjan kewö jiyök, “Kembu, Jon O-melun azinöŋ gwarekurupŋi köulukö könaŋi kusum enğiyöhi, gi mönö mewöŋanök nini kusum neŋgiman.”

² Jiiga Jisösnöŋ kewö jii mötket, “Injini köuluköbin jiba kewö jime:

Iwi, göhö qetkan mönö töröŋi ahöma. Mönö galöm köl neŋginöŋga bemtohoŋgahö ölni asuhuma. (Göhö jitsihitki Suepnöŋ tem kölakzei, gölmenöŋ mönö mewöŋanök asuhuma.)

³ Gi wehön dop nene dopnine neŋgiman.

⁴ Tosatŋan bölöŋi ak neŋgigeri, nini körek yeŋğö siŋgisöndokŋini mosötzin ewö, gi mönö neŋğöreŋ siŋgisöndok saŋgoŋ neŋgiman.

Gi esapesapnöŋ eta neŋgubapuköra anğön köl neŋgiba Bölöŋi Toŋaŋgö böröŋeyök meköm neŋgiman.”*

⁵ Jisösnöŋ toroqeba kewö jii mötket, “Enğöreŋök kunjan suŋgem bibiŋe alaŋaŋgö mire anda

* **11:4:** Tosatŋan keu mi kewö melenđa jimakze: bölöŋeyök meköm neŋgiman.

möndöba kewö jima, ‘Alani, beret karöbut niŋginöŋga likepŋi bian melen gihibi.

⁶ Alani kunŋan könanöŋ mala nöŋgöreŋ kaŋgoriga nenenamni qahöpköra gumohom waŋgimamgö jaruzal.’

⁷ Mewö jii alañan miri uruŋeyök kewö melen da jima, ‘Gi gaun gwölö ak nengizan. Ni naŋguŋi lök köl köhöibiga nahönböraturupnan nömbuk tumbulahöpnini tumbula gaun ahözin. Miangöra wahöta mi gihimamgö osizal.’

⁸ Mewö jimapmö, nöŋön jibi mötket: Miri toŋan alaŋi akzawaŋgöra aka qahö wahöta waŋgimapmö, mi töndup kapaŋ köla jiba kinjawaŋgöra mi ölop wahöta qesizawaŋgö dop körek waŋgima.

⁹ “Nöŋön miangö likepŋi kewö jibi mötket: Mönö Anutu köuluköme. Köulukögetka engima. Anu-tugöreŋ mönö yuaigö böröjaŋ memba jarume. Mi jarugetka kondeliga miwikŋaime. Kinda naŋgunöŋ qeme. Qegetka naŋgu tal engima.

¹⁰ Kunŋan Anutu köulukömakzawi, yaŋön mönö likepŋi buŋa qem aŋguma, yuaigö jarumakza-waŋön mönö mi miwikŋaima. Naŋgunöŋ qemakza-waŋgöra mönö naŋgu öröm waŋgima.

¹¹ “Iwiurup engöreŋök daŋön kewö akza: Nahönŋan söragöra qesiiga salupŋe qatö waŋgima.

¹² me kuruk kötnaŋgö qesiiga skorpion (nendan kömbukŋi pomemba) waŋgima?

¹³ Mewögöra iŋini ambazip bölöŋi akze aka töndup kalem ölopŋi ölopŋi mi nahönböraturupŋini engibingö mötze ewö, Suep Iwinöŋ mönö kalemŋi denöwö aŋgön kölbawak? Yaŋgö uruŋaŋgö ahakmemeni mi neŋgoŋgita tandökŋi kun akza.

Miangöra Uña Töröñangöra köuluköba qesim wangime ewö, yañön mönö sihimñan i melaiiga uruñine gema.” Mewö.

Jisösnöñ öme yeñgö ösumñini onñgita qei etza.

Mat 12.22-32; Mak 3.20-27

¹⁴ Ömenöñ azi kun töñöt aka numbuñi jöhöiga mötök maliga Jisösnöñ ömenji mi wuatangöiga kota mosöri nesilamñan lolohoiga kunbuk keu jiyök. Keu jiiga ambazip kambu yeñön mi eka welipköget.

¹⁵ *Welipkögetmö, yeñgöreñök tosatñan kewö jiget, “Yañön mönö öme yeñgö kembuñini Katakömulat yañgö ösumnöñ ömewöröme enñguatangömakza.”

¹⁶ *Mewö jigetka tosatñan Jisös keugö bötaknöñ örömapköra esapköm wangiba kewö qesiget, “Gi mönö jim kutunöñga Suepnöhök angöletot kun asuhuiga ekin.”

¹⁷ Qesigetmö, yañön uru mötmötñini möt teköba kewö jii mötket, “Kantri denike yeñgö galömurupñinan sutñine angururuk aka julmei, yeñön mönö ayuhum angugetka kantriñinan böliba sahopñanök ahöma. Mewöyök miri kungö könagesö yeñön julmei, miriñinan mönö qeçelanñan ahöma.

¹⁸ “Mötket! Satangö könagesö yeñön mewöyök sutñine angururuk aka julbeak ewö, yeñön mönö gawman nupñini memingö osigetka ömetohonñan mönö denöwö kinbawak? Inñini

* **11:15:** Mat 9.34; 10.25 * **11:16:** Mat 12.38; 16.1; Mak 8.11

nöngöra kewö jize: Yañön Katakömulatkö ösumnöñ ömewöröme enğuatañgömakza.

19 Mewö jizemö, mötket, nöñön Katakömulatkö ösumnöñ ömewöröme közöl enğibileñak ewö, enğö alaurupñinan mönö dagö ösumnöñ mi közöl enğibeak? Miangöra yeñön mönö keuñini ölni me qahö, mi kewöta jim teköme.†

20 Mi jim tekömemö, Anutugö ösumñan nöngö börö kesötni sölölohöi öme enğuatañgömakzal ewö, Anutugö bemtohoñan mönö enğöreñ kam kuñguza.

21 “Azi köhöikñan timbi liñgiñambuk miri gölmeñi galöm meiga sukinapñan mönö kahaimök ahöma.

22 Mewö ahömapmö, azi köhöikñi kötökñan luhuba kaba qeba luhut al wañgiba timbi liñgiñi nariyöhi, mi körek wañgita qezañda sukinapñi memba anda alaurupñi mendeñ enğima.

23*“Kunñan nömbuk qahö maljawi, yañön mönö qetal niñgimakza. Kunñan ambazip nöngö qetne tokomegöra qahö öröm enğimakzawi, yañön mönö mendeñ enğimakza.” Mewö.

Öme yeñön azi uruñe liliñgöbingö kapan kölje.

Mat 12.43-45

24 “Ömenöñ azi uruñeyök kota gölme qararañkölkölñe anda lañ liliköba mala luhut memangö miri jaruba kun qahö miwikñaiba

† **11:19:** Nannini sile galömurupñinan Anutugö qetñi qeta töndup öme mi Katakömulatkö kukösumnöñ közöl enğigetka nöñön mi Anutugö ösumnöñ közöl enğimakzal. Öroröñ qahö kinjinañgöra dañön ölni aka dañön keu muneñi wuatañgömakzawi, mi ambazipnöñ kewöta jim teköme. * **11:23:** Mak 9.40

ölan yöhöiga kewö jima, ‘Mirini mosöta kazali, miangörej mönö kunbuk lilingömam.’

²⁵ Mewö jiba lilingöba miriņi usuņda meņölöi ahöyöhi, mi mewöņanök ahöi miwikņaima.

²⁶ Mewö miwikņaiba anda öme tosatņi 7 eņguanņitma. Öme 7 mi nanņi oņgita bölöņi kötökņi akze. Yaņön mi eņguanņiriga kaba miri mi öņgöba miangö uruņe malme. Mewö aiga azi miangö könaņi mutuk kileņkileņ ahökmö, könaņep bölim qölim teköma.” Mewö.

Denike yeņön simbawoņ akze?

²⁷ Jisösnöņ keu mewö jiba mali ambazip kambu sutņineyök ambi kunņan qeta Jisös kewö jii mörök, “Gömokni, ambinöņ gölöm ala gömimba juzu gumohom gihiyöhi, nöņön yaņgö mötņi simbawoņ akza.”

²⁸ Mewö jiyökmö, Jisösnöņ kewö melenök, “Mi jizanmö, nöņön kewö jimam: Ambazip Anutugö keugöra kezap ala möta tem köla köl gulimakzei, yeņön mönö simbawoņ akze.” Mewö.

Böhi tosatņan aņgöletököra kapaņ köla uletket.

Mak 8.11-12; Mat 12.38-42

²⁹ *Ambazip kambunöņ tokogetka qariiga Jisösnöņ toroqeba keu kewö jiyök, “Ambazip merak gölmenöņ maljei, mi kambu bölöņa. Yeņön Anutugö aiwesökņangöra kapaņ kölakzemö, aiwesök kun kezapqetok azi Jonagöra lök asuhuyök. Anutunöņ aiwesök murutņi kun qahö al eņgima.

* **11:29:** Mat 16.4; Mak 8.12

30 *Keu mianğö kōnaŋi kewō: Anutunōŋ mōnōwōk Jona melaiiga Niniwe yeŋğö sutŋine anda Anutugö aiwesōkŋi ahök. Mianğö dop Suep gölmegö azi ölnan mewöyök ambazip kambu kianğö sutŋine asuhuba uruŋini meleşmegöra kuŋgum eŋgiba aiwesōkŋina akŋa.

31 *“Kōnaŋamŋinanğö kaisösöpŋi kun kewō: Anutunōŋ mōnōwōk mötkutukutu öngöngöŋi ketanŋi mi kiŋ Solomon waŋgiiga Saut görökenök kantri kungö qin ambinōŋ Solomongö mötkutukutuŋi mötmamğö sihimŋi mörök. Sihimŋi möta gölme gōraŋeyök wahöta kōna köröp tiŋtiŋi kaba mala Solomongö mötmötŋi mörök. Mi mörökmö, mötket, nalö kewöŋe nōŋön sutŋine asuhuba kinda Anutugōreŋ mötkutukutu öngöngöŋi memba kazali, mi Solomongö mötkutukutuŋi oŋgitzza. Oŋgitzapmō, iŋini tōndup nesampurek ak niŋgiba tōnpin kingetka qahö dop kölja.

“Mianğöra Anutunōŋ kōnaŋep ambazip körek pakpak öröm eŋgii keuŋini jim tekōmapkōra jeŋe aŋgotmei, nalö mianğoreŋ Saut kantrigö qin ambi mianğön mōnō mewöyök aŋgotma. Yaŋön ambazip kambu ki kinjei, embuk örörōŋ kömupnöhök wahöta eŋğö qöhörōŋine mohotŋe kinma. Mohotŋe kinda keu kewō eŋğö silenine alma, ‘Iŋini Jisös nesampurek ak waŋgigetka Anutunōŋ likepŋi meleş eŋgii sihimbölö öngöngöŋi mötme.’ Yaŋön mewö jiiga silikŋi kewöta nanŋinanğöra gamuŋini mötme.

32 *“Jonanōŋ Niniwe ambazip sutŋine anda Anutugö keunōŋ uruŋini kuŋgui möta

* 11:30: Jona 3.4 * 11:31: 1 Kiŋ 10.1-10; 2 Hist 9.1-12 * 11:32: Jona 3.5

mianğoreñök uruñini melengetmö, mötket, nöñön sutñine asuhuba kinda Jonagö ahakmemeñi onğita ahakzal. Mewö ahakzalmö, inini töndup nesampurek ak niñgimakze.

Mianğöra Niniwe ambazipnöñ jimtekötekögö nalö ketañe ambazip kambu ki kinjei, embuk öröröñ kömupnöñöhök wahöta engö qöhöröñine mohotñe kinme. Mohotñe kinda Niniwe yeñön keu kewö engö silenine alme, 'Inini Suep gölmegö azi ölni nesampurek ak wañgigetka Anutunöñ likepñi melen engii sihimbölä öngöñgöñi mötme.' Niniwe yeñön mewö jigetka ahakmemeñinan nanñini könañamñini indelgetka gamuñini mötme." Mewö.

Kiwa mi asakñi neñgimapköra ahöza.

Mat 5.15; 6.22-23; Mak 4.21-23

³³ *"Kunñan lambe me kiwa ohotiriba köwe wañgömñe me kimbutnöñ qahö almapmö, mi mönö mianğö dum tatatnöñ alma. Mewö ali tosatñan miri uruñe öngöbingö mötzei, yeñön mianğö asakñi eka ölop öngöme.

³⁴ Göhö jegi mi uru silegahö kiwañi akza. Mianğöra kawöl kunöñ jegi qahö mem böliza ewö, mianñön mönö tohoba asarim teköi Anutugö asakñan ölop uruge mem asariiga malmalgi pak-pak asakñe malman. Asakñe malmanmö, sihim kömbönañi bölöñan me yuai kunñan jegi mem böliba asakñi közambötza ewö, mianñön silegö malmalgi mewöyök mem söñauiga pandaman uruñe jipjap malman.

* **11:33:** Mat 5.15; Mak 4.21; Luk 8.16

35 “Mewö aiga mötnöŋ, söŋaupnöŋ urugahö asakŋi közamböri söŋaubapüköra mönö tihitki möta galöm mem anguman.

36 Mewö aknöŋga Anutugö asakŋan urugi körek dop köli waŋgömnŋi kun qahö söŋauza ewö, göhö silegan mönö mewöyök asoŋ-kilik-kilikŋambuk aka jemesoholgan asariza. Kiwa ketanŋan silege kuŋguba kölköl-bilikbilikŋambuk mem asarim gihizawi, malmalgi mönö miangö dop Anutugö asakŋe al teköba malman.” Mewö.

*Urumelengö silesile tandököra ‘Yei!’ jiiga 6 ahök.
Mat 23.1-36; Mak 12.38-40; Luk 20.45-47*

37 Jisösnöŋ keu mi jim teköi Farisi (Köna keugö kapaŋkölköl) azi kunöŋ kewö jiba köl öröm waŋgiyök, “Gi ölop nöŋgö mire öŋgöba tata nene nembin.” Mewö jiiga anda öŋgöba nene nemangö tarök.

38 Mutuk böröŋi qahö saŋgoŋda eta tarökmö, Farisi azinöŋ silik mi eka welipköyök.

39 Welipköiga Kembunöŋ kewö jii mörök, “O Farisi inŋini mönö ölna amöt qem aŋgubingöra qambi aka al nenegö silenŋi saŋgoŋ yakömakzemö, nanŋini uruŋinan mönö tölohoza. Mi dogo jimamonŋ aka qewöloŋ mianön kokolak qei malje.

40 “O inŋini, uruŋini qahö. Kunöŋ silenŋi pakpak miwikŋaiyöhi, yaŋön mönö uruŋi mewöyök mi-wikŋaiyök me qahö? Inŋini mönö wuanöŋgöra uru likepŋangöra taŋqaŋ akze? Mi qahö dop kölja.

41 Miangöra yuai kiwi al nenenöŋ tatzawi, mi mönö kalema ambazip wanapŋi engime. Mewö aketka Anutunöŋ amöt qem engii engörenŋ yuai pakpak mönö sarakŋi ahöma.” Mewö.

42 *⁴²“O Farisi ambazip, lömböt qakñine öngözawaŋgöra mönö wölziköba ‘Yei!’ jizal. Inini nene pakpak mendenḁa bahöñi 10 mianğöreñök mohot Anutugö buñaya qemakze. Gipñi, supe aka yöha könañi könañi mi mewöyök menḁenḁa tenöhök mohot mi Anutugö buña qemakze. Naluk mi törörök alakzemö, Köna keugö köñji bohonñi ki mönö oñgita mosörakze: Gi Anutu uru könömgan jöpaköm wañgiman aka ambazip sutñine ahakmeme diñdiñi wuatangöba malman. Keu bohonñi mi mönö kapan köla wuatangöba malme aka keu morömorö mi mewöyök kude oñgita mosötme.

43⁴³ “O Farisi, lömböt qakñine öngözawaŋgöra mönö wölziköba ‘Yei!’ jizal. Inini köuluk mire dum tatat mutukñe jegep tatpingö sihimñi mörakze. Maketnöñ me könanöñ ambazip engeketa jölöñini jimegö mörakze.

44⁴⁴ O inini, lömböt qakñine öngözawaŋgöra wölziköba ‘Yei!’ jizal. Inini qaksiri qetñini qahö mianğö dop akze. Ambazipnöñ qamöt wörönñambuk denike ahözawi, mi qahö möta qakñine lanlan tiba yuai dönqizinñambuk oseiba tölohomaqze.” Mewö.

45⁴⁵ Jisösnöñ keu mewö jiiga Köna keugö böhi yeñgöreñök kunñan möta melenḁa kewö jiyök, “Böhi, gi keu mewö jiba nini mewöyök gamu qem neñgizan.”

46⁴⁶ Mewö jiyökmö, Jisösnöñ keu kewö jiyök, “O Köna keugö böhi, eñgö qakñine mewöyök lömböt öngözawaŋgöra wölziköba ‘Yei!’ jizal. Inini keuñi keuñi jim kutuba mianğö köñjöñ lömbötñi ambazip

* **11:42:** Lew 27.30

qakɲine alagun algetka mi tem kölböngö lömböriiga jaraɲbaraɲ ahakzemö, nanɲinak i kesötɲinan borom kun bauköm engibingö wösömötmötɲini kun qahö ahöza.

⁴⁷ “O iɲini, lömböt qakɲine öngözawaɲgöra mönö wölköba ‘Yei!’ jizal. Iɲini kezapqetok ambazip yeɲgö qaksirinöɲ simen koum memba meɲölömakzemö, nanɲini ambösakonɲinan mönö i enguget kömuget.

⁴⁸ Nanɲini ambösakonɲinan kezapqetok ambazip enguget kömugetka iɲini yeɲgö qaksiriɲine koum memba simen alakze. Mewö aka mianɲön ambösakonɲini yeɲgö ahakmemegöra imbi köla keuɲini naɲgöba jiba dangunu ewö kinje.

⁴⁹ “Mianɲöra Anutu, mötkutukutu Tonji yaɲön kewö jiza, ‘Nöɲön kezapqetok ambazip aka aposol melaim engibi engören kame. Kagetka yeɲgörenök tosatɲi i enguget kömume aka tosatɲi sesewerowero ak engime.’

⁵⁰ “Anutunöɲ Suep gölme miwikɲaim etkiyöhi, nalö mianɲörenök könahiba kezapqetok ambazip engugetka sepɲini mokoget eri, mianɲö sep kitipɲi pakpak mi ambazip merak maljei, mönö engö qakɲine öngöi sihimbölö mötme.

⁵¹ *Abelgö sepɲan eri mianɲörenök könahiba enguba kota mala Zekaraia jöwöwöl alta aka jöwöwöl jike kömbukɲi mietkö sutɲire qeget sepɲi eri mianɲören teköyök. Nöɲön keu kewö jibi mötme: Sepɲinaɲgö kitipɲan mönö ambazip merak maljei, engö qakɲine öngöiga sihimbölö mötme.

* **11:51:** Jen 4.8; 2 Hist 24.20-21

⁵² “O Köna keugö böhi inini, lömböt qakñine öngözawañgöra mönö wölziköba ‘Yei!’ jizal. Inini Anutugö mötmöt membingö nanju ki moröñi mi ambazip enğuangita anğön köl enğimakze. Nanñinak miangö uruñe qahö anğotket aka tosatñan miangö uruñe anğotpingö akzei, inini i jöhöba anğön köl enğiba malget.”

⁵³ Jisösnöñ keu mewö jiba mosöta ani Köna keugö böhi aka Farisi yeñön könahiba keu könöpñambuk jim wañgiba keu könañi könañi jimapkö qeqesi gwötpuk al wañgiget.

⁵⁴ Al wañgigetka numbuñeyök keu kun qiwitipköiga miañön köpeiba keugö bötakñöñ örömapköra mönöget. Mewö.

12

Urumelengö silesile malmalgö galöm meme keu Mat 10.26-27

¹ *Jisösnöñ keuñi jüiga nalö sutñe miangöreñ ambazip tausenni tausenni yañgöreñ tokoba ölöqölököba utakutal anğuba kinget. Mewö aka kingetka könahiba gwarekurupñi kewö jii mötket, “Yuai mutukñi ki: Inini mönö Farisi (Köna keugö kapañkölköl) yeñgö urumelengö silesile ahakmemenjanğöra galömñini meme. Mi wösö kömbukñi ewö akza. Mi qahö mosötme ewö, miañön mönö yist ewö qariba mem bölim enğima.

² *“Ambazipñöñ yuai önun meget ahözawi, mi pakpak mönö kötulgetka aukñe ahuma. Mewöñanök keu asambötket ahözawi, mi pakpak mönö indelgetka möt kutume.

* **12:1:** Mat 16.6; Mak 8.15 * **12:2:** Mak 4.22; Luk 8.17

³ Mianğöra mönö keuñinanğö galöm memba malme. İnini keu söñaupnönj ölonj jimei, mi mönö asakñe jigetka mötme. İnini miri uruñe wañğömnji kungen sañepnönj kezapñine jimei, mi sobemnönj aukñe jim asarime.” Mewö.

Dagöra keñğötnini mörin dop kölma.

Mat 10.28-31

⁴ “Alaurupni nönjön enğöra kewö jibi mötme: Tosatñan silenini qem kömumba mianğö andöñe yuai kun toroqeba akingö osimei, yeñğöra mönö keñğötnini kude möta malme.

⁵ Mi qahöpmö, dagöra keñğötnini mötketka dop kölmawi, nönjön mi kondel enğimam. Kun dañön kukösum memba enğui kömugetka tötal enğii könöp sianönj gemei, yañğöra mönö keñğötnini möta malme. Enğöra keu mi kunbuk jizal: yañğöra mönö keñğötnini möta malme!

⁶ “Tosatñan bekösöm (jöröm, ulisit) 5 mi toiya yahötñan söñğöröñi memegöra alakzemö, Anutunönj mienğöreñök mohok-kungö qahö ölum qeyök.

⁷ Anutunönj köyan köl enğiba nöröp jupñini pakpak mewöyök oyoñ teköba jañğöñini mötza. Ambazip enğö söñğöröñini mi bekösöm ulisit gwötpuk enğonğita öñğöñöñi akza. Mianğöra keñğötnini mönö kude möta malme.” Mewö.

Kraist jim miwikñaima me qañ kölme?

Mat 10.32-33; 12.32; 10.19-20

⁸ “Nönjön keu kun jibi mötket: Kunñan ni ambazip jeñine jim miwikñaim ningimawi, Suep gölmegö azi ölñan mönö mewöñanök i Anutugö garataurup yeñğö jeñine jim miwikñaima.

⁹ Mewömö, kunñan ni ambazip jeñine qañ köl niñgimawi, nõñõn mõnõ mewõñanõk i Anutugõ garataurup yeñgõ jeñine qañ kõlmam.

¹⁰ **“Kunñan Suep gölmegõ azi õlñi qetala keu jimawi, Anutunõñ mi õlõp mosõtmapmõ, kunñan Uña Tõrõñi ilita mepaqepaik akñawi, yañgõ siñgisõndokñi mi Anutunõñ qahõ mosõtma.*

¹¹ **“Ambazipnõñ iñini õrõba keu jakeñine al engigetka kõuluk miriñine me kiap premiõ aka kantriñi kantriñi mienğõ kiñ kembu yeñgõ jemesoholñine kinmei, nalõ miangõreñ keuñinañgõ likepñi wani keuya denõwõ jibinak miangõ waimanjatñi kude mõtme.*

¹² Mi kewõgõra: Iñini keu jime, mi Uña Tõrõñan aua miangõreñõk kusum enğiiga jime.” Mewõ.

Nepaqepalok azi pomñangõ dopkeu

¹³ Ambazip kambu sutñineyõk azi kunñan Jisõsgõ jiyõk, “Bõhi, iwiniran kõmuiga gi mõnõ datnañgõ jinõnga iwinirañgõreñ bõrõsamotñi mendenja niñgima.”

¹⁴ Mewõ jiyõkmõ, Jisõsnõñ kewõ melen wañgiyõk, “O azi, dañõn etkõ jimtekõtekõ toñiri akñamgõra kuñgum niñgiyõha gõlmenjiri mendenbilenak?”

¹⁵ Mewõ jiba keu kewõ toroqeyõk, “Inap ainemalukuñinan awamñanõk me kelenmaleleñ ahõbawak, malmalñinañgõ kõnañi mi miangõreñ qahõ ahõza. Malmalñini qahõ kewõta monen sukinapnõñ mõndõme ewõ, mõnõ ayuhume. Miangõra membagan memingõ nepaqepalok

* **12:10:** Mat 12.32; Mak 3.29

* **12:11:** Mat 10.19-20; Mak 13.11;

Luk 21.14-15

(gridi) pakpaköra mönö galömñini memba malme.”

¹⁶ Mewö jiba dopkeu kun kewö jii mötket, “Azi pomñi kun malök. Yanñon gölmeñe nene nupñi meiga töhötmöriam ketañi asuhuyök.

¹⁷ Mi asuhuiga uruñan kewö mötmöriba jiyök, ‘Nöñgö köwe mirini mi morörökñi. Mianğöra padı gösöñi gösöñi, koñ kambuñi kambuñi, sehoñ böranñi böranñi mi mönö denikeañğoreñ toko-bileñak? Mönö denöwö akñamto?’

¹⁸ Mewö jiba jiyök, ‘Mönö kewö akñam: Ni köwe mirini köndenđa salupñe köwe miri ketañi ketañi memam. Mi memba nene töhötmöriamni aka suk-inapni pakpak mönö mianğoreñ qezaköbi tatma.

¹⁹ Mianğoreñ tariga nanañğöra kewö jimam: O gi simbawoñ! Töhötmöriamgi mönö awamñi qahö ahöm gihiza. Mianğöra mönö nene nem söñgaiba yambuñi yambuñi siyoñsayoñi qahö luhut memba ösöñ malman.’

²⁰ Mewö jiyökmö, Anutunöñ kewö jii mörök, ‘O gi, urugi qahö! Nöñon nalögi ala jim teköba uñagi sunğem kianğoreñök goañgitpiga kömuman. Kömunöñga öroyuai pakpak buña qem añguba malnöñi, mi mönö dagö buñaya akñapto?’

²¹ “Kunñan nanñañğöra ainemaluku guli dötnam yuai tokomakzapmö, Anutugö qöhöröñe urugö töhötmöriamñi qahö ahöm wangizawi, yanğöra mönö lömböt ketañi mewö asuhuma.” Mewö.

Anutu möt nariba waimanjat kude akñe.

Mat 6.25-34

²² Jisösnöñ gwarekurupñi kewö jii mötket, “Mewö asuhumapmö, nöñon enğöra kewö jibi mötket: Inini gölmenöñ malmeañgö waimanjatñi

mi kewö jiba kude akɲe: Nini mönö wanat yuainöŋ gumohom aŋgubinak aka wanatnöŋ sileninaŋgö löŋgötpinak?

²³ Sileninaŋbuk maljei, mianön bohonŋi aiga opo kereŋnöŋ mönö miangö nembö bapɲe ahöza. Jeŋinaŋbuk maljei, mianön bohonŋi aiga nenenöŋ mönö miangö nembö bapɲe ahöza.

²⁴ “Mönö koekoe nei eŋgekɲe: Mienön nene kötɲi qahö qesiŋ gilakze. Padi ölni qahö yandiba köwe miriŋine qahö tokomakze. Yöha sihiŋini mi qeköm nemi mirinöŋ qahö alakze aka Anutunöŋ mi töndup i gumohom eŋgimakza. Ambazip eŋgö söŋgörüŋini mi nei söŋgörüŋini eŋgoŋgita öŋgöba ahöza. Mönö mi mötmöriget anök.

²⁵ “Eŋgöreŋök kunŋan waimanjat aka mewö mianön gölmenöŋ malmawaŋgö nalöŋi mi sömaŋi mohotkö dop mem toroqema me qahö? Mi qahöpmahöp!*

²⁶ “Mewö aiga yuai morörökɲi mewö akingö osime ewö, yuai tosatɲi pakpaköra mönö denöwögöra waimanjat akeak?

²⁷ *Inini mönö jariŋ jurani aködamunŋinaŋbuk mi eŋgekɲe: Mienön opo sörüŋinaŋgöra möt qahö loŋgalakze. Nup yuai tosatɲi kun qahö memakze aka mi töndup kewö jibi mötket: Kiŋ Solomonöŋ goul silwöŋi qeraköba malukuŋi asoŋ-bilikbilikŋambuk löŋgöta malökmö, yaŋgö malukuŋi mi kiteŋ soranjiŋgö dop eksihimŋambuk qahö ahöyök.

* **12:25:** Tosatŋan kewö melenɲa jize: Eŋgöreŋök kunŋan waimanjat aka mewö mianön silenji wan fitkö dop toroqeba mem körimaŋgö osima. * **12:27:** 1 Kiŋ 10.4-7; 2 Hist 9.3-6

28 “Jarın juranı töhön mi merak gölmenön kösutnine ahöi uran kölgetka eri gila qezaköba ohoget jema. Mi tündup Anutunön juranı mewöni kun mi tok ölöpnanök meñölömakza. Mianğöra yañön inini mewöyök ölop esuhum engima. Inini jarın juranı mianğö dop qahö akze. Anutunön köyan köl engimangö mötzawi, sihimni mianön mönö yuai pakpak engongita öngöza. O ambazip, mötnaripninan mönö wuanöngöra morörökni akza?

29 “Mewö aiga inini mewöyök malmalınanğöra mötkurumkurum kude akçe. Mi aka lömbörība kewö jibepuk, ‘Nini mönö wani nene aka wani o nembinak?’ Mewö jiba urunini mianğöreñ kude ala urueret aka urukönöpuk miwikñabepuk.

30 Kantri dop urumelenğö kopa yeñön yuai mewöni pakpak buña qem anğubingö kapan köla urukönöp ahakze. Mi ahakzemö, inini nene opo yuaigöra mözörönğöba osizei, Iwiñinan mönö mi möt teköza.

31 Mianğö urukönöp kude akñemö, mönö Anutugö bemtohonön angotpingö kapan kölme. Urunini mianğöreñ alget ahöiga yañön mönö galöm köl engiba yuai mewöni mi mewöñanök toroqem engima.” Mewö.

Buñanini Suepnön me gölmenön tokoinga dop kölja?

Mat 6.19-21

32 “O kambuni morörökni, Iwiñinan bemtohon al engimangö mötzawanğöra mönö keñgötñini kude möta malme.

33 Gölmegö moneñ inapni mi kapan köla qeraköbepuk. Mianğöra yuai ahöm engizawi, mi mönö söngörönanğö ala moneñ öröba bahöni ambazip

wanapņi kalemņinaņgöra eņgime. Mewö aketka qetbujaņini guli dötnam ewö mi Suep mire ahöba sehiba kude qahöwakņa. Monen gösöņini qainņi kun mi Suep mianğoreņ qahö bölime. Gurem jilukut aka yonğorö meme yeņön mönö eu öņgöba yuai mem bölibingö osime.

34 “Yuaigöra aködamunņi memba mötnöņ öņgözawi, mianğön miri kungen ahöiga göņön mönö urugi mewöyök mianğoreņ qekötahöba malman.” Mewö.

Urugwölö mala nup megetka dop kölma.

35 **“Inini mönö Anutugö nupņi memb- ingöra jöjöröba opo söröņini jöhöm yaköba aködamunņinambuk kinda uruņinaņgö kiwaņan ohotirigetka jeiga malme.*

36 **Mi kianğö dop: Miri tonņi kun mi ambazip amemegö lömbuaņnöņ kaba söņgaibingöra öröm waņgigetka anök. Mianğoreņ ani moröurupņan mire tata lilingömapköra jeņinan yaigep uba ‘Kiņsiņ-pansaņ!’ jiba kapaņ köla mambötze. Mamböta malgetka yaņön nalö mianğoreņ me mianğoreņ kaņgota naņgunöņ qebawak, yeņön mönö mianğoreņök naņgu örögetka kotma. Inini mönö morö mienğö dop aka jöjöröba malme.*

37 **“Kembunöņ lilingöba kaiga nup memeurupņi tosatņan urugwölö malgetka mewö miwikņaim eņgimawi, yeņön mönö simbawoņ akze. Nöņön ölna kewö jibi mötket: Yaņön kaņgota tokom eņgiba nene dumnöņ ali tatketka nene gumohom eņgimamgö jöjöröm aņguba welen qem eņgima.*

* 12:35: Mat 25.1-13 * 12:36: Mak 13.34-36

38 Yanön ömbibiñe me miri awöraᅅgöiga miangören lilingöi tosatñan urugwölö malgetka miwikñaim enjimawi, yeñön mönö simbawon akze.

39 **“Gwölö malbingö keu ki mönö ölop mötmörime: Sunjem aiga kegwek azinöñ wanat nalönöñ me auanöñ kamawi, miri toñan mi mötpawak ewö, yanön mönö gwölö mala mirinji ölop galöm meiga qesiñda öñgömangö osima.*

40 Inini ‘Suep gölmegö azi ölnan nalö kiangören qahö kañgotma,’ jiba mötmörime, yanön mönö nalö miangörenök kañgotma. Miangöra inini mewöyök jöjöröba malme.” Mewö.

Nup azinöñ silekmalek mala ayuhuyök.

Mat 24.45-51

41 Jisösnöñ keu mewö jii Pitönöñ qesiyök, “Kembu, gi dopkeu ki mi neñgöra me ambazip tosatñi pakpak yeñgöra mohok jizan?”

42 Mewö qesii Kembunöñ jiyök, “Nup meme ambazip sutñine dañön tiñ kutuba tosatñi engoñgitza? Tosatñan söroräuba nup mosötketka kunñan mötkutukutu ölopñangö qakñe kapan köla pöndañ memakzawi, yanön mönö simbawon akza. Miri toñan ahakmemenji kewöta eka kungen anda mirinangö öryuaiñi mi yangö böröñe ali galöm akña. Galöm aka welenqequeurupñi jiyöhangö dop köyan köla nalö diñdiñe gumohom enjimakña.

43 Mewö köyan köl enjiba maliga toñan lilingöba kaba mewö eka mönö simbawon jima.

* 12:39: Mat 24.43-44

44 “Nöjön keu ölni kun kewö jibi mötket: Tonjan simbawon jiba sukinapni pakpakö galömni kungum wangima.

45 Kungum wangimapmō, nup meme okonni yanön urunan mötmōriba kewö jima ewö, ‘Kembunangö kaka nalönan mönō köröpni ahöza.’ Mewö jiba könahiba nup meme ambazipurupni engum ureiba közölömbuan ala söngaiba o köhöikni namba urunji sohoiga enololon silekmalek aka malma.

46 Mewö mala nalö kunöj Kembunji kangotmapkörä qahö mambötma, mönō miangörej kangotma. Nalögöra ikmaok injululun mali mönō aua miangörej kangota qeba yaijapalelen mem wangiba jim kutuiga qegetal ambazip ewö könöp sianöj geba sihimbölö mötma.

47 “Nup meme kunjan Kembunangö jitsihitni möt yaköyökmö, keu arenji jiyöhangö dop qahö jöjöröm anguba nupni memba malöhi, Kembunan miangö likepni jiiga jöhöba ihileknöj ambemni gwötpuk qeaköba qeme.

48 Mewö qememö, nup meme azi kunjan Kembunangö jitsihitni qahö möt yaköba yuai aka meiga likepni ölop jiget ihileknöj qemeangö dop akzawi, Kembunöj miangö likepni jiiga amqeqenji qeme. Anutunöj kungöra yuai gwötpuk wangiyöhi, yanön mönö mi mem sehiiga ölni gwötpuk ahumapköra al mambötma. Anutunöj kungöra yuaigö warökni sehisehinji al wangiyöhi, yanön mönö mi mem sehiiga ölni sehisehinji ahui melen wangimapköra qesima.” Mewö.

Jisösnöŋ könöp bölam memba eri deŋnök.

Mat 10.34-36

49 “Nöŋön gölmenöŋ könöp ala ubi jemapköra et-piga urusihimni mianŋö bölamŋan lök jeyöhaŋgöra ahöza.

50 *Ahözapmö, mi ‘Ala umam,’ jibi sihimbölo gwötpuk mi nöŋö qakne öŋgöba mösölumgöm niŋgimangö akŋa. Anutunöŋ mewö mianŋön melun murutŋi mem niŋgima. O ni wahöjalih ketanŋi möta malbi mem niŋgii mianŋöreŋ teköma.

51 Kewö mötmöribepuk: Jisösnöŋ luai qemangöra aka gölmenöŋ erök. Nöŋön kewö jibi mötket: Nöŋön luai qemangöra qahöpmö, nöŋgöra aka jula deŋgetka köŋ jabö ahuma.

52 “Mi kewögöra jizal: Nöŋö Buŋa keunan ambazip uruŋini kuŋgui melenŋeraŋgöra nalö kewöneyök könahiba kewö asuhuma: Miri kungö uruŋe ambazip 5 yeŋön sutŋine aŋgururuk aka julme. Likep karöbut yeŋön yahöt yetpuk aŋgururuk aketka likep yahöt yetköŋ karöbut yembuk jujul aka malme.

53 *Iwi morö yetköŋ jula kerök-kerök ahotka nam morö yetköŋ tötal aŋguyohotka iranŋan iranŋi qe-tala julmahot.” Mewö.

Nalö maljini, mi möt kewötme.

Mat 16.2-3

54 Jisösnöŋ toroqeba ambazip kambu yeŋgöra kewö jii mötket, “Wehön gegene miri böuleiba kousu töwiiga iŋini mi eka mianŋöreŋök ‘Kie kama,’ jimakze. Mewö jigetka kama.

* 12:50: Mak 10.38 * 12:53: Mai 7.6

⁵⁵ Saut görökenök luhut giliga eka möta kewö jimakze, ‘Miri könöpñambuk akña.’ Jigetka miangö dop akña.

⁵⁶ O urumelenğö silesile ambazip, inini suep gölmegö tandöknjiri eka kie wehöngö könanjiri ölop kewörakzemö, nalö ki maljini, miangö könaji qahö kewöta möt kutugetka qahö dop kölja.” Mewö.

Anğururukñini mindinğögetka solanima.

Mat 5.25-26

⁵⁷ “Inini ‘Yuai diñdiji mi denöwö akin,’ jiba miangö könaji mi denöwögöra aka nanñinak qahö kewöta jim tekömakze? Mi qahö dop kölja.

⁵⁸ Kerökan silege ala keu jakeñe öröm gihi-mangö aiga jimtekötekö galömgöreñ anda köna namñe miangöreñ mönö kapan kölja imbi mohok aka keuñiri jim solanimahot. Mewö qahö akñahot ewö, kerökan ölop örörahöm gihiiga (jas, majistreit) jimtekötekö toñangö jene anğotnonga möta jii opotöröpkö böröñe genöñga kösö mire al gihibapuk.

⁵⁹ Nönön kewö jibi mötnöñ, Gi miangöreñ töwagi pakpak almanangö dop qaköba tatman. Toiyagi kondikñi mewöyök al teköbagun mönö töwagi memba etman.” Mewö.

13

Uruñini melenğet me kömumba ayuhuget.

¹ Nalö miangöreñök tosatñan kanğota Jisös kösohot kewö jiget mörök, “Galili ambazip tosatñan Jerusalem jikenöñ jöwöwöl ohogetka premiö Pailötnöñ jüiga suahö galömurupñan

mianğöreŋ öngöba eŋgum kömugetka sepŋini eta lama bulmakau sepŋinambuk lolonqalonŋ ahök.”

² Mewö jigetka melenđa kewö jii mötket, “İnini mianğöra kewö mötmöribepuk: Galili ambazip mienjön Galili ambazip tosatŋi pakpak eŋgoŋgita siŋgisöndok aka malgeraŋğöra sihimbölö mi mötket.

³ Mewö qahöpmö, nöŋön kewö jibi mötket: İnini uruŋini qahö melenme ewö, inini körekŋan mönö mewöyök ayuhum teköme.

⁴ Me miri qetŋi Siloam mianğöreŋ miri köröpŋi kunŋan eta köla ambazip 18 turum eŋgii kömugeri, inini yeŋğöra kewö mötmöribepuk: Yeŋjön Jerusalem könagesö tosatŋi pakpak eŋgoŋgita siŋgisöndok aka keuŋinambuk malget.

⁵ Qahöpmö, nöŋön kewö jibi mötket: İnini uruŋini qahö melenme ewö, inini körekŋan mönö mewöyök ayuhum teköme.” Mewö.

Muli ip gorosonnaŋğö dopkeu

⁶ Jisösnöŋ dopkeu kun kewö jiyök, “Azi kunŋan muli ip kömöri nupŋe kota kini mianğö ölni jarumamğö anökmö, kun qahö miwikŋaiyök.

⁷ Qahö miwikŋaiba nup galömnğaŋğöra jiyök, ‘Mötnöŋ, nöŋön muli ip kiangö ölni yambu (yara) karöbutkö dop kaba jaruyalmö, kun qahö miwikŋaial. Mianğöra mi mönö wuanöŋğöra toroqeba gölmegö kelökŋi önewat öroi sihitŋanök aka-puk. Mianğöra mi mönö köla gilnöŋ anma.’

⁸ Toŋan mewö jiyökmö, galömnöŋ melenđa jii mörök, ‘O azi kembuni, mi ölop mosötnöŋga yambu (yara) ki kunbuk kinma. Nöŋön nalö sutŋe

kiaṅgöreṅ kinonṅonṅ gölme esiba kundupköba isonṅbasonṅ ala liliköbi kelökṅambuk akṅa.

⁹ Nönṅon mewö akiga yambu (yara) andöṅe miangö ölnṅi ölop ahubawak. Mi qahö ahuma ewö, mi ölop kölman.’ ” Mewö.

Jisösnöṅ Sabat kendonöṅ ambi kun mem ölöwahök.

¹⁰ Jisösnöṅ Sabat kendonöṅ köuluk miri kunöṅ öṅgöba Buṅa keu kusum eṅgiyök.

¹¹ Miangöreṅ ambi kun tarök. Ömenöṅ yambu (yara) 18 miangö dop mem löwörim waṅgiiga könisemṅi milipköiga qötöteimangö osiba tata malök.

¹² Jisösnöṅ ambi mi eka oholi kaiga kewö jii mörök, “Ambi, eksekpeksek kawölṅan mönö gömosöri ölöwakzan.”

¹³ Mewö jiba böröṅi nöröpṅe ali miangöreṅök qötöteiba Anutu möpöseim waṅgiyök.

¹⁴ *Möpöseim waṅgiyökmö, Jisösnöṅ Sabat kendonöṅ ambi mi mem ölöwahöhi, köuluk mirigö galömṅan mi eka miangöra möri bölüi keu könahiba ambazip kambu yeṅgöra jiyök, “Nup memegö nalö 6 ahözawi, miangöreṅ mönö kaba mem ölöwak eṅgimapköra jime. Mi Sabat kendonöṅ qahö.”

¹⁵ Mewö jiyökmö, Kembunöṅ melenṅda kewö jiyök, “O urumelenṅö silesile ambazip! Inṅini pakpak bulmakau aziṅini me donṅkiṅini mi Sabat kendonöṅ mireyök pösata eṅguangitketka onöṅ anda nemakze me qahö? Eṅgöreṅök kunöṅ mi qahö aṅgön köl eṅgimakza.

* **13:14:** Eks 20.9-10; Dut 5.13-14

16 Mötket! Ambi kianön Abrahamgö gwölönaröha aiga Satanön jöhöm wanġii yambu (yara) köröpni 18:gö dop maliga nöñön kösöñi mi Sabat kendonön pösatpi dop köl engiza me qahö?”

17 Mewö jiiga tuarenjonurupni pakpak yeñön gamuñini mötket aka ambazip kambu pakpak yeñön anġoletot wewelipñambuk meyöhi, mi pakpak eka möta söñgaiget. Mewö.

Nejon kötnanġö dopkeu

Mat 13.31-32, 34; Mak 4.30-32

18 Jisösnön dopkeu kun kewö jiyök, “Anutugö bemtohoñanġö könani mi denöwö? Mi wanatpuk dop albilenak?”

19 Mi nejon kötnanġö dop kewö akza: Azi kunñan mi memba nupne anda esiiga wahöta qariba ip ahök. Ip aiga könakemba neñi neñi mienön aipñini ip miangö böröñe alget.” Mewö.

Yistkö dopkeu

Mat 13.33

20 Jisösnön dumne kunbuk dopkeu kun kewö jiyök, “Anutugö bemtohoñi mi wanat yuaibuk dop albilenak?”

21 Mi yist me flaua mem qariqarigö dop kewö akza: Ambi kunñan ‘Beret ohomam,’ jiba yist memba flaua könde karöbut miangören mindiriba melenqelen aka anda anda tari körekñanök qariyök.” Mewö.

Mönö nanġu giwikne jaram tiba anġotme.

Mat 7.13-14, 21-23

22 Jisösnön anda taonni taonni aka miriñi miriñi miangören Buña kusum engiba anda mala Jerusalem sitinön göröken anök.

23 Ani kunñan kewö qesim wañgiyök, “Kembu, uruñini melenget Anutunöñ amöt qem engii letotmei, mi ambazip awamdökña me denöwö?” Qesim wañgii kewö jii mötket,

24 “Inini mönö nañgu giwikñe añgotpingö jaram tiba aum-mörime. Nöñön kewö jibi mötket: Ambazip gwötpukñan Anutugö bemtohoñ uruñe añgotpingö esapkömemö, mi osime.

25 Könañgep miri toñan wahöta nañgu köligun inini nalö miangöreñ könahiba yaigep kinda nañgunöñ qeba kewö jime, ‘Kembu, mönö nañgu öröm neñginöñ.’ Mewö jigetka melenđa kewö jii mötme, ‘Ni qahö möt engizal. Inini denikegöra, mi qahö mötzal.’

26 Mewö jiiga inini miangöreñök könahiba kewö jime, ‘Neñön mönö göbuk köisirik tata nene nein. Göñön mönö liliköba neñgö sombemñöñ Buña kusum neñginöñ.’

27 *Mewö jimemö, yañön keu kewö jima, ‘Inini denikeañgöra, ni qahö möt engizal. Miangöra kewö jibi mötket: Bölöñi meme pakpak, inini mönö nömosöta kesalget.’

28 **“Kesalgetka miangöreñ Abraham, Aisak, Jeikob aka kezapqetok ambazip pakpak yeñön Anutugö bemtohoñ uruñe kingetka engekñemö, nanñini aköm engigetka yaigep kinme. Könañini mewö miwikñaiba sahöt gigilahöba irimñini yöhözömgögetka qetñi qeri malme.

29 Ambazipñi ambazipñi mi wehön kotkotñeyök aka gegeñeyök aka likeplikep Not Saut

* 13:27: Sum 6.8

* 13:28: Mat 22.13; 25.30

* 13:28: Mat 8.11-12

mianğöreñök kaba Anutugö bemtohoññöñ añgota dum tatatñini memba nene nem söñgaip aka malme.

³⁰ *Mewö malmemö, mötket! Qöndökñi yeñğöreñök tosatñan mutukñi akñe aka mutukñi yeñğöreñök tosatñan qöndökñi akñe.” Mewö.

Kiñ Herodnöñ kiam soñ mianğö dop akza.

Mat 23.37-39

³¹ Nalö mianğöreñök Farisi (Köna keugö kapañkölköl) tosatñan Jisösgöreñ kaba kewö jiget, “Kiñ Herodnöñ guhui kömumangö mötza. Mianğöra mönö miri ki mosöta anman.”

³² Jigetka kewö melenñ enğiyök, “İñini mönö arökñangö kiam soñ mi kewö jiget mötma, ‘Mötnöñ! Nöñön merak aka uran ömewöröme enğuatañğömam aka kawöl ambazip mem ölöwak enğiba malmam. Anmami, uruwale mönö mianğöreñ añgota nupni mekömam.’

³³ “Kezapqetok ambazip sehisehiñi mi Jerusalem sitinöñ enğuetka kömuget. Miri tosatñe qahö toroqeba enğuet kömumakze, mianğö tandöktandök ahöza ekzal. Mianğöra nöñön merak aka uran uruwale köna anda malmam. Jerusalem añgotpiga nuñguget kömumam ewö, mönö yeñğöreñ aiakanjina mi toroqeba akñe.” Mewö.

Jisösnöñ Jerusalem sitigöra sahörök.

Mat 23.37-39

³⁴ Jisösnöñ jiyök, “O Jerusalem Jerusalem, İñini kezapqetok ambazip enğuet kömugetka Anutunöñ ambazip melaim enğii enğöreñ kamakzei, mi kötnöñ kumbuköm enğimakze. Poi

* **13:30:** Mat 19.30; 20.16; Mak 10.31

namñan moröurupñi ginginñi bapñe ala köjöjohom engimakzawi, nöñön mianğö dop nalöñi nalöñi göhö könagösöurupki suhuba tokom engimangö möta malalmö, inini mi tököba mala kotket.

³⁵ *Mötket! ‘Anutunöñ mönö jike mirinini andö qeiga sahopñanök ahöma.’ Mewö ahömapmö, nöñön kewö jibi mötket, inini ni kunbuk qahö neknemö, könangep nalö kun kam kunğui mianğoreñ neka kewö jime, ‘Kembugö qetñe kam nenğizawi, Anutunöñ mönö i kötuetköm wañgima.’ Mewö.”

14

Jisösnöñ kawöl azi kun mem ölöwahök.

¹ Jisösnöñ Sabat kendon kunöñ Farisi (Köna keugö kapañkölköl) yeñgö jitñememe kungö mirinje öngöba nene neyök. Nemba tari tosatñan galöm memba ektiget.

² Mianğoreñ yangö jemesoholñe kawöl azi kun köna böröñi onöñ ölököba qarui tarök.

³ Jisösnöñ i eka könahiba Köna keugö böhi aka Farisi mi qesim engiba kewö jiyök, “Sabat kendonöñ azi mem ölöwak wañgiba mewö mianñön Köna keu onğitpin me qahö?”

⁴ Mewö jiyökmö, yeñön göröñ qeba tatket. Tatketka böröñan azi mi misiriba mem ölöwaka melaii anök.

⁵ *Ani kewö jii mötket, “Engöreneñök kungöreneñ morö me bulmakau aziñi mi Sabat kendonöñ o lömnöñ gema ewö, mi mönö ösumok örögetka kotma. Dañön mi qahö öröi kotpawak?”

* **13:35:** Sum 118.26; Jer 22.5 * **14:5:** Mat 12.11

⁶ Mewö qesim enġii mianġö likepni melenbingö lömböriba numbuġini muhungöba bök tatket. Mewö.

Jisösnöġ sile mem-öngö-öngö mi qetalök.

⁷ Farisi (Köna keugö kapaġkölköl) azinöġ ambazip nenegöra köl öröm enġiyöhi, yeġön dum qaikne eu meköba tatkeri, Jisösnöġ mi eka mianġöra dopkeu kun kewö jii mötket,

⁸ **“Kunġan gi amembitkö lömbuaġören köl öröm gihii mianġören anda dum jegenneyök qahö memba tatman. Mewö akġan ewö, tosatġi köl öröm enġiyöhi, yeġörenök kunġan gi goġgita qetbuġaġambuk akapuk.*

⁹ *“Yaġön kaġgoriga lömbuaġ toġan göhöreġ kaba kewö jibawak, ‘Gi dum ki mosötnöġga öngöngöġi yaġön tatma.’ Mewö jima ewö, gi mönö wahöta bapne emu eta dum memba tata gamuġi senjom-buk mötpanbuk.*

¹⁰ Mewö qahöpmö, kunöġ köl öröm gihimawi, gi ölop dum siminne emu anda tatman. Mewö tatnöġga lömbuaġ toġan kota geke jima, ‘Alani, gi ölop kaba dum jegenne eu anda tatman’. Mewö jüġa göġön ambazip göbuk tata nene nezei, mönö körek yeġö jeġine qetbuġagabuk akġan.

¹¹ **“Mi kewögöra: Nanġini uruġini memba öngömei, Anutuġöġ i körek memba et al enġima. Kunġan nanġi uruġi memba etmawi, Anutuġöġ mönö i memba öngöba al waġgima.”*

¹² Farisi (Köna keugö kapaġkölköl) azinöġ ambazip köl öröm enġii lömbuaġnöġ tatketka Jisösnöġ

* **14:8:** Qam 25.6-7 * **14:11:** Mat 23.12; Luk 18.14

lömbuan toni lilingöba eka kewö jii mörök, “Gi silimgö me sunjengö lömbuan kun ohoba miangören nangi alaurupki me darumunurupki mi kude köl öröm engiman. Tinitosolomurupki me miri kasunjanjö ambazip pomni qetbuñaninambuk mi kude köl öröm engiman. Mewöni lömbuanjöra köl öröm enginöni, i mewöñanök köl öröm gihiba tosagi mi meköm gihiget teköma. Mewö akñan ewö, Anutunöñ mönö miangö töwanji qahö gihima.

13 “Mewö qahöpmö, lömbuan mözözömgöba ohomani, gi mönö ambazip etqeqeni mia köl öröm engiman. Ambazip wanapni, simalokon aka jegömöl akzei, mönö mia engoholnönga dop kölma.

14 Mi köl öröm enginönga yeñon tosa meköm gihibingö osigetka gi miangöra simbawon aka malman. Tosanini mi öne ahöi malnönga solanji yeñon kömupnöhök wahötketka nalö miangören Anutunöñ nanñak mi göhöra meköm gihima.” Mewö.

Lömbuan ali möndömöndö keu jiba tököget.

Mat 22.1-10

15 Jisösnöñ mewö jiiga nene nempa tatket yengörenök kunñan mi möta kewö jii mörök, “Kunöñ Anutugö bemtohon uruñe angota nene nempa tatmawi, nöñon yangöra simbawon jizal.”

16 Mewö jiiga kewö melenök, “Azi kunñan sunjengö lömbuan ketanji mözözömgöba ohoba ambazip gwötpuk öröm engiget kamegöra jiyök.

17 Lömbuan nalöni kam kunñui welenqeqeni kun melaii köl öröm engimangö jiyöhi, yengören anda jii mötket, ‘Yuai pakpak lök mözözömgöinga ahöza. Miangöra mönö ölop kame.’

18 Jii mötketmö, mi möta yejön körekmakörek könahiba yuai tosätje möndöba tököget. Mutukñan jiyök, ‘Ni arö kun söngöröñi mealangöra miangören anda ekñamgö mötzal. Mianjön jöhöm niñgiza. Miangöra ölop anda jinöñga möta kude möt bölim niñgima.’

19 Kunñan jiyök, ‘Ni bulmakau aziñi 10 söngöröñini meali, mi kösönöñ ilikñine jöhöbi kinon örögetka anda nup esapköba qeba qindipkömam. Mianjön jöhöm niñgizawanğöra ölop jinöñga möta kude möt bölim niñgima.’

20 Kunñan toroqeba kewö jiyök, ‘Ni ambi urandöpki bohonñi mealangöra kamamgö osizal.’

21 “Mewö jigetka welenqeçenöñ lilingöba azi kembunğöra buzup mi jii mörök. Möta uruñi könöp jeiga welenqeçeni kewö jim kutum wanğiyök, ‘Gi mönö wölañ taongö köna namñe aka sombemnöñ anda ambazip etqeçeni, wanapñi, köna böröñini titiñgitñi, jegömöl aka simalokon ambazip mi mönö enğuanğitnöñga lömbuan miri uruñe ki kame.

22 Jiyöhanğö dop ak teköba kaba kewö jiyök, ‘Kembuni, jim kutum niñgizanağö dop akzalmö, dum tiñi tok ahöza.’

23 “Mewö jiiga azi kembunöñ jiyök, ‘Gi mönö könanöñ aka rowoñqeçenine anda ambazip tat an-jei, mi kapan köla kuñgum enğinöñga lömbuan miri uruñe kañgota kokolak qeme.

24 Nöñön kewö jibi mötket: Ambazip mutuk köl öröm enğimamgö jiali, yeñgöreñök kunñan kun nöngö lömbuanñöñ qahö kañgota nemba nahömñi mötma.’” Mewö.

*Jisösgö gwarek malmalgö könanji**Mat 10.37-38*

²⁵ Jisösnöŋ ani ambazip kambu ketanji yeŋön wuatangöba angetka lilingöba kewö jii mötket,

²⁶ **“Kunŋan nömbuk kaba malmam jiba ni göragöra al niŋgiba iwinamŋi, anöm-moröŋi, darumunŋi, nenbehötŋi aka nanŋi malmalŋi mewöyök jegep ala jöpakömakzawi, yaŋön mönönöŋgö gwarekni akŋamgö osima.*

²⁷ **Sisitŋini megetka kunŋan ni nuatangöba sihimbölo möta maripomnöŋ kömumamgö qahö jöjörömawi, yaŋön mönönöŋgö gwarekni akŋamgö osima.*

²⁸ *“Engöreŋök kunŋan miri köröpŋi memamgö mötza ewö, yaŋön mönönö mutuk eta tata moneŋi miri mem tekömawangö dop akza me qahö, miaŋgö könanji kewöta ek kutuma.*

²⁹ *Mewö qahö aka miri tandöŋi kömöta mi mem tekömamgö köhököhöŋi qahö ahöm waŋgiiga mosöri öne kiniga ambazip pakpak mi eka könahiba jiji-ilit jiba mepaik waŋgibepuk.*

³⁰ *Mewö ak waŋgiba kewö jibepuk, ‘Azi mi könahiba miriŋi meyökmö, mi mem tekömamgö qahö köhöiyök.’ Miaŋgö dop Jisös wuatangöman me qahö, mi törörök kewöta möt kutuman.”* Mewö

³¹ *Jisösnöŋ keu mi toroqeba kewö jiyök, “Mewöyök kiŋ azi kembu kunŋan kiŋ kunbuk aröŋda ‘Bim qemam,’ jiba denöwö akŋa? Yaŋön zilaŋök kerök qahö al waŋgimapmö, mutuk jembonurupŋi öröm tokom engii tata qamban keu kewö eraum mötme, ‘Nanine aziurupnini 10.000*

* **14:26:** Mat 10.37 * **14:27:** Mat 10.38; 16.24; Mak 8.34; Luk 9.23

maljin aiga likepɲe kerökurupnini mi 20.000 malje. Azi kembuninan i enɲuanɲita kaget enɲeka ölop köhöiba enɲubin me qahöpto?

³² 'Qahö köhöibin,' jime ewö, yaɲön kerök kiɲnönɲ köröwen tariga mianɲörenök jitɲememeurupɲi melaim enɲii yaɲgören anda luai qebingö goro eraum mötme.

³³ Mewöyök enɲörenök kunɲan yuai pakpak ahöm waɲgizawi, mi jegep almawaɲön mönö nönɲö gwarekni akɲamgö osima. Mianɲöra mönö nia jegep al niɲgigetka dop kölma." Mewö.

Howe nahömɲi qahö mi yuaia omaɲi kötökɲi.

Mat 5.13; Mak 9.50

³⁴ "Howe mi ölopɲi akzapmö, sihimɲi mosötma ewö, mi mönö denöwö möhamgöinga kunbuk sihimɲambuk akawak?

³⁵ Nesak omaɲi mi gölme kelökɲambuk akɲapköra tokoba isonɲason alakzinmö, howe nahömɲi qahö mi yuai kungöra qahö dop kölma. Qahö! Mi mönö önewat gölmenönɲ gilinga geba öne töhöntöhön ahöma. (Gi mewöɲanök nönɲö gwarekni aka kemaɲe kutuba nömosötman ewö, mönö yuai omaɲi akɲan.) Kunɲan kezapɲambuknönɲ malja ewö, yaɲön mönö keu mi möt kutuma." Mewö.

15

Lamanönɲ sohöyök, mianɲö dopkeu

Mat 18.12-14

¹ *Takis tilipqilip aka megeri aka siɲgisöndok ambazip tosatɲi mi jesöngöɲan Jisösgö Buɲaɲi mötpingö kaget.

* 15:1: Luk 5.29-30

² Mewö kagetmö, Farisi aka Kõna keugö böhi yenjõn Jisõsgõra uruñinan böliiga irikuruk keu kewö jiget, “Azi mianjõn sinjisõndok ambazip engimemba yembuk tata nene neza.”

³ Mewö jigeranjõra Jisõsnõj dopkeu kun kewö jii mötket,

⁴ “Engõrenjök kungö lamaaurupñi 100 malgetka miengõrenjök kunñan sohoba janjuj aniga toñan denõwö akña? Yanjõn mönõ 99 mi gölme qararanjõlkõlñe engõmosõta anda mohot janjuj anõhi, mianjõ jaruba anda mala miwikñaiiga tekõma.

⁵ Miwikñaiiba urusõsõngai aka awõtñe ala kama.

⁶ Mire kaba alaurupñi aka tosatñi kösutñe malmei, mi engoholi tokogetka kewö jii mötme, ‘Lamani sohoyõhi, mi lõk miwikñaiizalanjõra mönõ nõmbuk sõsõngai akin’

⁷ Nõjõn kewö jibi mötme: Mianjõ dop sinjisõndok azi mohotñan uruñi melenjawi, yanjõra Suep mire sõsõngai ketani asuhuma. Ambazip 99 nanjine jeñine solanñi diñdñi aka uruñini melenjbingõ qahõ mõta maljei, yengõra sõsõngai mewõñi qahõ asuhuma.” Mewö.

Monej kõtñi sohoyök, mianjõ dopkeu

⁸ “Mewõyök ambi kunñan silwõ monej kõtñi 10 memba maliga miengõrenjök mohokñan geba sohoiga denõwö akña? Yanjõn mönõ kiwa ohotiriba kapan kõla miri usuñda jaruma. Jaruba mala miwikñaiiga tekõma.

⁹ Mi miwikñaiiba ambi alaurupñi aka ambi tosatñi kösutñe maljei, mi engoholi tokogetka kewö

jii mötme, ‘Nöngören soujeñi mohotñan sohojóhi, mi miwikñaizalañgöra mönö nömbuk sösongai aki.’

10 Mianjö dop nöñön kewö jibi mötme: Singisöndok ambazip kunñan uruñi meleşniga Anutugö garataurupñi yeñön mianjöra sösongai öngöñgöñi akñe.” Mewö.

Nanñi imbi-imbi azinöy kumkanjam aka imbiñi meleşnök.

11 Jisösnöñ toroqeba kewö jiyök, “Azi kungö nahönyahötñi yahöt malohot.

12 Munñan iwiñangöra kewö jiyök, ‘Iwini, gi mönö moneñ sukinapki mendeñda nöngö bahöñi niñgiman.’ Mewö jiiga öroyuaini pakpak dopñire mendeñda etkiyök.

13 Mi etkiiga nahöññi moröñan sömañi yahöt karöbut mala inap yuaini pakpak mi kölölohoba memba kantri kungen anök. Mianjöreñ anda nanñi imbi-imbi aka köna ketañi ambi yembuk kiam bau ewö söñaup malmal mala moneñ inapñi gil teköyök.

14 “Yuai pakpak gil teköiga bödi (buörö) ketañi asuhuba gölme pakpak mi dop kölök. Yanön nalö mianjöreñ könahiba öngöpñi aka osiyök.

15 Osiba kantri mianjö toñi kungöreñ anda nupköra qesim wañgiiga melaii yanjö bau selñe geba bau galömñina malök.

16 Mianjöreñ mali bau yeñön sokop kötñi neget eka ‘Ölöp mi nembu gölömnü dop kölbawak,’ jiyökmö, mi mewöyök kunñan qahö wañgiyök.

17 “Mewö mala uruñi ahuiga kewö jiyök, ‘Iwiñangö nup ambazip wanat awamñi yeñön nup megetka söñgöñgöñi enñii nene nem timbireñ

aka maljemö, nöñön kianğoreñ uzukörörap aka bödi mala kömumangö akzal.

18 Ni mönö wahöta iwinangöreñ lilingöba anda kewö jibi mötma, 'Iwini, ni singisöndok memba mianñon gi aka Suep Toñi qetal etkiba qetki mem böliäl.

19 Mianğöra göñön kunbuk nöñğöra 'Nahöni,' jimanangö dop qahö akzal. Gi ölop jinöñga welenqegega kun akñam.'

20 "Mewö jiba wahöta iwinangöreñ anök. Anda mala miri dopdowii iwiñan tikep endu kinda ehi kaiga wösöñi pöröraköiga ehoriba ösumñan diñdingöba anda imbiñe gili geiga numbuñi yöhötim namba 'Nahöni, owe owe!' jiyök.

21 Mewö ahökmö, nahönñan jiyök, 'Iwini, ni singisöndok memba mianñon gi aka Suep Toñi qetal etkiba qetki mem böliäl. Mianğöra göñön kunbuk nöñğöra 'Nahöni,' jimanangö dop qahö akzal.'

22 "Mewö jii iwiñan mianğöreñök welenqegeurupñi kewö jii mötket, 'Inini mönö ösumok maluku aködamunñambuk kun memba kaba löñgöt wañgiget. Ila jalö imbiñe köla menjöläm wañgiba köna esu könañe löñgöt wañgiget.

23 Mewöyök selnöñ anda bulmakau döññi kelökñambuk kun memba kaba qeba ohogetka namba sösongai albin.

24 Nahöni ki kömum taköyöhañön mönö kunbuk guliba kaza. Yañön lök sohoigun Anutunöñ kunbuk miwikñaiiga asuhum tiñgitza.' Mewö jiiga könahiba sösongai alget.

25 "Sösongai algetmö, datñan nupnöñ mala lilingöba miri dopdowiba mianğöreñ liñet gwawet köla unduba söñgaigeri, mianğö kourukñi mörök.

26 Mi möta welen morö kun qeri kaiga ‘Mi denöwögöra akze?’ jiba qesim waŋgiyök.

27 Qesim waŋgiiga kewö jiyök, ‘Mungan lilingöba kaiga iwiŋan i kunbuk meiga unditundit aiga miangöra jiiga bulmakau dömnji kelökŋambuk qeba ohoba söŋgaize.’

28 “Mewö jiiga irimŋi seholiiga mire öŋgömamgö tököyök. Tököyökmö, iwiŋan mi möta yaigep eta uruluai keu ösöŋ jiba mölöwörim waŋgiyök.

29 Mölöwörim waŋgiyökmö, yaŋön melenŋa kewö jiyök, ‘Iwini, nöŋön yambu gwötpuk welengi qeba mala jimkutukutugi nalö kunöŋ qahö oŋgita malalmö, töndup göŋön nalö kunöŋ meme (noniŋ) moröŋi kun alaurupni yembuk sösoŋgai albingöra qahö niŋginöŋ.

30 Qahö niŋginöŋmö, nahöŋgi kianön köna ketani ambi yembuk mala monen inapki ayuhuba kaŋoriga göŋön mönö yaŋgöra aka jinöŋga bulmakau dömnji kelökŋambuk qeba ohoze.’

31 “Jiiga iwiŋan kewö jii mörök, ‘Nahöni, gi nalö dop nanambuk malakzan. Miangöra nani buŋani pakpak mi mönö göhö buŋaya mohok akza.

32 Mohok akzappmö, mungi kianön kömum taköyöhaŋön kunbuk guliba kaza. Yaŋön lök sohoiga Anutunöŋ kunbuk miwikŋaiiga asuhum tiŋgitza. Miangöra dölni nene sösoŋgai alinga dop kölja.’ ” Mewö.

16

Sukinap galöm tilipqilipŋambukö dopkeu

1 Jisösnöŋ gwarekurupŋi keu kun kewö jii mötket, “Azi pomŋi kungö sukinap galömŋi kun

malök. Tosatŋan kaba azi pomŋi mi luasö keu jiget mörök, ‘Yaŋön göhöreŋ moneŋ inapki köndenŋda laŋ gila malja.’

² Mi möta galöm mi jii kaiga jim waŋgiyök, ‘Ni göhöra buŋa bölöŋi jiget mötzal. Gi nöŋgö miri aka sukinapni kunbuk galöm kölmananŋgö dop qahö akzan. Mianŋöra mi denöwö galöm köla malnöŋ, mianŋö löpötŋi jim asarim niŋgiman.’

³ Mewö jiiga uruŋan kewö mötmöriyök, ‘Miri toŋan galömkölköl nupni noanŋiri denöwö akŋamto? Ösumni qahö dop köljawanŋöra gölme esimamŋö osizal aka ulet azi malmamŋö gamuni mötzal.’

⁴ Yaŋön galömkölköl nupni noanŋitmawi, nöŋön nalö mianŋöreŋ denöwö akiga tosatŋan miriŋine köl öröba köyan köl niŋgibeak? Aha! Köna kun mötmörizal.’

⁵ “Mewö jiba ambazip toŋan tosa al enŋiyöhi, mi pakpak nanŋik nanŋik öröm enŋiiga kaget. Mutukŋan kaiga yanŋöra kewö jiyök, ‘Tonanŋöreŋ tosa göhöreŋ dawik ahöza?’

⁶ Mewö qesiiga jiyök, ‘Oil dram 100 meal.’ Mewö jiiga kewö melenŋök, ‘Gi tosa papiagi memba ki tata ösumok uteköba 50 ohonöŋga ahöma.’

⁷ Mewö jiba azi kun qesim waŋgiyök, ‘Aka gi? Göhöreŋ tosa dawik ahöza?’ Qesiiga kewö jiyök, ‘Wit flaua mi 21.000 kilogram meal.’ Mewö jiiga jiyök, ‘Gi tosa papiagi memba mianŋöreŋ 16.800 kilogram mewö ohonöŋga ahöma’.

⁸ “Mewö aiga miri toŋan möta jim-ölöwak keu kewö jiyök, ‘Galömnan tilipqilip qakŋe yuai ahöhi, mi mötkutukutu ölöŋi kondelja.’ ” Kembu Jisösnöŋ

kösohot mewö jiba toroqeba jiyök, “Söñaupkö ahak-meme wuatängömakzei, yengö mötkutukutuñini mi ambazip tosatñi merak maljei, mi tilipqilip ak engimeangö dop ahözapmö, Anutugö asakñe maljei, yengö mötkutukutuñini mi miangö bapñe akza.

⁹ “Miangöra kewö jibi mötket: Tosatñan gölmegö moneñ inapnöñ ambazip tilipköm engimakzemö, eñön mönö mianön memba alaurup miwikñaim engime. Mi miwikñaim engigetka gölmegö yuainön qahöwakñawi, Anutunön mönö nalö miangöreñ köl öröm engiiga malmal köhöikñi mire aņgota teteköñi qahö malme.

¹⁰ “Kunñan yuai morörökñi memba kapan köla törörök galöm kölñawi, yañön mönö yuai ketañi mewöyök törörök galöm kölma. Kunñan yuai morörökñi galöm köla kitik-katuk akzawi, yañön mönö yuai ketañi mi mewöyök galöm kölmapkö jiinga kitik-katuk akña.

¹¹ Gölmegö moneñ inapñi böröñine algetka mi pöndañ qahö galöm kölgetka öñi qahö asuhuyök ewö, kunñan mönö yuai buñañi öngöñgöñi öñi mi böröñine qahö alma.

¹² Inñi tosatñi yengöreñ yuai mi pöndañ qahö galöm kölgetka öñi qahö asuhuyök ewö, nanñini uruñinañgö buña öñi mi dañön kun engibawak?

¹³ *“Welenqege kunñan kembu yahöt welen qem etkimangö osimakza. Kunñan mewö akñangö mötzawi, yañön mönö kun kazik ak wañgiba kun uruñan jöpaköma. Kungöreñ qekötahöba kun jijiwilit ak wañgima. Miangöra

* **16:13:** Mat 6.24

enjon Anutu aka monen inap mi mindiriba welen gem etkibingö osime.” Mewö.

Monenjö urukönöp akepukö goro keu

Mat 11.12-13; 5.31-32; Mak 10.11-12

¹⁴ Farisi (Köna keugö kapankölköl) yenjon monengö nahöm gwötpuk ahöm engii malgerangöra Jisösnön keu pakpak mi jiyöhi, mi möta je misiba ilit wangiget.

¹⁵ Ilit wangigetka kewö jii mötket, “Farisi enjon mönö ambazip jenine solanji tandök kondel engibingö könöpuk ahakzemö, Anutunön urunjanö gönaji möt kutum teköza. Ambazip jenine yuai kungöra mötketka öngöngönji akzawi, mi Anutunön ehi imbilonjonambuk ahakza.

¹⁶ **“Bemtohonjö gönaji mi Mosesgören Köna keunön aka kezapqetok ambazip yengö Buzup Kimbinine ohogetka oyonöda mala koringa Jonön asuhuba ölni aukne indelök. Nalö miangörenök könahiba keu mi jim sehiba Anutugö bemtohone angotmegöra ambazip urunini kungumakzin. Ambazip körekjan mönö jaram tiba kapan köla bemtohon miangö urune angotpingö ahakze.*

¹⁷ **Suep gölmenön görön gemahotkö dop akzahotmö, Köna keugö kulem jönbölanji mohok-kun mi nalö kungen qahö kötökni ayapköma. Mewö.*

¹⁸ **“Azi kunjan anömni mosöta ambi kun memawi, yanön mönö qesabulum akja. Azi kunjan ambi apnan mosöröhi, mi memawanön mönö mewöyök qesabulum akja.” Mewö.*

Azi pomni aka Lazarus

* **16:16:** Mat 11.12-13 * **16:17:** Mat 5.18 * **16:18:** Mat 5.32; 1 Kor 7.10-11

19 “Azi pomņi kun malök. Yaņön opo maluku gugakgugak pisikņi aködamunņambuk löngöta mala nalö dop nene söņgaip aka siyoņsayoņi qahö malök.

20 Mewö malökmö, yaņgö miri naņguni kösutņe azi wanapņi kun qetņi Lazarus ahöba malök. Uzi nömböņnöņ silenji dop köla tarök.

21 Wösöņi aliga gwarönöņ ahöba azi pomņaņgö tebolnöhök nene irip boromņi eri mia nemamgö mörök. Möta ahöiga kiam yeņön kaņgota uzi nömböņi bözöba malget.

22 “Mewö mala wanapņi yaņön kömuyök. Kömui Suep garata yeņön waņgita öņgöba Abrahamgö qöhöröņe alget tarök. Azi pomņi yaņön mewöņanök kömuiga löm kölget.

23 Löm kölgetka kömupkö senjom mire geiga jem sölöņgöi sihimbölö ketañi möta ui öņgöiga Lazarus Abrahamgö qöhöröņe köröwen endu tari etkehök.

24 Etkeka silata qeta jiyök, ‘O iwini Abraham, mönö wösögi möt niņgiman. Ni könöp bölamnöņ nohoi kiangöreņ wahöjalinj öņgöņgöņi möta kinjal. Mianğöra mönö Lazarus melainöņ anda kesöt suņa onöņ kusahöla kaba nesilanne mirii amörima.’

25 “Mewö jiyökmö, Abrahamnöņ melenök, ‘Nahöni, mönö ki mötmörinöņ anök. Göņön gölmenöņ malmal sösoņgaiņambuk lök malnöņ teköyökmö, Lazarusnöņ gölmenöņ malmalņi qemjem-mamjeņ aka malök. Mewö malökmö, nalö kewöņe urukölalep ak waņgiinga tatzapmö, göņön sihimbölö möta wahöjalinj qakņe kinjan.

26 Mewö maljin aiga toroqeba kewö jizal: Anutunöņ nini aka iņini sutnine mendenđa jabö al köhöii ahöza. Mianğöra tosatņan jabö qösököba

nenğöreneğ engöreñ kanğotpingö mötpeak, mi mönö osime. Mewöyök likep endu maljei, enğön mewöyök nenğöreneğ yuhu kanğotpingö qaköme.’

²⁷ Mewö jiiga kewö jiyök, ‘Iwini, mewö aiga kewö ulet gihizal: Göñön mönö Lazarus melainöñga iwinanğö mire anma.

²⁸ Miri mianğöreñ darumunurupni 5 maljei, yeñön mewöñanök senjom miri kianğöreñ eta si-himbölö ketanji mötpepuk. Mianğöra mönö jinöñga anda kezapqetok keu jii mötme.’

²⁹ “Mewö ulerökmö, Abrahamnöñ jiyök, ‘Qahö! Mosesgö Köna keu aka kezapqetok ambazip yeñğöreñ Buzup Kimbi mi yeñgö bunaya ahöza. Keu mia mönö kezap ala mötme!’

³⁰ Mewö jiiga kewö jiyök, ‘O iwi Abraham, mewö qahöpmö, kömukömuñi nenğöreneğ kunñan yeñğöreñ anbawak, mewö mönö uruñini melenbeak.’

³¹ Jiiga Abrahamnöñ kewö jii mörök, ‘Yeñön Moses aka kezapqetok ambazip yeñgö keugöra kezap qahö alje ewö, mewöñanök kömukömuñi nenğöreneğ kunñan wahöta keu jibawak, yeñön mönö töndup Anutu qahö möt narim wanğibeak.’” Mewö.

17

Singisöndokö kölgorom mönö qetal engime.

Mat 18.6-7, 21-22; Mak 9.42

¹ Jisösnöñ gwarekurupñi keu kewö jii mötket, “Bölöñanğö supatitikñan mönö awamñanök asuhumakza. Kunöñ supatitik anğön kölmamgö osimakzapmö, kun danön tosatñi kölgorom ak enğiiga singisöndok akñei, yanğöra mönö wöziköba ‘Yei!’

jizal. Sihimbölö öngöngöñan mönö yangö qakñe öngöma.

² Yanön ambazip moröñi yengörenök kun kölgorom ak wañgiiga siñgisöndok akñawi, azi mianön mönö lömböt öngöngöñi miwikñaima. Anutunöñ lömböt miangö likepñi denöwö wañgiiga dopñe akawak? Kemuñ jamönñiñ jölñe jöhöba köwet röndumnöñ gilget mulungöi gebawak, mianön mönö awamñi ahum wañgii tandök akawak.

³ **“Miangöra mönö nanñini galömñini mem anguba malme. Alagi kunñan siñgisöndok akzawi, i mönö jim mindiñ ak wañgiman. Jim mindiñ ak wañginöñga möt bölim anguba wösöñi mötma ewö, gi mönö siñgisöndokñi mosöt wañgiman.*

⁴ Wehön kungö uruñe siñgisöndok 7 ak bölim gi-hiba indimñi 7 göhöreñ lilingöba kewö jima, ‘Alani, ni siñgisöndok akzalanğöra möt bölim anguzal.’ Mewö jima ewö, gi mönö siñgisöndokñi mosöt wañgiman.” Mewö.

Mötnaripkö ölni mi kukösumñambuk.

Mat 17.20; 21.21; Mak 11.23

⁵ Aposol yeñon Kembugöra jiget, “Mötnaripnini mönö toroqeba mem köhöiman.”

⁶ Mewö jigetka Kembunöñ melenñök, “Mötnaripñinangö ölni mi nejoñ kötnangö dop ahöbawak ewö, eñon ölop nömözup ip* kianğöra kewö jim kutubeak, ‘Gi mönö jöla jalögabuk wahöta luhuba köwetnöñ geba nangi kömöta kinman.’

* **17:3:** Mat 18.15 * **17:6:** Jisösnöñ mulberi ip kun kondelök. Ip mi nömözup ewöya, kötni köuruk (köwörörök) kötni ewö neneña.

Mewö jiba möt narigetka ip mianjôn mönô keujini tem kölma.” Mewö.

Welenqeqe ölöŋji mi denöwö?

⁷ “Enğöreŋök kungö nup azinöŋ bulmakau memba nupnöŋ anda kinöŋ öröi gölme mesiŋma me lama galömŋina malma. Mala mire kaŋgori mianğöreŋ toŋan kewö jii mötma me qahöpto, ‘Gi mönô mire kota tata nenegi neman.’

⁸ Mewö qahö! Yaŋön mönô kewö jima: ‘Gi mönô o ariba möhamgöm aŋguba suŋgemgö neneŋamni ohoba ala niŋginöŋ nemam. Mianğö andöŋe nangi neneŋangi ohom neman.’

⁹ Mewö jim kutum waŋgiiga nup aziŋan jiyöhaŋgö dop nupŋi mem teköi dop kölīga galömŋan mianğöra möpöseim waŋgima me qahö? Qahö!

¹⁰ Enğö könaŋini mi mewöŋanök ahöza. Galömŋinan yuai pakpak jim kutum enğiyöhi, iŋini mi ak teköba mianğöreŋ kewö jime, ‘Nini nup ambazip töhöna maljin. Galömninan yuaigöra jiyöhi, mönô miyök memba kazinaŋöra möpömöpösei jarubingö osizin.’ ” Mewö.

Jisösnöŋ azi 10 silenini mem solaniyök.

¹¹ Jisösnöŋ Jerusalem sitinöŋ anmamğöra Galili aka Samaria prowins yahöt mietkö sutŋire köna ahöyöhi, mianğöreŋ anök.

¹² Könaŋöŋ anda miri kunöŋ aŋgoriga azi 10 silenini uzikukuŋambuk yeŋön miwikŋaiba eka tikep endu kinget.

¹³ Kinda köhöikŋanök qeta jiget, “Ketaŋamnini Jisös, mönô neŋğöra ak kömum gihima!”

14 *Qeta jigetka engeka kewö jii mötket, “Inini mönö jike nup galöm yeŋgöreŋ anda silenini kon-del engime.” Mewö jiiga tem köla könanöŋ angetka sileninan miangöreŋ solaniba ölöwahök.

15 Ölöwahökmö, 10 yeŋgöreŋök kunŋan sileni solanii eka lilingöba kaba Anutu köhöikŋanök qeta möpöseiyök.

16 Möpöseiba Jisösgö könaŋe geba sipköba simin köla ‘Saiwap!’ jiyök. Azi mi Samaria azia. Juda yeŋön Samaria prowinsgö ambazip yeŋgöra mötketka eretŋi ahakzapma.

17 Saiwap! jiiga Jisösnöŋ melenŋa jiyök, “Mi ölop akzanmö, azi pakpak 10 enŋö sileninan lök solanim teköyök me? Azi 9 mienöŋ mönö denike malje?”

18 Kian azi göŋön nangik lilingöba kaba Anutu möpöseizanmö, azi 9 yeŋön mönö anda nönöŋgan akze.”

19 Mewö jiba kewö jii mörök, “Mötnaripkan mönö mem ölöwak gihiza. Miangöra ölop wahöta an-man.” Mewö.

Anutugö bemtohoŋi mi denöwö asuhuma?

Mat 24.23-28, 37-41

20 Farisi (Köna keugö kapaŋkölköl) yeŋön Jisös kewö qesim waŋgiba jiget, “Anutugö bemtohoŋ mi mönö wanat nalönöŋ asuhuma?” Jiget möta melenŋa kewö jiyök, “Anutugö bemtohoŋan mönö jeninan ekinangö dop qahö asuhuma.

21 Mötket! Anutugö bemtohoŋi mi sutŋine uruŋine asuhuba ahöza. Miangöra mi kiangöreŋ me enduyangöreŋ ahözawi, mewö jibingö osi-makzin.”

* **17:14:** Lew 14.1-32

22 Jisösnöŋ gwarekurupŋi kewö jii mötket, “Könaŋgep nalö kun kam kuŋgumawi, miangöreŋ Suep gölmegö azi ölnaŋgö nup meme wehönni miengöreŋök kun ekingö ak engimapmö, mi kunbuk ekingö osime.

23 Nalö miangöreŋ kewö jiget mötme, ‘Mötket! Amötqeŋe Toŋan mönö endu malja. Mötket! Mönö ki asuhuza.’ Mewö mewö jigetka i ekingöra miangöreŋ ösumok kude luluhuba anme.

24 Mi kewögöra: Suep gölmegö azi ölnan kunbuk kamawi, nalö mi wölbilikö dop kewö akŋa: Mi suep likepŋeyök zilaŋ biliksik ala asariba likepŋe dop köla anjawi, yaŋön mönö miangö dop asuhuma.

25 Könaŋgep mewö asuhumapmö, mutuk ambazip nalö kewöŋe gölmenöŋ maljei, yeŋön azi mi yaköriba andö qem waŋgigetka sihimbölö ketanŋi mötma.

26 **“Mönöwök Noagö nalöŋe ambazipnöŋ malmalŋini qemasolokep qakŋe mala ayuhugerü, miangö dop mönö Suep gölmegö azi ölnan kunbuk kamawaŋgö nalöŋe mewöyök asuhuma.*

27 **Noagö nalöŋe nene lömbuaŋ ala o köhöikŋi nempa ambi kenam bohonŋaŋgö alget anda kaiga aŋgömeget. Ahakmeme mewö aka nempa qemasolokep malgetka Noanöŋ waŋge uruŋe öngöyöhi, silim miangöreŋ teköyök. Teköiga o göulu ketanŋan kaba ambazip jinonŋi qahö löm köl enŋii o nemulahöba kömuget.*

28 **“Lotkö nalöŋe mewöyök qemasolokep malgetka mewöŋanök asuhuyök. Ambazipnöŋ nene lömbuaŋ ala o jawat nempa nup köl kömöta jike*

* 17:26: Jen 6.5-8 * 17:27: Jen 7.6-24 * 17:28: Jen 18.20-19.25

miriṇini memba qeköm nembı ala yuai bohonṇı memegöra algetka yuai tosatṇı bohonṇı memba malget.

²⁹ Mewö aka memba malgetmö, Lotnönṇ Sodom miri mosöta anıga wehön mianṇgörenök könöp aka köt sömsöm könöpṇambuk mi mönö kie ewö suepnöhök eta ambazıp jinonṇı qahö enṇohoi kömuget.

³⁰ Könaṇṇep Suep gölmegö azi ölnan kunbuk asuhumawi, nalö mianṇgörenṇ ambazıpṇönṇ mewöṇanök qemasolokep aka mala ayuhume.

³¹ “Silim mianṇgörenṇ sombemnönṇ malmawaṇön mönö inap yuaiṇı memangöra miri uruṇe kude öṇṇöma me nupnönṇ anda malmawaṇön mönö mewöṇanök miriṇe kude lilingöba kama.

³² Lot anömṇan melenṇda andöṇe uba kömumba köt ahöhi, mönö mi mötmörime.

³³ *Kunṇan malmalṇı siyoṇsayoṇı qahö nanṇanṇöra anṇön köla nanṇı imbi-imbi malmangö mötzawi, yanṇö malmalṇan mönö sohomapmö, kunṇan malmalṇı nöṇṇöra aka köleṇnıga sohomawi, yanṇön mönö malmal ölnanṇö könaṇı miwikṇaıba oyaenṇkoyaenṇ malma.

³⁴ “Nönön kewö jibi mötket: Sunṇem mianṇgörenṇ azi yahöt dumnönṇ mohotṇe ahöyohotka yetkörenök kun waṇṇıta kun mosötme.

³⁵ Mewöyök ambi yahöt mi mohotṇe tawenṇ urasıba (bunahöba) tatmahori, yetkörenök kun waṇṇıta kun mosötme.”

³⁶ (Azi yahöt nupnönṇ malohotka yetkörenök kun waṇṇıta kun mosötme.)

* **17:33:** Mat 10.39; 16.25; Mak 8.25; Luk 9.24; Jon 12.25

³⁷ Jisösnöñ mewö jiiga gwarekurupñan melenđa jiget, “O Kembu, mi denikeañgöreñ asuhuma?” Mewö jigetka kewö jii mötket, “Sömbup gisakñan kungen göröken ahömawi, manu köraraknöñ mönö mianğöreñ öröba tokomakzei, mönö mianğö dop asuhuma.” Mewö.

18

Malönöñ kapañ köla uleriga azi ketanjan bauköyök.

¹ “İñini mönö nalö dop Anutu köuluköba qe-malokolip qahö aka malme.” Jisösnöñ mewö jiba mianğö dopkeuñi kewö jii mötket,

² “Taan kunöñ keu jimtekötekö azi kun malök. Yañön ambazip yeñgö keugöra gamuñi qahö möta nanñi imbi-imbi mala Anutugö jitñi oñgitpilenbuköra keñgötñi qahö mörök.

³ Taan mianğöreñ malö ambi kun malök. Yañön sundan dop keu jimtekötekö azi mianğöreñ anda kewö jiba malök, ‘Kunñan nömbuk aņgururuk akzawañgöra göñön ölöp bauköm niñgibanak.’

⁴ “Mewö jiiga nalö köröpñi mi möta andö qeba malökmö, könaņgep uruñan kewö jiyök, ‘Nöñön ambazip yeñgö keugöra gamuni qahö möta nani imbi-imbi mala Anutugö jitñi oñgitpilenbuköra keñgötñi qahö mötzal.

⁵ Mewö maljalmö, malö kianñön mönö keu söksök pöndañ jim niñgiba kamakzawañgöra olan nöhöiga ölöp bauköm wañgibiga keuñi teköma. Qahö bauköm wañgibileñak ewö, yañön mönö qösösök kaiga qeriqerini mötpilenbuk.’ ”

⁶ Kembunöŋ kösohot mi mem teköba jiyök, “Jimtekötekö azi gonŋonjan keu jiyöhi, mönö miangöra kezap ala könaŋi mötmöriŋet.

⁷ Anutunöŋ ambazip nanŋanŋöra möwölöhöm enŋiyöhi, yeŋön sunŋem asak bauköm enŋimapköra köulukögetka Anutunöŋ mönö yeŋö keuŋini kewöta jim teköi ölöwakŋe. Bauköm enŋimangö jiba tanŋan qahö aka nalö qahö könjörari öŋgöma. Mi qahöpmaöp!

⁸ Nöŋön kewö jibi mötket: Anutunöŋ mönö nalö kude köriiga keuŋini kewöta jim teköi ölöwakŋe. Wölan bauköm enŋimakzapmö, mi töndup Suep gölmegö azi ölnan lilingöba kaba ambazip kewöt enŋimawi, nalö miangöreŋ mötnariŋ ölni miwikŋaima me qahöpto?” Mewö.

Farisi aka takis meme yetkö köulukŋiri

⁹ Ambazip tosatŋan nanŋinanŋö mötket öŋgöiga solanŋi diŋdiŋi akzin jiba tosatŋi mötketka eretŋi ahök. Jisösnöŋ i enŋeka dopkeu kun kewö jii mötket,

¹⁰ “Azi yahötŋan jöwöwöl jikenöŋ öŋgöba köuluköyohot. Kunöŋ Farisi aka kunŋan takis meme azia.

¹¹ “Farisi (Köna keugö kapaŋkölköl) yaŋön kindan nanŋök kewö köuluköyök, ‘O Anutu, ambazip tosatŋan uruŋini gonŋiiga kalöpmaalöp aka sero yonŋorö ahakze, ni yeŋö dop qahö maljal me takis meme endu kinjawi, ni yaŋö dop mewöyök qahö maljal. Miangöra saiwap jim gihizal.

¹² Nöŋön sonda dop sömaŋi yahöt nenegö sinŋi malakzal. Nöŋön moneŋ inapni pakpak mendeŋda 10:nöhök mohok Anutugö buŋaya qemakzal.’

13 “Mewö köuluköyökmö, takis meme yañön wañgömñi kunöñ kindä Suepnöñ eu umamgö gamuñi möta böröñan jeñi esuhuba kewö köuluköyök, ‘O Anutu, siñgisöndok azi ni mönö ak kömum niñgiman.’

14 *Nöñön kewö jibi mötme: Yañön mönö Anutugö jeñe solaniba miriñe lilingöyökmö, Farisi (Köna keugö kapañkölköl) yañön mewö qahö. Denike yeñön nannini uruñini memba öngömei, Anutunöñ mönö i körek memba et al engimapmö, kunñan nannj uruñi memba etmawi, Anutunöñ mönö i memba öngöba al wañgima.” Mewö.

Jisösnöñ nahönbörat kötuetköm engiyök.

Mat 19.13-15; Mak 10.13-16

15 Ambazip tosatñan nahönbörat morömorö mewöyök enguañgita Jisösnöñ böröñan engimisirimapköra yañgöreñ kaget. Kagetmö, gwarek yeñön mi eka jim qetal ak engiget.

16 Mewö aketmö, Jisösnöñ nahönbörat mi köl öröm engii kagetka kewö jiyök, “Nahönbörat moröñi mi ölop engömosötketka nöñgöreñ kame. Anutunöñ ambazip mewö mia bemtohoñi buña qem engima. Mianğöra i kude jöhöm engime.

17 Nöñön keu öñji kun kewö jibi mötme: Kunñan Anutugö bemtohoñi mi nahönbörat ewö buña qahö qem añgumawi, yañön mönö mianğö uruñe añgotmamgö osima.” Mewö.

Jisösnöñ azi pomñi kungö qambañ keu jiyök.

Mat 19.16-30; Mak 10.17-31

* **18:14:** Mat 23.12; Luk 14.11

18 Galömkölköl azi kunjan Jisösgöreñ kaba kewö qesim wanjiyök, “Böhi ölopñi, nöñön mönö denöwö aka malmal köhöikñangö buña qem angubilenak?”

19 Qesim wanjiiga kewö jii mörök, “Gi nöngöra ‘Böhi ölopñi’, mi wuanöngöra jizan? Anutu mohotñan ölopñi akza. Azi kunjan i ewö ölopñi qahö akza.

20 *Gi jöjöpañ keu ki möt teközan, ‘Sero yongorö kude akñan, Ambazip kun kude qenöñ kömuma, Yongorö kude meman, Jitnöñ alal keu kude jiman, Iwinamgi mönö göda qem etkimakñan.’ ”

21 Mewö jiyökmö, galömkölköl azinöñ kewö jiyök, “Mi pakpak mönö gwaböneyök tem köla mala kotzal.”

22 Jii Jisösnöñ möta kewö jii mörök, “Mohotkungöra kewö osizan. Gi mönö anda sukinapki pakpak söngöröñi memegöra alnöñ monen kaiga menđenda ambazip wanapñi engiman. Mewö aknönga sukinapki ketani (guli masapu, milyön kina ewö) mi Suep mire ahöm gihima. Mewö aka ni nuatängöba kaman.”

23 Mewö jiyökmö, azi mianön kindinbirik malöhañgöra aka keu mi möta wösöbirik aka jeni asöliiga öne mosöta anök.

24 Wösöbirik ahöhi Jisösnöñ mi eka kewö jiyök, “Yei! Ambazip monen inapñinambuk yeñön mönö Anutugö bemtohoñnöñ angotpingö lömböriba kupuk-kapak akñe.

25 Mi kewö jim tuarimam: Sömbup ketani kamel mi kondi kinimje ölop qahö angotma. Miangö dop ambazip pomñi yeñön Anutugö bemtohoñ uruñe angotpingö lömböriba qaköme.”

* 18:20: Eks 20.12-16; Dut 5.16-20

²⁶ Keu mi jii mötkeri, yeñön kewö jiget, “Opopon! Ambazip danön mönö Suepkö buñaya akawak?”

²⁷ Mewö jigetka kewö melenök, “Ambazipnön mi esapköba osiba qakömakzemö, Anutunön mönö yuai pakpak ölop ahakza. Yeñön yuai kun aka memangö qahö osiba qakömakza.”

Jisösgö nup memegö töwanji

²⁸ Pitönön keu mi möta melennda kewö jiyök, “Mötnön, neñön mönö miri gölmenini mosöta gi guatangöba kain.”

²⁹ Mewö jiiga Jisösnön kewö jii mötket, “Nöñön keu ölni kun kewö jibi mötme: Kunñan Anutugö bemtohoñangöra aka yuai kun mosöröhi, - mi miri gölmeni, anöm-moröni, darumunji me iwinamji - mi engömosoriga

³⁰ Anutunön mönö salupñe toroqeba ongita likepñi melen wañgiiga mi gölmegö malmalnön mema aka malmal könangepñe malmal köhöikñi teteköni qahö buña qem anguma.”

Jisösnön kömumangö keunji jiiga karöbut ahök.

Mat 20.17-19; Mak 10.32-34

³¹ Jisösnön gwarekurupñi 12 mi öröm engii kagetka kewö jiyök, “Mötket, nini Jerusalem öngöbin. Kezapqetok ambazipnön Suep gölmegö azi ölnangöra keu pakpak ohogeri, mi mönö ölnambuk ak teköma.

³² Kunön i mamalolo mem wañgiiga kian gawman yeñgö böröñine gema. Yeñön jijiwilit aka mepaiköba keu töhöreñ jim wañgiba söutkölap qeme.

³³ Söutkölap qeba ihilek wahinambuknön tauköm wañgiba qeget kömuma. Kömumba wehön karöbut aiga kömupnöhök wahötma.”

34 Mewö jiyökmö, gwarek yeñon keu mi qahöpmahöp möt asariget. Keu jiyöhi, mi asa-asambötne ahöiga mi qahö möt kutuget. Mewö.

Jisösnöñ jegömöl azi kun mem ölöwahök.

Mat 20.29-34; Mak 10.46-52

35 Jisösnöñ anda Jeriko mire dopdowiiga jegömöl azi kunñan nene moneñ wañgimegöra uleta köna jítne tarök.

36 Tariga ambazip kambu könanöñ ongita angetka kourukñini möta “Wanat yuai asuhuza?” jiba qesim engiyök.

37 Qesim engiiga kewö jiget, “Jisös, Nazaret azinöñ mönö könanöñ kaba gongitmamgö akza.”

38 Jigetka kewö qerök, “Jisös, Deiwidkö gwölönarökñi! Gi mönö ak-kömum niñgiman!”

39 Mewö qeriga ambazip mutuk angeri, yeñon bök tatmapköra qetal wañgigetmö, yañon kapan köla qet gigilahöyök, “Deiwidkö gwölönarökñi! Gi mönö ak-kömum niñgiman!”

40 Qet gigilahöiga Jisösnöñ dörök ala kewö jim kutuyök, “I mönö böröñe memba nöñgöreñ kame.” Jiiga memba dowe kañgotketka kewö qesim wañgiyök,

41 “Alani! Gi mönö wani yuai ak gihimangöra mötzan?” Qesim wañgiiga jiyök, “Kembu! Ni jeni kunbuk umangöra mötzal.”

42 Jiiga Jisösnöñ kewö jii mörök, “Mönö jegi unöñ. Mötnaripkan mönö mem ölöwak gihiza.”

43 Mewö jiiga miangöreñök jeni tohoiga törörök uba Anutu möpöseiba Jisös wuatangöba andöñe anök. Ambazip pampak yeñon yuai mi eka Anutu möpöseiget. Mewö.

19

Zakiusnöh uruñi meleñnök.

¹ Jisösnöh Jeriko taonöh kañgota kutuba an-mamgö ahök.

² Mianğöreñ azi kun qetñi Zakius malök. Yañön azi pomñi aka takis meme yeñgö jitñememenina malök.

³ Yañön Jisösgö kaisongolomñi ekñamgö ak wañgiyökmö, azi töröptökñañgöra ambazip kambu sutñine kinda kökõriba osiyök.

⁴ “Jisösnöh ki kaba neñgoñgitma,” jiget möta ekñamgöra ösumök anda ambazip eñgoñgita sikamore ip* qakñe öñgõba tarök.

⁵ Tari Jisösnöh mianğöreñ añgota jeñan ui öñgõi eka yañgöra kewö jiyök, “Zakius, gi mönõ ösumök etnöh. Ni merak gõhõ mire kabi mohotñe tatpit.”

⁶ Mewö jiiga ösumök eta söñgaiba köl öröm wañgiiga miriñe anohot.

⁷ Anohotka ambazip körekñan mi eka irikuruk aka kewö jiget, “Mönõ wuanöñgöra siñgisöndok azi mewöñañgö mire öñgõba tatza?”

⁸ Mewö jigetmö, Zakiusnöh ambazip sutñine aukñe wahõta kinda Kembangöra kewö jiyök, “Kembu mötnöh, nõñön ainemalukuni bibiñe mendenða likepñi ambazip wanapñi yeñgöra eñgimam aka denike yeñgöreñ öroyuai kun dop oñgita tilipqilip aka wañgirali, mi mönõ ambemñi 4:gö dop toroqeba melenða eñgimam.”

⁹ Mewö jiiga Jisösnöh yañgö kõnañañgöra kewö jiyök, “Anutunöh merak miri kianğö tonji amõt

* **19:4:** Sikamore mi köwu ewöya, kötñi neneña.

qem wanġii letotza. Yanġon mewöyök Abrahamgö gwölnarökurupni yeŋgö sutġine malja.

10 *Suep gölmegö azi ölnan mönö ambazip sohogeri, mi jaruba amöt qem eŋgimamgöra aka erök.” Mewö.

Moneŋ esu 10 mendeŋda eŋgiyök, miangö dopkeu.

Mat 25.14-30

11 *Jisösnöŋ kaba Jerusalem siti dopdowiba keunġi jii ambazip mi mötkeri, yeŋön kewö mötmöriget, “Anutugö bemtohoŋaŋgö ölnan zilaŋ asuhuma.” Mewö mötmörigeranġöra Jisösnöŋ dopkeu kun kewö jiyök,

12 “Azi qetbuŋaŋambuk kunŋan kewö jiyök, ‘Ni mirini mosöta kantri kunöŋ köröwen anbiga miangöreŋ ni kiŋ kembu kuŋgum niŋgigetka mala liliŋgöba kamam.’

13 Mewö gölme köröwen anmamgö jiba nup aziurupni 10 eŋgoholi kagetka moneŋ esu 10 mendeŋda eŋgiba kewö jiyök, ‘Nöŋön anda mala bian liliŋgöba kamam. Eŋön nalö sutġe kianġöreŋ moneŋ kianġön kölköl-örörö nup memba mem sehime.’

14 Mewö jiba anökmö, könagesöurupŋan kazik ak wanġiba kewö jiget, ‘Nini azi kianġön nanine azi kembu aka galöm köl neŋgimapkö töközin.’ Mewö jiba welen azi tosatġi melaim eŋgiget andöŋe anda buzup mi jiget mörök.

15 “Mewö mörökmö, töndup kantri anök, miangöreŋ yeŋön i azi kembu kuŋgum wanġigetka nanġi prowinsnöŋ kunbuk liliŋgöba kayök. Kaba nup aziurupni moneŋ esu eŋgiyöhi, mi jiiġa yanġö jeŋe kaŋgotket. Mohot mohot yeŋön

* 19:10: Mat 18.11 * 19:11: Mat 25.14-30

kölköl-örörö nup memba monej mem sehigetka dawik asuhuyöhi, mi kondelget ekjamgöra qesim enjyök.

16 Nup azi mutukjan jeje kangota jiyök, ‘Kembu, nöñön monej esugi mem sehibiga toroqeba kunbuk esu 10 miwikñaijal.’

17 “Mewö jiiga kewö jii mörök, ‘Mi ölop. Gi nup meme azi ölopñi. Gi yuai morörökñi memba mi kapankapan aka galöm köla malnönga sehiyök. Miangöra nöñön taon gölme 10 mindiriba göhö böröge albi yengö galömñina malman.’

18 Mewö jiiga nup azi alañan jeje kangota kewö jiyök, ‘Kembu, nöñön göhö monej esugi mem sehibiga toroqeba kunbuk esu 5 miwikñaijal.’

19 Mewö jiiga yangöra mewöyök kewö jii mörök, ‘Mi ölop. Nöñön taon gölme 5 mindiriba göhö böröge albi yengö galömñina malman.’

20 “Kunbuk kunjan kangota jiyök, ‘Kembu eknöñ. Göhö monej esugi ki. Mi oponöñ esuhuba lolongöbi ahöyök.

21 Göñön azi könöpñambuk akzananğöra aka göhöra keñgötñi möta malal. Gi nangk inap yuai köwenöñ qahö alnöñi, mia töndup memangö mörakzan. Gi nangk nene kötñi qahö kömötnönga asuhuyöhi, miangö ölni mi töndup yandiba memangö mörakzan.’

22 “Mewö jiiga melenja kewö jim wanjyök, ‘Gi nup azi bölöñi. Nangk keu jizani, nöñön miangö dop kewöt gihiba likepñi melenj gihimam. Ni azi könöpñambuk akzal. Nanak yuai köwenöñ qahö ala mi memangö mörakzal. Nanak nene kötñi qahö

kömöta mianḡö ölni mi töndup yandiba memamḡö mörakzal. Mi ölop möta malnöḡ.

²³ Gi könani mewö mötagun mönö wuanöḡgöra moneḡ esuni mi benknöḡ qahö alnöḡga qariyök. Mi kölköl-örörö nupnöḡ albanak ewö, mianḡön mönö sehiiga nöḡön kaba suḡambuk membilenak.’

²⁴ “Mewö jiba azi kösutḡe kingeri, mi kewö jii mötket, ‘Inini mönö yaḡö böröḡeyök moneḡ esuḡi mi waḡgita esu 10 miwikḡaiyöhi, i waḡgime.’

²⁵ Jii möta kewö jiget, ‘Kembu, yaḡgöreḡ moneḡ esu 10 mi lök ahöza!’

²⁶ *Mewö jigetka melenḡa jiyök, ‘Nöḡön kewö jibi mötket: Ambazip yuai ahöm enḡizawi, yeḡgöra körek mönö mi toroqem enḡigetka sehimapmö, kungöreḡ yuai kun qahö ahözawi, morörökḡi mia mönö mewöyök waḡgitketka öne töhöḡ malma.’

²⁷ Mewö jizalmö, kerökurupnan nöḡön kiḡ kembu aka galöm köḡ enḡimamḡö tökögeri, i mönö enḡuaḡgita kaḡetka enḡeka jim kutubi enḡuḡetka kömume.’” Mewö.

Jisösgöra köiraḡ köḡgetka Jerusalem öḡgöyök.

Mat 21.1-11; Mak 11.1-11; Jon 12.12-19

²⁸ Jisösnöḡ keu mi jim teköba mosöta Jerusalem sitinöḡ öḡgömamḡöra mutuk anök.

²⁹ Anda Betfage aka Betani miri yahöt kösutḡire kaba kundunḡi qetḡi Oil ip kundunḡi qerakzei, mianḡöreḡ öḡgöba ḡwarekyahötḡi yahöt melaim etkiyök. Melaim etkimamḡö aka

³⁰ kewö jiyök, “Miri wösöḡire tatzawi, mönö mianḡöreḡ anmahot. Anda mianḡöreḡ aḡgota

* **19:26:** Mat 13.12; Mak 4.25; Luk 8.18

donki moröni kösönön jöhöget kinjawi, mi mi-wikñaimahot. Donki mi dölökña, azi kunön qakñe qahö tatatña. Mi mönö pösata memba ki kamahot.

³¹ Pösarohotka kunñan ‘Mi wanigöra pösatzahot?’ jiba qesim etkiiga kewö jimahot, ‘Kembuniran miangöra osiza.’ ”

³² Mewö melaim etkiiga anda jiyöhangö dop mi-wikñaiyohot.

³³ Miwikñaiba donki moröni pösatpitkö ahotka toñan jiget, “Hei! Donki moröni mi wanigöra pösatzahot?”

³⁴ Jigetka kewö melenohot, “Kembuniran miangöra osiza.”

³⁵ Mewö jiba memba Jisösgören kaba malukuñini qeköba donki qakñe tumbula jigetka Jisösnön öngöba tarök.

³⁶ Mewö tata aniga ambazip kambu yeñön göda qeba opo malukuñini qeköba köna namñe tumbulget.

³⁷ Tumbulgetka anda Jerusalem dopdowiba Oil ip kundunangö sörökñe geiga gwarek kambu pakpak yeñön könahiba söngaiba angöletot pakpak kukösum qakñe mei ekeri, miengöra qet ketani qeta Anutu möpöseim wangiba

³⁸ *kewö jiba qetket, “Anutu möpöseizin. Kiñ Kembangö qetñe kamawi, Anutunön mönö i kötuetköma. Luaigi aka qetbuñagi möpöseininga Suepnön euyangören öngöza. Owe owe!”

³⁹ Mewö qetketka Farisi (Köna keugö kapankölköl) tosatñan ambazip kambu sutñine

* **19:38:** Sum 118.26

kinda kewö jim wanġiget, “Böhi, mönö gwarekurupki jim enġinöŋ.”

⁴⁰ Mewö jim wanġigetka kewö melenök, “Nöŋön kewö jibi mötme: Yeŋön göröŋ kinbeak ewö, köt yeŋön mönö silata qetpeak.” Mewö.

Jisösnöŋ Jerusalem sitigöra sahörök.

⁴¹ Jisösnöŋ Jerusalem dopdowiba siti mi eka sahörök.

⁴² Sahöta kewö jiyök, “Enġoreŋ luai denöwö ahubawak! Inġini mianġö könaŋi wehön kianġoreŋ möt kutugetka dop kölbawakmö, nalö kewöŋe mi jeŋini qahö tohozawanġöra aka tölapŋe ahöza.

⁴³ Mianġö könaŋi kewö: Nalö kun kam kuŋgumawi, mianġoreŋ kerök yeŋön kaŋgota kiripo köhöikŋan siti ki kuŋgum liliköba likeplikap eu emu kinda gwan ala kahasililiŋ ak enġime.

⁴⁴ Anutunöŋ mesohol köla enġoholiga inġini nalö bohonŋi mi qahö möt kutuba nesampurek aka Anutu andö qeba laŋ mala kotzei, mianġöra kerök yeŋön köndenmönden enġigetka mirigö köt kun mi köt kungö qakŋe qahö kinmapmö, siti kianön mönö qeqelanlaŋ ahöma. Yeŋön jike mirinġini köndenġa moröurupŋini siti uruŋe maljei, mi enġum ureime.” Mewö.

Jisösnöŋ jöwöwöl jike jim kömbuhiyök.

Mat 21.12-17; Mak 11.15-19; Jon 2.13-22

⁴⁵ Jisösnöŋ keu mi jim teköba jöwöwöl jikegö tohoŋ uruŋe anda inap bohonŋi memegöra algeri, mi könahiba közöl enġiiga etket.

⁴⁶ *Közöl enġiba kewö jii mötket, “Aisaianöŋ keu kun kewö ohoi ahöza, ‘Nöŋgö jikenan mönö

* **19:46:** Ais 56.7; Jer 7.11

köulukö mirinjina akña. Keu mi ahözapmö, injini mi utekögetka kegwek-kahasililin yengö banjet ewö akza.”

⁴⁷ *Jisösnöñ nalö dop jöwöwöl jikenöñ öngöba Buña keu kusum engiba malök. Mewö malökmö, jike nup galöm aka Köna keugö böhi yeñön tokoba kantri jike kaunsöl yembuk eraum möta kewö jiget, “Mönö denöwö jiinga qegetka kömumbawak?”

⁴⁸ Mewö jigetmö, ambazip kambu pakpak mienön yambuk qekötahöba Buñaji kezap ala mötket. Miangöra “Mönö denöwö akinak?” jiba köna kun qahö miwikñaiget. Mewö.

20

Jitnememe yeñön Jisösgö kukösumñangö qesiget.

Mat 21.23-27; Mak 11.27-33

¹ Jisösnöñ jöwöwöl jikenöñ öngöba ambazip kambu kusum engiba Ölöwak Buña jim asarim engiba malök. Nalö kunöñ mewö aiga jike nup galöm aka Köna keugö böhi yeñön kantrigö jitnememe tosatñi yembuk Jisösgö jeñe kangotket.

² Kangota kewö qesim wañgiget, “Gi kiangören yuai akzani, mi mönö dañön jim kutum ghiiga ahakzan? Miangö kukösumñi mi dañön ghihiyök? Mi jinöñga mötpin.”

³ Qesim wañgigetka kewö melen engiyök, “Nöñön mewöyök qesim engibi mi jiget mötmam.

⁴ Jonöñ ambazip o-melun mem engiba malöhi, yañön miangö kukösumñi mi denikeyök meyök? Suet Tonjan wañgiyök me gölme tonjan wañgiget?”

* **19:47:** Luk 21.37

⁵ Mewö melenj enjiiga sutñine eraum möta kewö jiget, “ ‘Kukösumñan Suepnöhök asuhuyök,’ mewö jibin ewö, yañön mönö kewö jima, ‘Mewö aiga injini i mönö wuanöngöra qahö möt narim wanjiget? Mi qahö dop kölja.’

⁶ Könagesö pakpak yeñön Jongöra ‘Kezapqetok azia akza,’ jiba mi köhöikñanök möt nariba malje. Miangöra ‘Gölme ambazipnöhök asuhuyök,’ jibin ewö, yeñön mönö irimñini seholiiga kötnöñ neñgume.”

⁷ Keu mewö kewöta kewö melenget, “Kukösumñan denikeyök ahuyöhi, nini mi qahö mötzin.”

⁸ Mewö melengetka Jisösnöñ kewö jii mötket, “Mewö aiga nöñön mewöyök yuai ki ahakzalanö kukösumñi danñön niñgiyök, mi qahö jibi mötme.” Mewö.

*Wain kösö nup galöm bölöñi, miengö dopkeu
Mat 21.33-46; Mak 12.1-12*

⁹ *Jisösnöñ könahiba ambazip dopkeunöñ kewö jii mötket, “Azi kunñan wain kösö nup köla kömörök. Köl kömöta nup galöm tosatñi miwikñaim enjiba jiiga nupñi memba ölnangö bahöñi nanñini memba bahöñi toni wanjimegöra böröñine alök. Böröñine ala enğömosöta kantri kunöñ anda nalö köröñi malök.

¹⁰ “Mala mali ölni öliyöhangö nalöñi (yambu 5) töriiga miangörenj welenqeqeñi kun melaim wanjiiga galöm yengörenj anda wain nup ölnangö bahöñi wanjimegöra jiyök. Jiyökmö, nup galöm yeñön i kömbinöñ qeba wuatangögetka böröñi börak liliñgöyök.

* 20:9: Ais 5.1

11 Miangö andöŋe welenazi kun melaim waŋgiiga anökmö, i mewöyök kömbinöŋ qeba gamu qem waŋgiba wuatangögetka böröŋi börak lilingöyök.

12 Lilingöiga nup toŋan welenazi kun kunbuk melaii aniga ambemŋi karöbut ahökmö, i mewöyök sepgwörörök qeba nup yaigepŋe gilget geyök.

13 “Mewö aketka wain nup toŋan keu jaruba jiyök, ‘Mönö denöwö akŋamto? Nani wölböt nahöni mönö melai biga ani i eka göda qeme me denöwö?’

14 Mewö jiba nahönŋi melaiiga anökmö, wain nup galöm yeŋön i eka sutŋine kewö eraum möta jiget, ‘Yaŋön mönö börösamotŋangö toŋi akŋa. Ayop, i mönö qein kömuiga wain kösö nup kianön mönö nanine buŋanina akŋa.’

15 Mewö jiba gilgetka nup yaigepŋe geiga qeget kömuyök. Wain nup toŋan mi möta mönö denöwö ak eŋgima?

16 Yaŋön mönö nanŋak kaba nup galöm mi köndenŋ eŋgima aka nup galöm döläkŋi miwikŋaim eŋgiba wain kösö nupŋi yeŋgö böröŋine alma.” Jisösnöŋ dopkeu mewö jii möta jiget, “Mi qahö dop kölja. Yapmakek!”

17 *Jigetmö, Jisösnöŋ i törörök eŋgeka kinda kewö jiyök, “Buŋa Kimbigö keu kun kewö ahöza, ‘Miri meme yeŋön köt tandö kun andö qeba öne mosötket taröhi, mianön mönö tandö kömbönaŋi aiga miwikŋaiget.

Mianön tiŋgiriga mirinöŋ mönö gororongöba eta köлма.’ Keu miangö könaŋi denöwö?

* 20:17: Sum 118.22

18 Mianğöra kewö jibi: Kunjan tandö bohonji mianğöreñ tötöngata eta qemawi, mi mönö silenji kutumutumapmö, ain tandö mianjön jöla tala kungö qakne eta kölmawi, mi mönö körek qözömözözamöma.”

19 Jisösnön mewö jiiga Köna keugö böhi aka jike nup galöm yeñön keu mianğö könanji möt asariba kewö jiget, “Dopkeu mi mönö neñğöra jiza.” Mianğöra i nalö mianğöreñök memba jöhöbingö mötketmö, ambazip kambu yeñğöra keñğötjini möta osiget. Mewö.

Takis alalgö Jisös esapköm wañgiget.

Mat 22.15-22; Mak 12.13-17

20 Juda jitnememe yeñön Jisösgö jegalöm meget. Mewö memba keunji kun qiwitipköi keugö bötaknön öroi gwaröhöm wañgimeğöra aka azi tosatni melaim enğiget yangöreñ kaget. Opotöröp aka premiö yeñğö böröñine al wañgibingö möta Buña keu ölöpnji jiji tandök aka qesiba keuñangö kezap alget.

21 Areñ mewö ala qesiba kewö jiget, “Böhi, nini göhö könagi mötzin. Göñön keu diñdiñi jiba kusum neñgimakzan. Göñön ambazip tosatni qahö engek soriba tosatni qahö qepureim enğimakzanmö, dop mohotnön kewöt neñgimakzan. Mewö aka Anutugöreñ köna mi keu ölnangö dop kusum neñgimakzan.

22 Mianğöra nini sisa-kingöra takis ala mianjön Mosesgö Köna keu siñgibin me qahö?”

23 Mewö jigetmö, Jisösnön isimkakalek areñini möt kutuba kewö jii mötket,

24 “Ölöp silwö moneŋ (Kina 5) kun kondel niŋgigetka eki. Dagöreŋ imut aka qet mi mianğöreŋ ohoget ahöza?” “O, mi sisa-kiŋğöreŋ,” mewö melenđa jiget.

25 Jigetka kewö jii mötket, “Mewö aiga yuai sisa-kiŋğö imutŋambuk buŋaŋi akzawi, mi mönö yaŋğöra al waŋgime. Yuai kun Anutugö buŋaya akzawi, mi mönö Anutugö buŋa qeme.”

26 Jisösnöŋ mewö jiyöhaŋğöra ambazip kambu yeŋğö jeŋine keugö bötaknöŋ al waŋgibingö osiba keuŋaŋğöra welipköba keu bök kinget. Mewö.

Kömupnöhök wahötwahötkö Jisös esapköm waŋgiget.

Mat 22.23-33; Mak 12.18-27

27 *Sadyusi böhi pati yeŋön “Kömugeri, yeŋön kude wahötme,” jiba malget. Yeŋğöreŋök tosatŋan Jisösgö jeŋe kaŋgota kewö qesim waŋgiba

28 *jiget, “Böhi, Mosesnöŋ kewö jim kutum neŋgiyök ahöza, ‘Azi kun ambi meiga nahönbörat qahö ahui kömuiga munŋan ölop malöŋi memba mala gwölönarök qiwikŋaim waŋgiiga datŋaŋğö qet bisiba malma.’

29 “Mötnöŋ! Nalö kunöŋ darumun 7 malget. Datŋini mutukŋan ambi memba mala gwölönarökŋi qahö öne mala kömuyök.

30 Kömuiga munŋan malöŋi mi meyök.

31 Mianğö andöŋe munŋi kunŋan ambi miyök meyök. Mewöŋa mewö darumun 7 pakpak yeŋön ambi mohok miyök memba gwölönarök qahö mala kömum teköget.

* 20:27: Apo 23.8 * 20:28: Dut 25.5

32 Kömugetka tekögetka qöndökñi malöñini mi mewöyök kömuyök.

33 Göñön 'Kömugeri yeñön guliba wahötme,' jizanmö, nini mi qahö möt narizin. Mötnöñ, azi 7 pakpak mi öröröñ wahötpeak ewö, ambi mohok mi anömñina meget malöhañgöra aka mönö dagö anömña akawak?"

34 Mewö jigetka Jisösnöñ kewö melenök, "Nalö kewöñe gölme kiangöreñ ambazip awanöm aka malahakze.

35 Mi malahakzemö, ambazip uruñini melengetka Anutunöñ eka möri dop köliga kömupnöñök wahöta miri gölme kun euyangöreñ añaota malmei, yeñön miangöreñ qahö amime.

36 "Miangö könañi kewö: Mötnarip ambazip guliba kömupnöñök wahötmei, yeñön Anutugö nahönböraturuñi akze. Yeñön Suep garata tandök ewö aka kunbuk qahö kömumemö, teteköñi qahö mal öñgöme.

37 *Mötket! Kömugeri, yeñön guliba wahötmegö keuñi mi Mosesnöñ mewöyök nañgöba jiyök. Ip köhösnöñ köñöp bölam ahuba qahö jem kutuyöhi, yañön mi eka kösohotñi ohoi miangöreñ keu kewö ahöza, 'Nöñön Anutu Abrahamgö Kembu, Aisakö Kembu aka Jeikobkö Kembuya mala kota maljal.'

38 Isik bömön karöbut yeñön Anutubuk mala mal köhöiba öñgöme. Körek köhöiba maljei, yeñön mönö malmalñini Anutugöra malje. Miangöra Anutunöñ köhömuñi yeñgö Kembuñini qahöpmö, malmal köhöikñi maljei, mönö yeñgö Kembuñina akza."

* 20:37: Eks 3.6

³⁹ Jisösnöŋ mewö melenŋiga Köna keugö böhi tosatŋan melenŋa kewö jiget, “Böhi, mi törörök jizan.”

⁴⁰ Mewö jiba keu kun kunbuk qesim waŋgingö kölköldömdöm aka mosötket. Mewö.

Kraist mi kiŋ Deiwidkö Kembuŋi aka gwölönarökŋi.

Mat 22.41-46; Mak 12.35-37

⁴¹ Jisösnöŋ keu kun kewö jii mötket, “Kraistnöŋ Kiŋ Deiwidkö gwölönarökŋi akzawi, tosatŋan keu mi denöwögöra jimakze?”

⁴² *Deiwidnöŋ nanŋak keu kewö jiiga Sumbara (Buŋa liŋet, sam) Kimbinöŋ ahöza, ‘Anutunöŋ kinda nöŋgö Kembuni kewö jii mörök, Göŋön mönö kaba nöŋgö böröni ölje tatnöŋga

⁴³ nöŋön nalö sutŋe kerökurupki tim tötala luhut al eŋgiba göhö köna tambö gwaröŋe al eŋgimam.

Nalö mi kam kuŋgumawaŋgö dop mönö asakmararaŋnöŋ ki tatman.’

⁴⁴ Deiwidnöŋ mewö jiba qetŋi ‘Nöŋgö Kembuni’ jiza. ‘Kembuni’ jiba mönö denöwö aka yaŋgö gwölönarökŋi mohot akawak?” Mewö.

Urumelenŋö silesile malmalgö galöm meme keu
Mat 23.1-36; Mak 12.38-40; Luk 11.43

⁴⁵ Jisösnöŋ gwarekurupŋi yeŋgöra keu kewö jiiga ambazip kambu pakpak mi mötket,

⁴⁶ “Köna keugö böhi yeŋgöra mönö galömnini memba malme. Yeŋön maluku köröpŋi löŋgöta anda kaba kondel aŋgubingö mörakze. Maketnöŋ

* **20:42:** Sum 110.1

me kōnanōḡ ambazip eḡgeketka jōlōḡini jimeḡō mōrakze. Mewōyōk kōuluk mire qaikḡe eu tatpingō sihimḡi mōrakze aka kōzōlōmbuaḡnōḡ dum tatat mutukḡe jeḡep tatpingō mōrakze.

⁴⁷ Yeḡōn malō yeḡōreḡ miri yuai bidanḡa gagabe kōla eḡguaḡgirakze aka qetbuḡaḡini asuhumapkōra kōuluk kōrōḡḡi kōulukōba tōptōḡḡine qemakze. Mianḡōra Anutunōḡ keuḡini jim tekōba likeḡḡi ōḡḡōḡḡi meleḡni qakḡine ōḡḡōma.” Mewō.

21

Ambi malō kunḡan naluk kōtin ōlḡi alōk.

Mak 12.41-44

¹ Jisōsnōḡ kindā ui ani ambazip pomḡi yeḡōn nalukḡini mi naluk dundumḡe alget geyōk.

² Alget geiga ambi malō wanapḡi kunḡan kaba souje kōḡḡi pisikḡi yahōt ali geyōhi, mi mewōyōk ehōk.

³ Mi eka kewō jiyōk, “Nōḡōn keu ōlḡi kun kewō jibi mōtket: Malō wanapḡi kianḡōn naluk aljawi, mi mōnō tosatḡi pakpak eḡḡōḡita alja.

⁴ Mianḡō kōnanḡi kewō: Kōrek yeḡōn moneḡ ke-taḡi ahōm eḡḡiiga kitipḡanōhōk aljemō, ambi kianḡōn kōruebōrue maljawaḡḡō dop yuaiḡi pakpak al tekōba ōne tōhōn malma.” Mewō.

Jōwōwōl jikenōḡ kōnderḡmōnderḡ asuhuma.

Mat 24.1-2; Mak 13.1-2

⁵ Jerusalem jōwōwōl jike mi kōt eksihimḡambuk aka kalemḡi kalemḡi Anutugōra algeri, mianḡōn meḡōlōgetka akōdamunḡambuk ahōyōk, gwarek tosatḡan mi eka eraum mōtketka Jisōsnōḡ keu kewō jii mōtket,

⁶ “Miri ki engekzei, mi mönö köndengetka mirigö köt kun mi köt kungö qakŋe qahö ahömapmö, qe-qelanŋan aka sahopŋanök ahöma.”

Kahasililiŋ aka sesewerowero asuhuma.

Mat 24.3-14; Mak 13.3-13

⁷ Mewö jiiga möta qesim waŋgiget, “Böhi, keu jizani, miangö ölni mönö wanat nalönöŋ asuhum tiŋgitma aka asuhumangö akŋawi, miangö ai-wesökŋan mönö denöwö asuhuma?”

⁸ Qesim waŋgigetka kewö jiyök, “Kunŋan isimkakalek aiga janjuŋ anbepuköra mönö galömŋini memba malme. Ambazip gwötpukŋan asuhuba nöngö qetne kewö jime, ‘Nöŋön Kraist akzal,’ aka, ‘Nalönöŋ mönö töriza.’ Mewö jimemö, eŋön mönö yeŋgö andöŋine kude anme.

⁹ Yarö aka karimŋi karimŋi asuhugetka ötoŋini mötmemö, jönömŋini kude unduma. Yuai mi mutuhök asuhumapkö jijiŋa. Mi asuhumapmö, gölmegö nalöŋan mönö miangöreŋök zilaŋ qahö teköma.”

¹⁰ Mewö jiba toroqeba kewö jii mötket, “Kantri kunöŋ kantri kun enġubingöra wahötme. Ambazip kambu kunöŋ kambu kun yembuk aröŋ aŋgubingöra wahötme.

¹¹ Gölmeŋi gölmeŋi miangöreŋ kenöŋ ketanji ketanji qözöla memba gölme melenji gemakŋa. Mewöyök bödiŋi bödiŋi (buöröŋi buöröŋi) asuhuba öngöba ahöma. Kawöl köhöikŋi köhöikŋi mienöŋ asuhugetka sesegilgil kömumakŋe. Suepnöŋ ai-wesök ketanji jemurutŋi murutŋi enġeka keŋgöt kotkot akŋe.” Mewö.

Ölöwak Buŋagöra kerök asuhuma.

Mat 24.9-14; Mak 13.9-13

¹² “Yuai pakpak mi asuhumemö, mutuk qeljiŋe tosatŋan iŋini uruŋini melenŋeraŋgöra aka eŋgömembra jöhöba sesewerowero ak eŋgime. Tosatŋan öröm eŋgiba köuluk miriŋine keu nupŋini memba jim tekögetka kösö miriŋi miriŋi mianŋöreŋ al eŋgime. Tosatŋan nöŋgö qetnaŋgöra aka eŋguaŋgitetka kantriŋi kantriŋi yeŋgö kiŋ kembu aka premiö yeŋgö jemesoholŋine kinme.

¹³ Mewö kinda nöŋgö könaŋamni naŋgöba jigetka mötme.

¹⁴ *Keu jakeŋe al eŋgigetka kinmei, nalö mianŋöreŋ keu denöwö jibinak, mianŋö waimanjatŋi qeljiŋe kude mötme. Keu mi mönö urukönömŋine algetka ahöma.

¹⁵ “Mi kewögöra: Nöŋön embuk kinda mötkutukutu eŋgiba numbuŋini mem anqemam. Uruawamŋanök malgetka tuarenjoŋurupŋini yeŋgöreŋök kunŋan mötkutukutu mi qetala keuŋini qeapköba memba et al eŋgibingö osima.

¹⁶ Nanŋini iwinam, darumun, tinitosolom aka alaurupŋini yeŋön mewöyök aŋgönaŋ mem eŋgigetka eŋgöreŋök tosatŋi eŋgugetka kömume.

¹⁷ Kantri pakpak yeŋön nöŋgö qetnaŋgöra aka kazik ak eŋgigetka malme.

¹⁸ “Mewö malmemö, nöŋön köyan köl eŋgibi nöropŋinaŋgö juŋŋi kunŋan qahö sohoma.

¹⁹ Iŋini kapaŋ köla köhöiba böŋ qeba kinda mi-aŋön mönö luhut ala oyaenkyoaeŋ malmal buŋa qem aŋgume.” Mewö.

* **21:14:** Luk 12.11-12

*Jerusalem sitigö köndenmönden uru-önönambuk
Mat 24.15-21; Mak 13.14-19*

²⁰ “Könanjep yarö kambu yejön kangota Jerusalem siti liliköba gwan almei, injini mi eka miangören kewö mötmörime, ‘Siti bohonji köndenmöndenmegö nalöjan mönö kam kuŋguza.’

²¹ Nalö miangören Judia prowinsnöj malmei, ejön mönö misingöba öröba kunduje anme. Sitingön malmei, ejön mönö siti mosötme. Siti yaigepne mire malmei, ejön mönö sitinöj kude anme.

²² *²² “Mi kewögöra: Buja Kimbinöj kezapqetok keu ohoget ahözawi, mi pakpak mönö öljambuk akja. Keu miangö dop Anutunöj nalö miangören singisöndokninangö likepni melenja qakjine ali öngöma.

²³ Anutunöj Israel könagesö singisöndokninangöra irimni seholiiga kazikni kondel engiiga gölmenöj kahasililij keta bölökni asuhuma. Ambi gölömbuk aka morö juzunöj yejön mönö nalö miangören denöwö ösumjan anbeak? Miangöra Yei! jizal.

²⁴ “Köndenmönden miangören ambazip tosatji mi bimgö sou ketanjan engugetka kömume. Tosatji kösö gwaröhöm engiba enguangetketka kantri pakpak yejgö sutjine angotme. Angotketka kian kantri yejön kangota Jerusalem tiamgöba malme. Mewö malgetka Anutunöj nalöjini tohot qei tatzawi, mi-anön kam kuŋguiga mosötme.” Mewö.

*Suep gölmeqö azi öljän mönö asuhum tingitma.
Mat 24.29-31; Mak 13.24-27*

* **21:22:** Hos 9.7

25 **“Wehön aka köinj jeñire aka senjelau miangörej aiwesök murutñi murutñi asuhume. Köwetnön siri qegetka ötön ketanj ahumakzawangöra gölmegö kantri pakpak yejön tötbörömñini kaiga wahöjalin möta malme.*

26 *Mewö malgetka suepnön uturuköiga miangö öröyuaini mi tatatñini mosöta enjololon aketka sohoma. Miangöra gölmenji gölmenji miangörej lömböt bölönji kötökñi asuhumapköra mamböt-torok mala kenjötñini möta urunini duhuiga jegilgil akñe.*

27 **“Nalö miangörej Suep gölmegö azi ölni yanön kousu çakñe kanjori ekñe. Kukösumñi ketanjan saköl-diñdiñambuk aukñe asuhuiga asakmararanji ekñe.*

28 *Mewö kanjotmapmö, yuai mi könahiba asuhumei, enön mönö nalö miangörej Suepnön öngöbingö nalöñinan törimawangöra nöropñini uba wahöta urunini qezaköba awösamkakak kinme.”* Mewö.

Geröp ipkö dopkeu

Mat 24.32-35; Mak 13.28-31

29 *Jisösnön dopkeu kun kewö jii mötket, “Injini geröp aka ip tosatñi mi eka tandökñini mötme.*

30 *Ip mi sinñan yonjoigetka mi eka miangö könaji nanñinak möt asariba kewö jimakze, ‘Wehön nalöñan lök dopdowiza.’*

31 *Enön mewöñanök keu jizali, miangö ölnan asuhuiga eka möt asariba könaji kewö jime, ‘Anu-tugö bemtoñan mönö dopdowiza.’*

* **21:25:** Ais 13.10; Eze 32.7; Joel 2.31; Ind 6.12-13 * **21:27:** Dan 7.13; Ind 1.7

³² “Nöñön keu ölni kun kewö jibi mötket: Ambazip merak gölmenöñ maljei, yeñön qahö kömugetka yuai pakpak jizali, mi mönö yeñgö malmal nalöñine asuhuma.

³³ Suep gölmenöñ göröñ qemahotmö, nöñgö Buña keunan mönö qahö ayapköma.” Mewö.

Urugwölö mosöta köhömuñi malbinbuk.

Mat 24.42-44; Mak 13.33-37

³⁴⁻³⁵ “Nalö ketani mianjön ambazip körek gölmenöñ maljei, yeñgö qakñine mewö asuhuma. Mianjöra mianjön wölañök kaba simba ewö qeraköm enjibapuk. Mianjöra gölmenöñ malmalgö waimanjatñan qakñine öngöiga közölömbuan ala o köhöikñi negetka enjololöñ aiga uruñinan lömböribapuköra mönö galömñini mem anjuba malme.

³⁶ “Mianjöra mönö nalö dop urugwölö mala köuluköba malme. Mewö malgetka ösum enjiiga yuai pakpak mi asuhumawi, mianjögö uruñeyök kök ala mönö Suep gölmegö azi ölnanjögö jemesoholñe awösamkakak kinme.” Mewö.

³⁷ *Nalö mianjögöreñ Jisösnöñ wehön dop jöwöwöl jikenöñ kinda Buña kusum enjiiga miri mare aiga mosöta kundunji qetñi Oil ip kundunji qerakzini, mianjögöreñ öngöba ahömalök.

³⁸ Mewö maliga ambazip kambu pakpak yeñön wehön dop söñanök jöwöwöl jikenöñ öngöba Buñanji jii mötpingöra yanjögöreñ kamalget. Mewö.

* **21:37:** Luk 19.47

22

Jisös qein kömumapkö anğönañ alget.

Mat 26.1-5; Mak 14.1-2; Jon 11.45-53

¹ *Mewö malgetmö, beret yistñi qahö mianğö sösöngainji, qetñi kun Pasowa kendon jimakzin, mi töriyök.*

² Töriiga mianğöreñ jike nup galöm aka Köna keugö böhi yeñön ambazip kambu yeñgö keñgötñini mötkerañğöra aka nanninök tokoba “Denöwö aHINGA qeget kömumbawak,” jiba köna jaruba mötmöriget.

Judasnöñ Jisös mamalolo mem wañgimamgö uru-mohok ahök.

Mat 26.14-16; Mak 14.10-11

³ Nalö mianğöreñ Satanöñ Judasgö uruñe geyök. Judas mi Jisösgö gwarekurupñi 12 yeñgöreñök kun. Kariot mireyök kayöhañğöra qetñi kun Iskar-iot qetket.

⁴ Yañön jike nup galöm aka jikegö kiripo galöm bohonñi yeñgöreñ anda Jisös mamalolo memba böröñine almamgö keuñi jiyök.

⁵ Yeñön mi möta “Ayop!” jiba uruñinan ölöwahiga söngöröñi moneñ wañgibingö keu jöhöget.

⁶ Keu jöhögetka Judasnöñ Jisös ölöñ mamalolo memba böröñine almamgö köna möt jaruba köinbingöba malök. Mewö.

Jisösnöñ gwarek yembuk Pasowa lama neget.

Mat 26.17-25; Mak 14.12-21; Jon 13.21-30

* **22:1:** Eks 12.1-27 * **22:1:** Pasowa mi nanine keunöñ neñgehoriba neñgongirök. Eksodus 12.15

⁷ Beret yistņi qahö mianğö kendon silim kunöņ Pasowa lama qeba ohozema. Nalö mianön kam kunğuyök.

⁸ Jisösnöņ Pitö aka Jon kewö jiba melaim etkiyök, “Injiri anda Pasowa lama mözözömgöyohotka nembin.”

⁹ Mewö jiiga qesim waņgiyohot, “Mi denikeaņğoreņ anda mözözömgöbit?”

¹⁰ Qesim waņgiyohotka kewö melenök, “Mörohot! Injiri sitinöņ aņgorohotka azi kun o kimbut kunduta kaiga miwikņaimahot. Miwikņaiiba i wuatañğöba anda mire öņğömawi, mianğoreņ öņğömahot.

¹¹ Öņğöba miri toni kewö jiyohot mötma, ‘Böhinöņ göhöra jiza: Ala mirigi denike? Neņön ölop mianğö uruņe kaba gwarekurupni yembuk Pasowa lama nembin?’

¹² Mewö jiyohotka möta miri qakņe eu öņğöba uruņi ketani kun kondel etkima. Mianğoreņ dum tatat yuai mözözömgöget ahöza. Mi kondel etkiiga mianğoreņ lama qeba ohomahot.”

¹³ Mewö jii anda Jisösnöņ keu jiyöhi, mianğö dop miwikņaiiba kinda lama qeba ohom mözözömgöyohot. Mewö.

Kembubuk semön qöndökņi neget.

Mat 26.26-30; Mak 14.22-26; Jon 13.21-30; 1 Kor 11.23-25

¹⁴ Nene nalöņan kaiga Jisösnöņ aposolurupņi yembuk nene nembangö eta tatket.

¹⁵ Tatketka kewö jii mötket, “Nöņön Pasowa lama ki embuk nembangö gwötpuk ak niņgiba malök. Nene ki nembagun mönö sihimbölo mötmam. Mianğö nalöņan töriza.

16 Mi törizawaŋgöra kewö jibi mötket: Nöñön Pasowa lama kĩaŋgöreŋ kun toroqeba qahö nemam. Könaŋgep nene semön kĩaŋgö ölŋan aukŋe asuhumawi, mi Anutugöreŋ bemtohoŋ uruŋe eu-yaŋgöreŋ nemam.”

17 Mewö jiba wain qambi memba kötuetköba kewö jiyök, “Mönö ki memba nanŋinak aŋguba neme.

18 Nöñön kewö jibi mötket: Ni wain kösögö ölŋi kĩaŋgöreŋ kunbuk toroqeba qahö nemam. Kunkbuk nemami, mi Anutugöreŋ bemtohoŋ asuhum teköiga miaŋgöreŋ nemam.”

19 Mewö jiba beret memba kötuetköba mindipköba eŋgiba kewö jiyök, “Ki nani busuni. Ki eŋgöra aka tököm eŋgizal. Nemba ni mötmörim niŋgiba malme.”

20 *Mi eŋgii negetka mewöŋanök wain qambi memba kewö jiyök, “Qambi ki mi jöhöjöhö areŋ dölökŋi akza. Nöñön amöt qem eŋgimangöra aka sepni mokoba kömumam. Sep miaŋön mönö Anutugöreŋ jöhöjöhö areŋi mem köhöima.

21 *“Mewö akzappmö, mötket, mamalolo mem niŋgimawaŋön mönö mohotŋe ki nene memba tatziŋ.

22 Ölŋa, Anutunöŋ jim kutuyöhi, Suep gölmegö azi ölŋan mönö miaŋgö dop gölme mosöta anma. Anmappmö, mamalolo mem waŋgimawi, yaŋgöra mönö wölziköba ‘Yei!’ jizal. Anutunöŋ mönö likepŋi öŋgöŋgöŋi melenŋ waŋgima.”

23 Mewö jiiga gwarekurupŋan könahiba sutŋine eraum qesim aŋguba jiget, “Neŋgöreŋök mönö

* 22:20: Jer 31.31-34 * 22:21: Sum 41.9

dañön mamalolo mem wañgibawak?” Mewö.

Gwarek yeñön sutñine goranora aket.

Mat 20.25-27; Mak 10.42-44

24 * “Gwarek neñgöreñök galöm bohonñi mi dañön akza?” mewö jigetka mianğöra mewöyök sutñine goranora asuhuyök.

25 * “Mi asuhuiga Jisösnöñ kewö jii mötket, “Gölmegö kantriñi kantriñi mienğö kiñinan mönö azi kembu tandök aka galöm köl enğimakze. Yeñgö pom jembonñinan mönö keu jim kutuba könagesöñini mindiñgöm enğigetka welenñini qeba ‘Azi ölöpñi!’ jiba möpöseim enğimakze.

26 * “Mewö ahakzemö, eñön mianğö dop kude akñe. Enğö sutñine kunñan ketañamñini akza-wañön mönö eretñanğö dop aka malma. Galöm bohonñan mönö welenqeçe ewö aka malma.

27 * “Kunöñ tata nene neiga kunñan nene köl wañgiba anda kamakzawi, yetköreñök öngöñgöñi mi dañön? Ölna, ‘Tata nene nezawañön mönö öngöñgöñi akza.’ Mewö jiget mörakzinmö, nöñön enğö sutñine welenqeçe ewö aka maljal.

28 “Mewö malbi esapköm niñgigetka wahöjalin wahösömbu uruñe añgotpiga iñini töndup kapan köla nömbuk qekötahöba mala kotze.

29 Iwinan jim kutum niñgiiga nöñön yañgö bemtohoñi kukösum qakñe galöm kölakzal. Mianğöra nöñön toroqeba jim kutum enğibiga iñini mewöyök kukösum qakñe ambazip kiñ ewö galöm köl enğimakñe.

* **22:24:** Mat 18.1; Mak 9.34; Luk 9.46 * **22:25:** Mat 20.25-27;

Mak 10.42-44 * **22:26:** Mat 23.11; Mak 9.35 * **22:27:** Jon

13.12-15

30 *Miaᅅgöra iᅅini ölop nöᅅgö bemtohoᅅne aᅅgota nene dumni liliköba tata o aka nene nembamalne aka azi kembu tatatnöᅅ tata Israel ambazip kambu 12 yeᅅgö keuᅅini kewöta jim teköm eᅅgime.” Mewö.

Pitönöᅅ Jisös qaᅅ kölmqaᅅkö jii mörök.

Mat 26.31-35; Mak 14.27-31; Jon 13.36-38

31 Jisösnöᅅ jiyök, “O Saimon Saimon! Mötnöᅅ! Kölkömöt azinöᅅ wit padi köᅅᅅi joutnöᅅ ala uturuköiga kamböᅅi deᅅda erakzawi, Satanöᅅ mönö miaᅅgö dop eᅅön löwöriba yaᅅgö böröᅅe gemegöra uturuköba esapesap al eᅅgimamgö kapan köla jöjöröza.

32 Jöjörözapmö, göhö mötnaripkan sörauba pömsöm qebapuköra nöᅅön göhöra köuluköba malal. Miaᅅgöra nalö kungen urugi melenᅅda nöᅅgöreᅅ kamani, miaᅅgöreᅅ mönö mötnarip alaurupki naᅅgöba mem köhöim eᅅgiman.”

33 Mewö jiiga Saimonöᅅ melenᅅnök, “Kembu, nöᅅön göbuk kösö mire anbitkö aka mohotᅅe kömumbitkö jöjöröba maljal.”

34 Mewö jiyökmö, Jisösnöᅅ jii mörök, “Pitö, nöᅅön kewö jibi mötnöᅅ: Kuruknöᅅ merak qahö qeriga göᅅön mutuk ni möt niᅅgimamgö qaᅅ kölnöᅅga inᅅimᅅi karöbut akᅅa.

Gösö aka bimᅅö sou ketaqi miyök memba anme.

35 *Jisösnöᅅ gwarekurupᅅi kewö qesim eᅅgiyök, “Nöᅅön iᅅini mutuk gösö qahö, moneᅅ gösö qahö, köna esu qahö mewö melaim eᅅgibi angeri,

* 22:30: Mat 19.28 * 22:35: Mat 10.9-10; Mak 6.8-9; Luk 9.3; 10.4

mianğoreñ yuai kungöra osiget me qahö?” Qesim enğıga “Yuai kungöra qahö osiin,” jiget.

³⁶ Jigetka kewö toroqeba jiyök, “Mutuk mewö aketmö, nalö kewöñe kungöreñ gösö aka monen gösö tunji ahözawi, mi ölop memba tenğöba malma. Bingö sou ketanji mi kungöreñ qahö ahöza, yanön mönö malukunji bohonji memegöra ala monen miwikñaiba sou mi bohonji mema.

³⁷ *Nöñön mianğöra kewö jibi mötket: Anu-tugö keu nöngöra jigeri, mi körek pakpak köhöim teköma. Mianğö nalöñan mönö kam kungumangö akza. Buña keu kun kewö ohoget ahöza, ‘Yanön bölöñi meme yenğö kambuñine ahöma, jiget.’ Mianğöra jizal: Keu mianğö ölni mi nöngöreñ asuhum teköma.”

³⁸ Mewö jiiga gwarekurupñan jiget, “Kembu eknöñ, bingö sou ketanji yahöt ki ahözahot.” Mewö jigetka “Mi dop kölja,” jiba melen enğıyök. Mewö.

Jisösnöñ Gezemane arönöñ köuluköyök.

Mat 26.36-46; Mak 14.32-42

³⁹ Jisösnöñ miri mosöta silikñi wuatangöba Oil ip kundunje öngöiga gwarekurupñan andöñe anget.

⁴⁰ Öngöba mianğöreñ anğota kewö jii mötket, “Esapesapnöñ et enğubapüköra mönö köuluk nup meme.”

⁴¹ Mewö jiba enğömosöta köt gilin anakzawi, mianğö dop anda simin köla köuluköyök

⁴² Köuluköba kewö jiyök, “Iwini, göñön urusihingi mötzan ewö, sihimbölögö qambiñi kianön mönö nöngö qakne öngöbapüköra noañgitman. Noañgitman me qahö, mi mönö nangi

* 22:37: Ais 53.12

jit keugahö dop asuhuma. Mi nöngö sihimgö dop qahö.”

⁴³ Mewö köuluköiga garata kunjan Suepnöhök asuhuba mem köhöim wanjiyök.

⁴⁴ Mem köhöim wanjiiga könjilin öngöngöni möta mönö kapan köla uruji qezaköba köuluköyök. Köuluköiga nöngöpni mi sep jöjöl ewö tiŋgita gölmenöŋ etket.

⁴⁵ Köuluköm teköba wahöta gwarekurupni yeŋgöreŋ anök. Anda miwikŋaiba engehi wösöbiriknöŋ mem et enŋii söroraua gaun ahöget.

⁴⁶ Ahögetka jiyök, “Mönö wuanöngöra gaunök ahöze? Mönö wahöta esapesapnöŋ et enŋubapuköra köuluköget.” Mewö.

Jisös qeraköba memba jöhöget.

Mat 26.47-56; Mak 14.43-50; Jon 18.3-11

⁴⁷ Jisösnöŋ mewö jiba kiniga miangöreŋ azi kambu kaŋgotket. Gwarekurupni 12 yeŋgöreŋök kun qetŋi Judas yaŋön jitnemem enŋiba Jisösgöreŋ kaŋgota numbuŋi yöhötim neyök.

⁴⁸ Yöhötim neyökmö, Jisösnöŋ kewö jii mörök, “Judas, gi numbuni yöhötim memba mewö mianön Suep gölmegö azi ölni mamalolo mem wanŋizan me?”

⁴⁹ Mewö aiga tosatŋan Jisös liliköm wanŋiba kingeri yeŋön yuai asuhumangö ahi mi eka jiget, “Kembu, nini bimgö sou ketanŋan enŋuin me?”

⁵⁰ Mewö jiba yeŋgöreŋök kunjan jike nup galöm bohonŋangö welenqeŋeni qeba kezapni ölni köteköi erök.

⁵¹ Erökmö, Jisösnöñ melenđa “Mönö mosötket!” jiba welenqegeğö kezapñi yandiyöhi, mi misiriiga ölöwahök.

⁵² Ölöwahiga kinda jike nup galömurup, jikegö kiripo galöm bohonñi aka kantrigö jitñememe yeñön Jisös membingö kañgotkeri, mi kewö jii mötket, “Ni kegwek-kahasililiñ azia qahöpmö, töndup nöñgöra mewö möta bingö sou ketañi aka liñgip memba kañgotze.

⁵³ *Nöñön wehön dop jöwöwöl jikenöñ embuk malbiga inñini böröñini böranđa ni qahö nömiget. Mi qahöpmö, dölki söñaupkö ösumñan luhut ala aukñe asuhuiga engö nalöñinan kam kuñguza.” Mewö.

Pitönöñ Jisös qañ kölök.

Mat 26.57-58, 69-75; Mak 14.53-54, 66-72; Jon 18.12-18, 25-27

⁵⁴ Mewö aiga yarö azi yeñön Jisös memba jöhöba wañgita jike nup galöm bohonñanğö mire anget. Angetka Pitönöñ andöñine sikepsikep enğuatañğöba anök.

⁵⁵ Mianğöreñ anda jakömbuak mirigö kiripo uruñe geba sombem bibiñe könöp ohoba mohotñe tatket. Pitönöñ mewöñanök yeñğö sutñine tarök.

⁵⁶ Tari welenqeçe ambi kunñan Pitönöñ könöp kösutñe tari ehiba kewö jiyök, “Azi kianñön mönö mewöyök yambuk malök.”

⁵⁷ Mewö jiyökmö, Pitönöñ qañ köla kewö jiyök, “Ambi, ni i qahö möt wañgizal.”

⁵⁸ Mewö jiba tari kude köriiga azi kunñan eka jiyök, “Gi mewöyök yeñğöreñök kun akzan.” Mewö jiyökmö, Pitönöñ melenñök, “Alani, ni qahö.”

* **22:53:** Luk 19.47; 21.37

59 Aua mohotkö dop teköiga kunñan keu mi kunbuk kapan köla jiyök, “Azi kianñon mewöyök ölña yambuk malök. Yanñon mönö Galili azia akza.”

60 Mewö jiyökmö, Pitönöñ melenök, “Azi, keu jizani, mi köndatzal.” Mewö jiba kiniga miangörenök kuruk qerök.

61 Qeriga Kembunöñ lilingöba Pitö uba ehiga miangörenök keuñi kewö jiyöhi, mi mötmöriyök, ‘Gi merak indimñi karöbut qañ köl niñginöñga kuruknöñ qetma.’

62 Keu mi mötmöriba wösöñi julmamgö aiga yaigep geba sahöt böliyök. Mewö.

Jisös jim gönahit ak wañgiget.

Mat 26.67-68; Mak 14.63-65

63 Yarö azi Jisös memba jöhögeri, yeñon mepaqe-paik ak wañgiba kinda qeapköget.

64 Qeapköba jemesoholñi esuhuba qesiba jiget, “Gi kezapqetok azia akzananğöra danñon guhuzawi, mönö yanğö qetñi qetnöñ!”

65 Mewö jiba gwötpuk terenqerennda ilita jim qetal wañgiget. Mewö.

Jikegö jitñememe yeñon Jisösgö keu nup meget.

Mat 26.59-66; Mak 14.55-64; Jon 18.19-24

66 Jim qetal wañgiba malgetka miri gianñiga kantrigö jitñememe aka jike nup galöm aka Köna keugö böhi yeñon tokoba Jisös wañgita Juda yeñgö jike kaunsöl kambu yeñgö jeñine alget.

67 Miangören algetka jiget, “Göñon Amötqege Toñi Kraist akzan ewö, mi mönö aukñe pañ jinöñga mötpin.” Mewö jigetka melenök, “Mi jibi mötpeaha kun, mi mönö qahö möt narime.

68 Me qesim engibileŋaha kun, mi mönö qahö meleni niŋgime.

69 Mewö mötzalmö, nalö kewöŋeyök könahiba Suep gölmegö azi ölni yaŋön mönö Anutu, kukösum Toŋaŋö böröŋi ölni tata malma.”

70 Mewö jiiga miangöreŋök köreŋanök kewö jiba qesiget, “Ölna, gi Anutugö nahönŋa akzan me qahö?” Mewö qesigetka kewö meleni engiyök, “Mi akzalaŋö keuŋi mönö nanŋinak jize.”

71 Meleni engiiga jiget, “Nanŋak uŋemuŋem (guŋemguŋem) keuŋi mönö nanŋi numbuŋan jiiga möt teközin. Miangöra tosatŋan keuŋi nanŋömegöra mönö wuanöŋgöra kunbuk qesim engibinak?” Mewö.

23

Jisösnöŋ premiö Pailötkö jeŋe kinök.

Mat 27.1-2, 11-14; Mak 15.1-5; Jon 18.28-38

1 Mewö jiiga kambu körek yeŋön wahöta Jisös waŋgita premiö Pailötköreŋ anget.

2 Yaŋöreŋ anda könahiba sileŋe keu ala undenda kewö jiget, “Azi kianŋö könaŋi kewö eka mörin: Yaŋön ambazip kuŋgum engiiga enjololon aka karim asuhumakze. Nini Sisa kinŋö takis kude almegöra songo alakza. Nanŋaŋgöra ‘Ni Amötqeŋe Toŋi Kraist aka kin akzal,’ jimakza.”

3 Mewö jigetka Pailötnöŋ kewö qesim waŋgiyök, “Ölna, gi Juda yeŋö kiŋa akzan me qahö?” Qesim waŋgiiga Jisösnöŋ meleni jiyök, “Mönö nangak jizani, mewö.”

⁴ Pailötnöŋ jike nup galöm aka ambazip kambu yeŋgöra kewö jii mötket, “Nöŋön azi kiangö pinjitŋi kun qahö miwikŋaizal.”

⁵ Mewö jii möta kunbuk kapan köla kuŋguba jiget, “Yaŋön mönö ambazip kambu kuŋgum eŋgiba Buŋaŋi Galili prowinsnöŋ könahiba kusum eŋgiba gölme dop köla kaba Judia prowins kiangören mewöyök mi jim sehimakza.”

⁶ Mewö jiget möta qesim eŋgiba jiyök, “I Galili azia me akza qahö?”

⁷ Mewö jiiga “Mönö mi!” jiget möta Herodnöŋ Galili aka prowins tosatŋi mindiriba galöm köl eŋgiba nalö miangörenök Jerusalem sitinöŋ kaba malöhi, miangöra Pailötnöŋ Jisös Herodkören waŋgita anget. Mewö.

Jisösnöŋ kiŋ Herodkö jeŋe kinök.

⁸ Herodnöŋ Jisösgö kösohotŋi möta lök nalö köröpŋi ekŋamgö sihimŋi möta malöhangöra i eka uruŋan gwötpuk ölöwahök. Jisösnöŋ aŋgöletot kun meiga ekŋamgö al mamböta malök.

⁹ Miangöra qeŋesi gwötpuk Jisös qesim waŋgiyök. Mi qesim waŋgiyökmö, Jisösnöŋ likepŋi kun qahö jii mörök.

¹⁰ Jike nup galöm aka Köna keugö böhi yeŋön kinda silenöŋ alal keu könöpŋambuk jim waŋgiget.

¹¹ Herodnöŋ yarö aziurupŋi yembuk Jisös memba et ala jijiwilit aka mepaqepaik mem waŋgiget. Mewö aka maluku aködamunŋambuk kun löŋgöt waŋgiget kini melaiiga kunbuk premiö Pailötkö jeŋe anök.

12 Mutuk Pailöt aka Herod yetkôn kerök-kerök ak aŋguba malohora nalö mianğoreŋ ala-ala ahot. Mewö.

Pailötnöŋ Jisös kömumapkö jim teköyök.

Mat 27.15-26; Mak 15.6-15; Jon 18.39-19.16

13 Jisösnöŋ kaiga premiö Pailötnöŋ jike nup galöm aka galömkölköl aziurupŋi aka ambazip kambu öröm eŋgii tokoget.

14 Tokogetka kewö jii mötket, “Inini azi ki kewö jiba nöŋgöreŋ waŋgita kaze, ‘Yaŋön ambazip kambu kuŋgum eŋgiiga eŋololoŋ ahakze.’ Mötket! Inini keu silene aljei, nöŋön mianğö könaŋi eŋö jeŋine kewöta kewö miwikŋaizal: Inini azi kianğö silene keu aljei pakpak, mianğön pinjitŋi qahö akza.

15 Herodnöŋ keu mewöŋanök jiba melaiiga kunbuk neŋgöreŋ kaza. Mötket, yaŋön yuai pinjitŋambuk kun qahö ahök. Mianğöra kömupkö buŋaya akŋapkö osima.

16 Mianğöra nöŋön jibi yarö azi yeŋön ihileknöhök qegetka pösatpi etma.”

17 (Pailötnöŋ yambu (yara) dop Pasowa sösöŋgai nalöŋe kösö mireyök azi mohok pösat eŋgimaljapma.)

18 Mewö jiiga yeŋön körebörek silata qeta jiget, “Ia mönö yapmakek! Barabas mönö pösat neŋginöŋ.”

19 Barabas mianğön sitinöŋ karim gila malgeri, yeŋö galömnina aka azi kun qei kömuyöhi, mianğöra kösö mire alget tarök.

20 Pailötnöŋ Jisös pösatmamgö möta keu kunbuk jiyök.

21 Jiyökmö, yeñön qetala örañbörañ misiba qet gigilahöget, “Maripomnöñ qeget! Maripomnöñ qeget!”

22 Qet gigilahögetka yañön keu indimñi karöbut kewö jiyök, “Yañön mönö wani bölöña ahök? Nöñön yañgöreñ pinjit kun kude miwikñaibiga kömupkö bunaya akñawañgö dop qahö akza. Mewö aiga nöñön jibi yarö azi yeñön ihileknöhök qegetka pösatpi etma.”

23 Mewö jiyökmö, yeñön jakbak memba kapañ köla toroqeba qet gigilahöba qetket, ‘Jisös maripomnöñ qeget kömuma.’ Mewö qeta Pailötköreñ keu mi qeapköget.

24 Qeapkögetka Pailötnöñ keuñini bapñe anda keu kapañ köla jigeri, miangö ölni ahumapkö jim teköyök.

25 Jim teköba Barabas etmapkö kapañ kölgerañgöra i pösari erök. I karim qeba malgeri, yeñgö galömñina aka azi kun qei kömuyöhi, miangöra kösö mire alget tarök. Mi pösari erökmö, Jisös sihimñinañgö dop jaunğauranga ak wañgimegöra böröñine alök. Mewö.

Jisös maripomnöñ qeget.

Mat 27.32-44; Mak 15.21-32; Jon 19.17-27

26 Pailötnöñ Jisös böröñine aliga wañgita köna namñe anda Afrika siti qetñi Sairini miangö azi kun qetñi Saimon miwikñaiget. Yañön nupnöñök kañgoriga jim kutum wañgiba Jisösgö maripomñi wañgita yañgö awötñe algetka añguba wuatañgöba anök.

27 Mewö aniga ambazip kambu ketanji yeñön lulunđa andöñe wuatangöba anget. Yeñgö sutñine ambi tosatñan mewöyök jingey köla sahöta anget.

28 Sahöta angetka Jisösnöñ lilingöba engeka kewö jiyök, “O Jerusalem ambi, inini mönö nöngöra kude sahötket. Nöngöra qahöpmö, nanñini aka nahönböraturupñini miengöra mönö sahötme.

29 Mötket! Könanjep nalö kun kai miangören kewö jime, ‘Ambi köpin mi simbawoñ. Gölöm qahö ala morö kude megeri, mi simbawoñ akze. Nahönbörat juzu engiba qahö dohongögeri, mi simbawoñ.’

30 *Nalö miangören ambazipnöñ könahiba kundunji Tonji yeñgöra kewö uletme, ‘Inini mönö kundunji mi jigetka teköba qaknine öngöme.’ Aka sem siagö Tonji mi kewö ulet engime, ‘Inini mönö banetñine asamböt nengime.’

31 “Nöñön Anutugören ip gwölögwölö akzal aka nöngöra töndup kewö ak ningize. Inini ip köhömuñi siñgisöndokñinambuk könöp sihit qeba kinje. Miangöra Anutunöñ likepñi melenj engiiga könöpnöñ amqeqeñanök engohotiriiga sihimbölä öngöngöñi mötme.”

32 Bölöñi meme yahöt mi mewöyök Jisösbuk mohotje etkubingöra etkuangita anget.

33 Anda gölme qetñi Nöröpsihit qetzei, miangören angota Jisös maripomnöñ qeget. Qeba bölöñi meme yahöt mi mohotje kun ölñe kun qaniñe likeplikew mewö etkuget.

34 *Mewö aketmö, Jisösnöñ jiyök, “Iwini, yeñön yuai akzei, miangö könanji qahö möt kutuzeangöra

* 23:30: Hos 10.8; Ind 6.16 * 23:34: Sum 22.18

siŋgisöndokŋini mönö mosöt enġiman.”

Qeget kiniga Jisösgö sile esunġgöra kiawen megetka qötöŋi ahui mianġö dop mendenġa meget.

³⁵ *Mewö aketka ambazip kambu yeŋön kinda mi uba eket. Eketmö, Juda jitŋememe yeŋön mewöyök mepaqepaik mem waŋgiba kewö jiget, “Anutunöŋ möwölöhöm waŋgii Amötqege Toŋi Kraist akza ewö, tosatŋi bauköm enġiba malöhaŋön mönö nanŋi bauköm aŋguma.”

³⁶ *Yarö azi yeŋön mewöyök keu gönahit jiba ilita kösutŋe anda wain o asölŋambuk kusahöla memba öŋgöba waŋgiba

³⁷ kewö jiget, “Gi Juda yeŋgöreŋ kiŋ kembuya akzan ewö, mönö ölöp nangi bauköm aŋguman.”

³⁸ Nöröpŋe eu kulem kun kewö ohoget kinök, “Juda yeŋgö kiŋ kembuŋina ki.”

³⁹ Kegwek-kahasililiŋ azi yahöt mohotŋe möndögetka kingeri, yetköreŋök kunŋan uruqege keu töhöreŋ Jisös jim waŋgiba kewö jiyök, “Gi Amötqege Toŋi Kraist akzan ewö, mönö nangi bauköba niri mewöyök bauköm netkinöŋ.”

⁴⁰ Mewö jiyökmö, alaŋan jim waŋgiba kewö jiyök, “Gi gödaqegegi qahö. Gi Anutugöra mewöyök keŋgötki qahö mötzan me? Yeŋön jim teköba si-himbölö öröröŋ neŋgigetka bisizin.

⁴¹ Niri ölna pinjit ahiraŋgöra likepŋi dopŋe melenġa ak netkigetka sihimbölö mötzit. Mi mötzitmö, azi kianön bölöŋi kun qahö aiga ia töndup ayuhuze.”

* **23:35:** Sum 22.7 * **23:36:** Sum 69.21

42 Mewö jiba jiyök, “Jisös, gi bemtohongahö uruñe angotmani, mianğöreñ mönö ni mötmörim niñgiman.”

43 Jiiga kewö jiyök, “Nöñön keu ölña jibi mötnöñ: Göñön mönö merak nömbuk oyaenköyaen mire öngöba malman.” Mewö.

Jisösnöñ kömuyök.

Mat 27.45-56; Mak 15.33-41; Jon 19.28-30

44 Silim bibiñi 12 kilok aiga wehön jeñi böuleiiga söñaupnöñ eta gölme pakpak dop köla ahöiga anda aua karöbutkö dop ahök.

45 *Nalö mianğöreñ jöwöwöl jike uruñe opo kinöhi, mianñön mönö euyök bibiñe jurata eta yahöt ahök.

46 *Jisösnöñ nalö mianğöreñ köhöikñanök qeta kewö jiyök, “Iwini, nöñön unani göhö böröge aljal.” Mewö jiba söngörö ösum kondikñi öröba kömuyök.

47 Kömuiga yuai asuhuyöhi, suahö galömnöñ mi eka Anutu möpöseiba kewö jiyök, “Yañön mönö ölña azi solanña akza.”

48 Ambazip kambu pakpak mi ekingö kaba tokogeri, yeñön yuai mi asuhui eka wösöñini juliga nörop gila mohot mohot miriñine anget.

49 *Angetmö, ambazip pakpak Jisös möt wañgigeri, yeñön sikep kindi i uba eket. Ambi tosatñan Jisös wuatangöba Galiliyök kageri, yeñön mewöyök kindi mi eket. Mewö.

Jisösgö qamötñi löm kölget.

Mat 27.57-61; Mak 15.42-47; Jon 19.38-42

* 23:45: Eks 26.31-33 * 23:46: Sum 31.5 * 23:49: Luk 8.2-3

50-51 Juda yengören taon qetnji Arimatia miangörenök azi ölopnji qetbuñambuk qetnji Josef yañon mewöyök kayök. Yañon Anutu bemtohoñangö ölnji asuhumapköra mamböta malök. Yañon Juda yengö jike kaunsöl kambugö jitnememe mala Jisösgö keu jim jöhöba akeri, miangö urumohok qahö ahök.

52 Yañon Pailötkören anda Jisösgö qamötñi memangö qesiyök.

53 Qesiba öngöba qamötñi maripomnöhök qeköba memba eta opo tuatñan esuhuyök. Esuhuba memba qaksirinöñ anda köt köteñ kun urorohoba qamöt kun miangören qahö algeri, Jisösgö qamötñi mi miangören alök.

54 Sabat kendon tatatkö yuainji mözözömgögeri, miangö wehön jeni gemangö ahök.

55 Gemangö aiga ambi Jisösbuk Galiliyök kageri, yañon Josefgö könañe qaksirinöñ anda yañon Jisösgö qamötñi memba köt köteñnöñ alöhi, mi eket.

56 *Miangörenök lilingöba mire anda jiniñ suamburup umköhöwakñambuk aka kelök qösösökñambuk Jisösgö qamötñe miribingö mözözömgöget. Mözözömgögetmö, Mosesnöñ Köna keunöñ Sabat kendongöra jim kutui ahöyöhi, mi wuatangöba luhut memba ösöñ tatket. Mewö.

24

*Jisösnöñ kömupnöhök wahörök.
Mat 28.1-10; Mak 16.1-8; Jon 20.1-10*

* 23:56: Eks 20.10; Dut 5.14

1 Sabat kendon tatket teköiga Sonda sönanök miri gianjiiga ambi yeñön wahöta jiniñ jimoron umköhöwaktambuk mözözömgögeri, mi memba qaksirinöñ anget.

2 Anda kunñan qaksirigö numbuñe köt ketañi qetali ani eket.

3 Mi eka köt köteñ uruñe öngögetmö, Kembu Jisösgö qamötñi qahö miwikñaiget.

4 Mianğöra mötkurumkurum möta kingetka azi yahöt malukuñiri tuatñi kölköl-bilikbilikñambuk yetkөн wösöñine kinohotka etkeket.

5 Mi etkeka awöwöliba gölmenöñ geba dapkögetka kewö jiyohot mötket, “Jebuk mal köhöizawi, i mönö denöwögöra kömukömuñi yeñgö sutñine jaruze?”

6 *Yañön ki qahö ahözapmö, mönö guliba wahötza. Galili prowinsnöñ mala keu jii mötkeri, mi mönö mötmörime:

7 Yañön kewö jiyök, ‘Kunöñ Suep gölmegö azi ölnji mamalolo mem wañgiiga bölöñi meme yeñgö böröñine geiga maripomnöñ qeget kömumba wehön karöbut aiga guliba wahötma.’ ”

8 Mewö jiyohotka keuñi mi mötmötñine anğoriga mötmöriget.

9 Mewö mötmöriba qaksirinöhök lilingöba kaba yuai pakpak asuhuyöhi, mianğö buzup keuñi mi gwarek 11 aka tosatñi pakpak yeñgöra jiget mötket.

10 Keu mi jigeri, mi Magdalagöra Maria, Joana aka Maria Jeimsgö namñi aka ambi tosatñi yembuk malgeri, yeñön mi kaba aposol yeñgöra jiget mötket.

* 24:6: Mat 16.21; 17.22-23; 20.18-19; Mak 8.31; 9.31; 10.33-34; Luk 9.22; 18.31-33

11 Buzup keu mi jiget mötketmö, keu jigeri, mi keu omanji tandök ahöhi, mewö mötmöriba mi qahö möt nariget.

12 Qahö möt narigetmö, Pitönöñ wahöta ösumñan qaksirinöñ anda köt köteñ uruñe ui aniga opo esu miyök miangöreñ tari ehök. Mi eka yuai asuhuyöhi, mi nanñök mötmöriba welipköba mire lilingöyök. Mewö.

Gwarek yahötñan Emeus könanöñ anohot.

Mak 16.12-13

13 Wehön miangöreñök Jisösgö gwarekurupñi yeñgöreñök yahötñan Jerusalem siti mosöta miri qetñi Emeus sewen mail miangöreñ anbitkö anohot.

14 Könanöñ anda yuai asuhuyöhi, mi pakpak nanñirök eraum mörohot.

15 Mi eraum möta könanji jim lömböriba anohotka Jisösnöñ nanñak kösutñire angota mohotñe anget.

16 Angetmö, jeñiri közamböri i qahö ek kutuyohot.

17 Qahö ek kutuyohotka kewö jiyök, “Inñiri nanñirök wani keuya könanöñ eraum möta kazahot?” Mewö jiiga dörök mitiba wösöbirik jeje uba eka kinohot.

18 Eka kinda yetköreñök kun qetñi Kliopas yañön kewö qesim wañgiyök, “Pasowa kendonöñ yuai asuhuyöhi, mi Jerusalem ambazip körekñan mötze. Gi mohotñan kiana aka mi qahö mötzan me?”

19 Qesim wañgiiga “Mi wania?” jiiga möta kewö jiyohot mörök, “Nazaret azi Jisösgöra yuai asuhuyök mi. Yañön kezapqetok azia mala Anutu aka ambazip pakpak yeñgö jeñine ahakmeme kukösumñambuk aka keu köhöikñi jiba malök.

20 Mewö maliga nenğö jike nup galömnini aka galömkölköl aziurupninan i wanğita premiögö böröñe algetka kömumapkö jim teköi maripomnöñ qeget kömuyök.

21 Yanğön Israel könagesönini kösönöhök pösata sohopnini memapköra al mamböta jörömqöröm aka malinmö, Yei! i mönö qeget kömuyök. Yuai mi asuhuiga mala koringa merak sömanji karöbut lök akza.

22 “Mi qahö dop köliga merak nenğöreñök ambi tosatñan keunöñ kuñguba welipköm nenğiget maljin. Yenğön söñan amandıñe qaksirinöñ anda,

23 qamötñi qahö miwikñaiiba liliñgöba kewö jize, “Nini Suep garata yahötkö jemelen imut ehinga yetköñ ‘Jisösnöñ guliba malja,’ ” jiyohotka mötzin.

24 Keu mi möta azi nembuk maljei, yenğöreñök tosatñan qaksirinöñ anda ambi yenğön keu jizei, miangö dop ahöiga ekze. Löm gwamönñi ekzemö, nanñi qahö ekze.”

25 Keu mi möta kewö jii mörohot, “Yei! İñini kezapqetok yenğön keu jigeri, mi pakpak mönö wuanöñgöra ölanbölan aka ajojohoba gawönjeje mala qahö möt narize?

26 Amötqeçe Tonji Kraistnöñ sihimbölä mewöñi mötagun nanñi asakmararañ uruñe öñgöma. Miangö dop ohoget ahöza me qahö?”

27 Mewö jii mörohotka Moses aka kezapqetok ambazip pakpak yenğön keu jigeri, miangöreñök könahiba nanñangöra keunji pakpak ohoget ahözawi, miangö könañi jim asarim etkiyök.

28 Jim asarim etkiba anda miri anbitkö jiba anohori, mi dopdowiba miangöreñ toroqeba anmamgö mörök.

²⁹ Mewö mörökmö, yetkôn kapan köl wanğiba kewö jiyohot, “Miri mare aiga wehön jejan lök gemangö akza. Mianğöra ölop netpuk tata ahöman.” Mewö jiyohotka yetpuk mire öngöba tatket.

³⁰ Tata yetpuk nene nemingö aka beret memba kötuetköba mindipköba etkimangö aiga yuai kewö asuhuyök:

³¹ Mianğöreñök jeñiran tohoiga ek kutuyohotka at atop (jiataton) köliga kunbuk qahö ehot.

³² Mewö aiga nanñirök kewö eraum mörohot, “Köna namñe Buña Kimbigö keu jiba könanji jim asarim netkizawi, nalö mianğöreñök mönö urunire könöp jezawangö dop mötzit.”

³³ Mewö jiba mianğöreñök wahöta Jerusalem sitinöñ lilingöba anğota gwarekurupñi 11 aka alaurup yembuk tokoba tatkeri, mi miwikñaim enğiyohot.

³⁴ Miwikñaim enğiyohotka kewö jiget mörohot, “Kembunöñ mönö ölña wahöta Saimongöreñ asuhum wanğiza.”

³⁵ Mewö jigetka nanñirak könanöñ yuai asuhuyök aka beret mindipköyöhi, nalö mianğöreñ uruniri tohoiga möt kutuyohot, mianğö kösohotñi mem enğiyohot. Mewö.

Jisösnöñ gwarek kambuñi asuhum enğiyök.

Mat 28.16-20; Mak 16.14-18; Jon 20.19-23; Apo 1.6-8

³⁶ Gwarekurupñi yeñön keu mi eraum möta tatketka mianğöreñök Jisösnöñ nanñak sutñine asuhuba kinda kewö jiyök, “Alaurupni, luainöñ embuk ahöma!”

³⁷ Mewö jiiga kenğötporiñ aka jönömñini undui “Öme imura ekzin,” mewö mötmöriget.

³⁸ Mewö mötmörigetmö, kewö jii mötket, “İñini denöwögöra auruba mötmöt mewöñi uruñine ahuza?

³⁹ Ni nanak ki maljal. Mi nanñinak köna böröni uba eka mötme. Öme imut mi bususihitñini qahö. Ni bususihitnambuk kinbi nekze. Mönö nömisiriba nek kömume.”

⁴⁰ Mewö jiba köna böröñi kondel enğiyök.

⁴¹ Kondel enğiyökmö, mi sösöngainañgöra töndup qahö möt nariba welipköba tatketka kewö qesiba jiyök, “Neneñamñini kun ki tatza me qahö?”

⁴² Mewö jiiga söra jejenñi miangö kitipñi kun wanğiget.

⁴³ Wanğigetka memba neiga eket.

⁴⁴ Neiga eketka kewö jii mötket, “Ni embuk mala nalö miangören keu jibi mötkeri, miangö ölni nalö kianğören asuhui ekze. Nöñön kewö jiba malal: Nöngö keu mi Mosesgö Köna keu aka kezapqetok azi yeñgö Buzup Kimbi aka Sumbara (Buña liñet) bukñöñ ohoget ahözawi, mi pakpak mönö ölnambuk ak teköma.”

⁴⁵ Mewö jii mötketka miangörenök Buña Kimbigö könañi möt kutumegöra uruñini metohoyök.

⁴⁶ Metohoba kewö jii mötket, “Keu kewö ohoget ahöza: Kraistnöñ sihimbölä möta kömumba sömañi karöbut aiga kömupnöhök wahötma.

⁴⁷ Miangöra enñön mönö Jerusalem sitinöñ könahiba Buña keu nöngö qetne jim asariba kantri pakpak dop köla anda uru kuñgum enğimakñe. Denike yeñön uruñini meleşmei, Anutunöñ mönö yeñgö siñgisöndokñini mosöta sañgoñma.

48 “Keu mi ölnambuk ahök aka akñawi, injini mi asuhui eka nañgöba jiba dangunu ewö kinme.

49 *Mötket! Iwinan kalem engimapkö keu jöhöyöhi, nöñön i melaibiga uruñine gema. Euyañgörenök kukösum albi qakñine öngöma. Injini siti kĩañgören miãñgöra mamböta tata malme.” Mewö.

Jisösnöñ Suep mire öngöyök.

Mat 16.19-20; Apo 1.9-11

50 *Jisösnöñ keuñi jim teköba gwarekurupñi enñuanñgita anda Betani miri kösutñe añgota miãñgören bñröñi mem wahöta kötuetköm enñiyök.

51 Kötuetköm enñiiga miãñgörenök Anutunöñ wañgiriga enñömosöta Suepnöñ öngöyök.

52 Öngöiga sösongai ketañi möta sipköba waikñi memba möpöseim wañgiba Jerusalem lilingöget.

53 Lilingöba sundan dop jöwöwöl jikenöñ mala Anutu möpöseim wañgiba malget. Mewö.

* 24:49: Apo 1.4 * 24:50: Apo 1.9-11

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 18 Apr 2025 from source files dated 31 Aug 2023

c0871260-68cc-5a50-953f-52200e105d1e